

Ijitän n-inəmмушал n-Үisa Älmasesx

Äšqješ

¹ A-wa näkk hin-iktabän i-enəssemҗär-in Täyofil:

Däҗ-өлкөттәb-in wa äzzarän, ässoҗäläҗ-ak isälan n-a-wa s-issöntä Үisa iji-net d-a-wa issäҗra iket-net

² hundäҗ har ašäl wa d-immөdkäl s-išənnawän, җarät a-s äsimätär inəmмушал wi äsnäfrän s-tärna n-Unfas Šäddijän.

³ Entäneҗ-en-däҗ a-s dd-äsnäfaläl iman-net s-tizarät җarät tamättant-net i-ad-tän-isəlmөd s-timtär äjjootnen a-s iddar. Ija җarät tanäkra-net jer-inəmmuttan əkkoҗät timərwen n-ašäl izzay jer-inөтtulab-net, itajj'-asän isälan n-Tөmmөнөya n-Mässinäҗ.

Ärkäwäl wa ija Mässinäҗ i-aratän-net

⁴ Ašäl iyyän, ohar җär-sän amənsi har šik-däҗ, inn'-asän: «Wär feläm aҗrəm wa n-Yärussälam, əqqələt i-a wa s-hi-təsläm saҗreҗ-t s-hawän-ijjäs Abba ärkäwäl-net;

⁵ tidət, Exya, aman a däҗ-issəlmäҗ äddinät mäšan käwäneҗ, däҗ-härät n-išilan, ad-tөtwəsəlmäҗäm däҗ-Unfas Šäddijän-i dd-e-izzubben fälla-wän.»

(Marqəs 16:19-20; Luqa 24:50-53)

6 Äžziimmäxän dihen-däx a-s t-əssəstänän, ənnän-as: «Emäli, ajän äzzäman wa däx-dd-taqqäl təmmənukəla İşrayil, osä-dd?»

7 Inn'-asän: «Wädden käwäneḍ a iwar almud n-täqqän wäla ässaḡät wa ixtäs Abba däx-älxikmät-net;

8 käwäneḍ, ad-təjrəwäm tärna, ad-fällawän dd-izzubbət Unfas Šäddijän, tumasäm tjuhawen-in däx-aḡrəm wa n-Yärussälam, däx-teje ta n-Älyähudəyät iket-net d-ta n-Sämari təkəkəm har diha dd-təmḍa äddunya.»

9 Inn'-asän a-wen ḡas, imməḍkäl data-sän s-išənnawän; əbdadän, əswaḍän däx-s har hasän-t tənjar tejaräkt.

10 Äjozäyän išənnawän-i s-imməḍkäl a-s hasän-dd-änfalälän əssin meddən ässiimlälnen, ənnän-asän:

11 «Ya käl-Galila, ma s-təbdadäm täjozäyäm išənnawän? ḡisa wa imməḍkälän jere-wän s-išənnawän, ilkam a dd-iqqəl s-əmmək-wa-däx s-t-tənhäyäm ikk'-en.»

12 Fälän inəmмуšal ḍarät-a-wen taḍayt ta n-əzzäytunitän, əqqälän aḡrəm wa n-Yärussälam-i hasän-t-illän əḍḍəkud n-täzune n-ässaḡät n-räjjoš.

13 Əwwaḍän-in aḡrəm, əkkän soro n-ehän-wa s-əzzäyän äzəmmäx däx-s. A-wen: Bəḡrus, Exya, Yaḡub, İdris, Fəlibb, Tomi, Bartälamma, Mätti, Yaḡub ägg Älfa, Simyon wa s-itawänna Äššažəx, Hudd wa n-ägg Yaḡub.

14 Əjlayän iket-däx-näsän däx-a-wa hän, oharän iyyän n-ulh däx-temädilt n-Mässinäx

əntäned d-tiðeden təha Märyäma ta n-ma-s
n-Ûisa d-ayətma-s n-Ûisa.

*Änättalib wa ijjäšan edägg n-Yähudəs
Isxaryut*

¹⁵ Äžziimmäxän dihen-däx, ämoosän temede
n-äwadəm d-sänatät timərwen a-s dd-ibdäd
Bətrus jere-sän, inn'-asän:

¹⁶ «Ayətma-x, a-wa innä Unfas Šäddijän s-
emm n-ännäbi Dawəd, däx-isälan n-Yähudəs-i
dd-äslälän äddinät wi ärmäsnen Ûisa, ijä;

¹⁷ käla däx-näx ädđiin, käla t-illa ijraw folät-
net däx-ämašal wa hanäx-issäxläf Mässinäx.

¹⁸ Azrəf-wa xäramän irmäs i-ad-ämašäl
abäkkad wa ofa, iżžənšä sär-s ašəkrəš wa
däx-dd-iha äsikätṭäy fäll-eḡäf-net, äsfätäqqät
iman-net, äzun däx-ammas, äbräzzät-dd a-wa
ihän täsa-net iket-net fäll-äkall;

¹⁹ wär t-illa ere izzaḡän Yärussälam s-wädden
han-t isälan n-a-wen-däx, əglän äddinät fäw har
ašəkrəš-wen-däx däx-t-äba, əjän-as isəm däx-
tawalt-näsän: <Häqqäldäma>, a-wen älmäḡna-
net: <Ašəkrəš wa n-ašni>.

²⁰ Ämära, iktab däx-əlkəttab wa n-Äzzäbur a-
s:

<Iqqəlet ehän-net timšar,
wär t-itiłəset äwadəm uzäx.>

Iktab day a-s:

<Ijjəšet iyyän edägg-net.>

²¹ Ilzam ämära ad-nəsənnəfrən iyyän däx-
meddön wi hanäx-hänen s-alkum i-Ûisa däx-
takliwen-net d-uḡlawän-net däx-a-wa ikkäs
Emäli Ûisa ill'-e jere-näx,

22 a-wen, ɣur-ašäl wa t-issəlmäɣ Exya dəɣ-aman har ašäl wa dd-inkär jer-inəmmuttan təkəkəd ašäl wa d-immədkäl jere-näɣ s-išənnawän.»

23 Äsnäfränän-dd əssin meddən, iyyän Yusəf wa s-itawänna Bärsabas, jannen-as iyyäð Istus, wa iyyäðän Matiyas.

24 Dälän Mässinäɣ ɗarät-a-wen, ənnän: «Emäli, käyy a issanän a-wa ihän ulh n-e d t-illäm ägg-adəm, səlməd-anäɣ wa täsnäfränäd jer-meddən-wi-däɣ n-əssin

25 i-ad-ijjəš edägg wa n-tənnəmušəla irfäð Yähudəs, ikk' edägg wa ija i-iman-net.»

26 Jän tisäɣeren ɗarät-a-wen, oðänät fäll-Matiyas, äððin ya fäll-inəmмуšal wi n-märaw d-iyyan.

2

Äzabbu wa dd-ija Unfas Šäddijän fäll-inəttulab

1 A-s dd-iwwäð ašäl n-ämudd n-käl-Älyähud wa s-itawänna Fantäkawt, äžžimmäɣän inəttulab iket-däɣ-näsän däɣ-iyyan n-edägg.

2 Wäla a hin-əjrähän a-s dd-ifäl eməsli iyyän olähän d-i n-tamädalt täšsoohet išənnawän, änhäynähäy edägg-ənnin-däɣ däɣ-äqqimän iket-net;

3 ibdäd-dd fäll-hak iyyän däɣ-sän a olähän d-ilsawän n-imämmälän n-efew əbðanen,

4 idnäy-tän Unfas Šäddijän älwäqq-wen-däɣ, ad-tamäjrädän awalän äynaynen s-əmmək wa s-hasän-issärɣäs Unfas turhajät n-a-wen.

5 A-s itäj a-wen-däx, ähhujjäjän-dd käl-Älyähud äjjootnen äddinnen s-Yärussälam, wär t-illa äkall s-wädden falän-t-dd.

6 Töslä tamötte n-aḡrəm i-emäsli wa ijän, tošäl-dd iket-net s-edägg wa däx-ija, tøjraw-tät täkunt n-emäsli-wa-däx d-a-wa s-hak äwadəm-däx, isall i-inəmмуšal ämmijrädän tawalt n-äkall-wa-däx dd-ifäl.

7 Eqqälän-dd äddinät ḡas, oran imawän, tøjraw-tän täkunt, jannen: «Käh! Wi äddinät hanäx-ämmijrädnen, ajän wädden teje ta n-Galila a tän-lät?

8 Ma n-əmmək n-a-s hasän-nəsall ämmijrädän tawalen-nänäx?

9 Han-anäx äddinät dd-falnen Bartas, Midyas, Ilam, Mizəbbutamyä, Älyähudəyät, Kafadusya, Fon, Azya;

10 Frižya, Banfilya, Mišra, Libya, Qərwan, Roma,

11 iyyäd däx-näx käl-Älyähud s-aläšäl, iyyäd inalkimän n-äddin wa n-käl-Älyähud, iyyäd däx-näx käl-Kritus, iyyäd Arabän; mäšan, nəsall'-asän iket-däx-nänäx tiimələn tihusay n-ijitän n-Mässinäx däx-tawalen-nänäx.»

12 Eqqälän-dd äddinät ḡas oran imawän, iqgan a-wa ijän iḡäfawän-näsän, tinmännin: «Ma ämoos älmäḡna n-a-wa-däx?»

13 Eggädän-dd iyyäd, jän inəṡṡulab tekäškäšt, ad-jannen: «A-di, asməd a däx-äyyiwänän.»

Älxuṡbat wa ija Bəṡrus ašäl wa n-Fantäkawt

14 Ibdäd-dd Bəṡrus jer-imidiwän-net wi n-märäw d-iiyän, idkäl emäsli-net, innä i-tamötte:

«Meddən, kăwăneḏ-i n-iməhhujaj, kăwăneḏ-i n-käl-Ālyăhud əzzăḡnen Yărussălam, săjdăt-ahi iket-dăḡ-năwăn, təjrăhăm a-wa hawăn-e-ännăḡ dăḡ-ălmăḡna n-a-wa ijăn jere-wăn ašăl-i-dăḡ.

¹⁵ Wădden a-wa tordăm a ijan, meddən wi hannăyăm, wăr-əswen asməd dăḡ-săn ikkasăn ənniyăt, wăr-ămmukkăn a-wen ed agdəlset-dăḡ iket ija.

¹⁶ A-wa ijăn ašăl-i-dăḡ, wăr-ămoos ḡas ar tasətbət n-a-wa inn' ännăbi Yuwil† äzzăman wa d-ălolăy, innă; innă Măssinăḡ:

¹⁷ <Ǝnta da a-wa ilkămăn dăḡ-išilan wi dd-malənen,

A dd-zəzzubbuḡ Unfas-in făll-e d t-illăm ägg-adəm,

ad-ăkfăḡ măjrăd-in mədda-wăn d-ešše-wăn, səssiwəḏăn-t-in dăgg-adəm,

ad-dd-ənfilələn hărătăn ättunkälnen i-imawaḏăn-năwăn,

əhhərjun imḡarăn-năwăn tikunen;

¹⁸ išilan-en, a dd-zəzzubbuḡ Unfas-in

făll-eklan-in d-tiklaten-in,

əluləyăn iket-năsăn.

¹⁹ Ad-dd-əjmăḏăn hărătăn ässuksăḏnen išənnawăn,

ăjăḡ ijitän n-Măssinăḡ făll-ărori n-ăkall,

inḡəl ašni, ăḡ efew, inkăr äho s-išənnawăn.

²⁰ Ad-tămaḡăy tăfukt, əjənăt tihay,

išwaḡ ewăr šund ašni təzzar,

ass-dd ašăl wa măqqărăn n-ălxurmăt iḡtăs Emăli.

† **2:16 2:16** A-wa ännăbi dd-ăzzarăn i-Ÿisa, ălolăy dăḡ-isălan-net səmmosăt timăḏ n-awătay dat-tiwit-net.

21 Aşäl-en, ere iyrän isəm n-Emäli i-tinahäxen, ad-ixlës.>

22 Ya käl-Işrayil, säjdät i-isälan-wi-däx: Yisa wa n-Näşirät, tössanäm käwäneḍ iman-näwän a-s ähalës äsinäfrän Mässinäx a ämoos, issətbät a-wen dat-tiṭṭawen-näwän s-tikunen d-tišušab d-ijitän n-Mässinäx wi ija jere-wän,

23 däx-a-wa itäjj Mässinäx d-təlluləya-net, oyy'iwän tärmäsäm-t, jäm iman-net s-ifassän n-inəzzulam† wi t-əşläbnen fäll-tajəttewt;

24 tidət, ämmut mäšan, ikkäs-t-dd Mässinäx däx-tamättant ta t-təzbäbät, ed wär t-illa əmmək s-t-təṭṭäf däx-tišəm-net.

25 Isälan n-a-wen-däx a däx-äloläy ännäbi Dawəd a-s innä:

<Hannäyäh hak ässaḡät Emäli dat-i;
iwar aḡil-in i-ad-ozja ənniyät-in.

26 Äsidäwät a-wen ulh-in,
olwa iləs-in ed jaräh äṭṭäma
n-ad-täns tafəkka-nin däx-älxer,

27 wär-e təyyəd iman-in ənsan däx-ider n-äkall,
wär-e təyyəd Eməşšeddəj-näk
rakkäh tafəkka-net däx-azəkka.

28 Käyy a hi-issəknän tabarät ta ha tämudre,
sämmeḍ ulh-in, äddiwät ed telled-t edes-in.>

† 2:23 2:23 — Yur-käl-Älyähud, ere wärän ämoos ägg-Älyähud s-aläşäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḍnen iket-näsnät, ti n-inəzzulam. — Aşäl-i-däx, änəzzalim, äkafär (ere wärän issen s-Mässinäx).

29 Meddøn, kăwăneḍ-i n-ayətma-ḡ, əkkasăḡ äššăk dăḡ-a-wa hawăn-janneḡ: Amḡar n-amăzzaḡ Dawəḍ, äba-t, izka; azəkka-net daḡ har ašäl-i-dăḡ, ill'-e diha-dăḡ jere-năḡ.

30 Ēnta-i n-ännăbi, issan fäll-ărkăwăl wa has-ihăḍ Măssinăḡ a-s has-innă:

<Ilkam ad-isəbdəd dăḡ-edăgg-net iyyăn dăḡ-ihăyawăn-net dăḡ-təmmənukəla.>

31 A-s ijănna Dawəḍ a-wen, ihannăy dăḡ-ijəj tanăkra n-Ălmasex jer-inəmmuttan ed äru d-ălölăy Dawəḍ dăḡ-isălan n-a wa s-ilkam ad-ăj. Ēnta-en-dăḡ a dăḡ-ăssewăl Dawəḍ a-s innă:

<Wăr-e təyyəd tafəkka-nin təjar-in dăḡ-azəkka, wăr-e təyyəd tafəkka-nin rakkăh dăḡ-azəkka.>

32 Ƴisa-i s-hawăn-heḡ isălan-net, năjjəyha i-asənkar wa t-dd-ija Măssinăḡ jer-inəmmuttan təzzar

33 idkăl-t s-išənnawăn, äsḡăym'-e daw-aḡil-net i-ad-immukəl, ikf'-e Abba Unfas Šăddijăn wa s-ijjăš ărkăwăl-net, äzzăbbăt-t-dd daḡ fälla-năḡ, äsnăflăy-anăḡ dăḡ-s, ənta-den-dăḡ a-wa dd-orăwăn a-wa s-săllăm d-a-wa hannăyăm ašäl-i-dăḡ.

34 Ännăbi Dawəḍ ya, təssanăm a-s wăr-imməḍkăl s-išənnawăn ed ənta iman-net a innăn:

<Innă Emăli Măssinăḡ i-Emăli-nin:

Ƴyyăw, ḡayəḡ, tăxkəməḍ daw-aḡil-in

35 hundăḡ har äjăḡ išənja-năk isəkkukal daw-iḍarăn-năk.>

36 Ašäl-i, əlməḍnet kăl-Išrayil iket-dăḡ-năsăn a-s Ƴisa wa təšlăbăm fäll-tajəttewt, ənta a ija Măssinăḡ Emăli d-Ălmasex!»

Älmässexitän wi äzzarnen

³⁷ Iḏäs mäjräd wa ija Bəṭrus ulhawän n-äddinät wi has-äsijädnen, ənnän-as ənta d-inəmмуšal wi iyyädnen: «Ayətma-näḡ, ma hanäḡ-iwarän?»

³⁸ Inn'-asän Bəṭrus: «Utabät, tət-wəsəlmäḡäm iket-näwän däḡ-aman s-isəm n-Ḳisa Älmaseḡ, i-ad-təjrəwän tenäšše n-ibäkkadän-näwän, äkf'-iwän Mässinäḡ Unfas Šäddijän,

³⁹ ed ärkäwäl wa ijjäš Mässinäḡ, käwäneḡ d-ihäyawän-näwän d-äddinät wi əzzäḡnen däḡ-ijəj, d-e d t-illäm ere dd-iḡra Emäli-nänäḡ Mässinäḡ s-iman-net a-s t-ija.»

⁴⁰ Ij'-asän Bəṭrus isälan äjjootnen, isatbat härätän data-sän, isamätar-tän, ijann'-asän: «Agəzät iman-näwän däḡ-əzzurəyät-ta-däḡ təfräyät.»

⁴¹ Äddinät wi omännen s-a-wa ätwännän, ätwäsälmäḡän däḡ-aman; ämoos a-s, kärad afdän n-äwadəm ašäl-wen-däḡ a dd-əwwädnen fäll-imumənän.

Anməṭṭaf wa t-illän jer-imumənän

⁴² Əkfän imumənän iket-däḡ-näsän iman-näsän i-a-wa tän-säḡren inəmмуšal, oharän ittus, tuzanän amənsi wa šäddijän n-tasäktot, təddalän Mässinäḡ.

⁴³ Təjjäš tuksəḡa n-Mässinäḡ tamətte iket-net, fäl-a-s tamašalän inəmмуšal tišušab d-ijitän n-Mässinäḡ äqqannen eḡäf.

⁴⁴ Änimätṭafän imumənän iket-däḡ-näsän jer-iman-näsän, əzzaḡän iyyän n-edägg, tihərən a-wa əṭṭafän,

⁴⁵ žänš'-en-in a-wa län dāḡ-ehäre, ad-tužanän älqim-net s-a-wa dār-ogdāhnät timḡutar n-hak iyyän dāḡ-sän.

⁴⁶ Äkoyädän hak ašäl s-iiyän n-ənniyät dāḡ-ažəmmäḡ dāḡ-təfärre n-ehän n-ämudd wa mäqqārän, tihərən imənsiwän dāḡ-ihānan-nāsän s-iman äddiwätnen; a-wa täjjän iket-net, il' əmmək,

⁴⁷ tiimələn Mässinäḡ, ässiimḡārən-tän äddinät iket-nāsän. Isawaḡ-dd Emäli hak ašäl fäll-älžamaḡät-nāsän äddinät wi iḡalläs.

3

Anäbdon wa äzozäyän inəmмуšal

¹ Ašäl iyyän, ikka Bəṭrus ehän n-ämudd wa mäqqārän, äddeew d-Exya i-ämudd wa n-tezzar.

² Älwäqq-wen-dāḡ daḡ, ad-dd-ämewäy s-əmm n-ehän n-ämudd wa s-itawänna: «Tihusay», ähaləs s-a-s dd-iwa-dāḡ ibdan. Hak ašäl dihen-dāḡ a t-sänsen äddinät-net i-ad-itattär takute dāḡ-äddinät wi dd-tajjjäšnen ehän n-ämudd.

³ Inhäy Bəṭrus d-Exya äbokän ujəš n-ehän n-ämudd ḡas, izzäl-asän äfuss.

⁴ Ikn'-e Bəṭrus d-Exya azəjjəzz təzzar, inn'-as Bəṭrus: «Əkən dāḡ-näḡ akäyad.»

⁵ Iknä dāḡ-sän ähaləs akäyad, ijar äṭṭäma n-ad-t-əkfən härät

⁶ mäšan, inn'-as Bəṭrus: «Wär leḡ oräḡ wäl' azrəf mäšan, a-wa leḡ, hakkäḡ-ak-t s-isəm n-ḲisaÄlmasex wa n-Näširät: əbdəd, ärjəš.»

⁷ Äshätäl-as-dd Bətrus s-äfuss-net wa n-aḡil, issebdäd-t. Iqqäl-dd äššahät idarän-net d-timzəzzəden-net ässaḡät-wen-däḡ;

⁸ ijä-dd tiyyät teggedt, irjäš, änmäjjäš dār-sän ehän n-ämudd, itaggäd a-wa-däḡ has-təja tedäwit, itiiməl Mässinäḡ.

⁹ Ənhäyän-t äddinät iket-näsän irjaš, itiiməl Mässinäḡ,

¹⁰ əzzäyän-t ḡas, ad-jannen: «Ak, wa wädden emädäl wa s-härkuk äqqiima dat-emm wa ähusken n-ehän n-ämudd wa mäqqärän.»

Ənhäyän a-wa däḡ-s ijän ḡas, äqqänän iḡäfawän-näsän, tof'-en täkunt n-a-wa ijän.

Iffəssär Bətrus i-tamətte älmäyna n-azuzi wa jän i-änabdon

¹¹ İltäḡ ähaləs-ənnin Bətrus d-Exya, unjäy fäw dār-sän ibḡa. Tošäl-dd tamətte iket-net s-edägg wa däḡ-əbdädän s-itawänna tisudaf n-ehän wa n-Suläyman, äḡläyḡäläyän-tän-dd äddinät tufa täkunt n-a-wa ijän.

¹² İnhäy Bətrus awnaf wa hasän-ämoosän ḡas, inn'-asän: «Käl-Işrayil, ma s-däḡ-näḡ təkyaḡäm s-əmmək-wa-däḡ šund a-s näkkäneḡ d-iman-nänäḡ, meḡ s-iqqud-nänäḡ dat-Mässinäḡ a-s näzozäy ähaləs-i-däḡ?

¹³ Mässinäḡ wa n-Ibrahim d-İsxaqq d-Yaqub, ənta-i n-Mässi-s n-abbatän-nänäḡ, ənta a idkälän s-älxurmät-net, akli-net Ḳisa-wa tästärmäsäm təzzar, täkkuddäläm-t dat-Bilatəs-i a-s itäj a-wen-däḡ, äbook ad-t-in-isəwwəyy mäšan,

14 kăwăned tăkkuddälăm Eməşşeddəj d-
Ămăyđal, təttărăm dăy-ămănokal ad-hawăn-dd-
isəwwəyy emăjj n-iman,

15 jăm iman n-ămănokal wa ihakkăn tămudre
măşan, issenkăr-t-dd Măssinăy jer-inəmmuttan,
năkkăned a-s tjuhawen-net.

16 Elmədät a-s s-tărna n-isəm n-Ŷisa d-təssəba
n-immun wa sār-s nəja, a făl hannăyăm əhaləs-
wa-dăy təzzayăm, har t-dd-iqqäl əşşahăt-net
data-wăn; immun s-isəm n-Ŷisa a əzozăyăn
əhaləs-i-dăy hannăyăm ibdăd data-wăn.

17 Ămăra ayətma-y, əssanăy a-s a-wa təjăm
kăwăned d-imizărăn-năwăn, əlzăhalăt a dăy-t
təjăm,

18 a-wa ijăn, a otas Măssinăy i-ad-isətbət a-
wa s-ăru d-ălölăyăn ənnăbităn dăy-isălan-net,
a-s ənnăn a-s Ălmasex, ad-inhəy ađăna təzzar
immukəl.

19 A-wa ənnăn, ijă, a-wen-dăy a făl əmăra,
mujrəzăt ibăkkadăn-năwăn, tutabăm i-ad-hin-
aməs Măssinăy ibăkkadăn-năwăn,

20 izəzzubbət-dd fälla-wăn išilan n-ălxer, i-ad-
hawăn-dd isuyəl Ŷisa-i n-Ălmasex əsnăfrăn-i s-
ămăra-dăy,

21 ih' isənnawăn har aşăl wa d-mad-isəynəy
Măssinăy hărăt iket-net, s-əmmək wa s-ăru
tăn-innă s-imawăn n-ənnăbităn-net wi n-
iməşşeddəjan.

22 Dăy-isălan n-a-wen-dăy, ad-inn' ənnăbi
Mosa:
<Ad-hawăn-dd-isəssiwəy Emăli Măssinăy
ənnăbi dăr-toharăm temiđt, dăr-i olăhăn,
săjdăt i-a-wa hawăn-e-ənn iket-net.

23 Ere unjäyän s-asjød-has,
ad-äbas äddiin dāḡ-tamøtte n-Mässinäḡ,
ämmätet.>

24 Ämära, ännäbitän iket-näsän, ḡur-Sumäyla
har wi t-dd-əšräynen, äloläyän iket-dāḡ-näsän
dāḡ-isälan wi s-hanāḡ-salläm nøttajj'-awän-tän
ašäl-i-dāḡ.

25 Käwäneḡ a-s iməkkusa n-ännäbitän-win-
dāḡ ed täkosäm ärkäwäl wa ohär Mässinäḡ d-
abbatän-nänäḡ ašäl wa d-innä i-Ibrahim:

<S-isəm n-əzzurəyät-näk a-s mad-ijjəš
älbäraka tiwsaten n-äkall iket-näsnät.>

26 Təssəba-näwän käwäneḡ, s-tizarät, a fäl
dd-issənkar Mässinäḡ akli-net, ḡisa Älmasex,
äšmašäl-t-dd sär-wän i-ad-dāḡ-wän äj älbäraka,
təḡḡəwäm d-erk imojjan-näwän.»

4

1 Ämmiijräd Bəḡrus d-Exya härwa i-tamøtte a-s
tän-dd-osän härät dāḡ-käl-tikutawen, äddewän
d-emännähäḡ n-ehän n-ämudd wa mäqqārän d-
käl-šadus.

2 Äsḡäf-tän asəḡär wa täjjän inəmмуšal i-
tamøtte ed, jannen i-äddinät a-s ḡisa Älmasex,
inkär-dd jer-inəmmuttan,

3 ärmäsän-tän, jän-tän dāḡ-takärmüt har
äffäw ed a-s itäjj a-wen-dāḡ, ijjaš-dd ehäḡ.

4 Omänän äddinät äjjootnen əslanen i-mäjräd
wa jän, a-wa ätubän dāḡ-ašäl-wen-dāḡ, iwwäḡ
səmmos afdän n-äwadəm.

⁵ Äffäw ƣas, əžžəmmäƣän-dd imizärän n-käl-Älyähud d-inušämän d-älƣulam n-Ättäwrät wi hänen Yärussälam

⁶ d-Hənnan wa n-ämänokal n-käl-tikutawen d-Qayäf d-Exya d-Älxađer d-käl-ehän n-ämänokal n-käl-tikutawen iket-näsän.

⁷ Əssəbdädän-dd Exya d-Bətrus jere-sän, ənnän-asän: «Käwäneđ, ma tämoos tärna d-isəm wa s-täjäm a-wa täjjäm?»

⁸ Äzzubbät-dd Unfas Šaddijän s-əššahät fäll-Bətrus əssaƣät-wen-däƣ, inn'-asän: «Imizärän n-käl-Älyähud, käwäneđ-i n-inušämän,

⁹ asəstan a hanäƣ-tajjäm ašäl-i-däƣ, däƣ-isälan n-a-wa ähusken ätwäjjan i-anəbdon d-əmmək wa s-iƣläs.

¹⁰ Nārha ad-təlmədäm iket-näwän, käwäneđ həkäl Işrayil wi iyyädnen a-s tärna n-isəm n-Ƴisa Älmasex wa n-Nəširät təšläbäm fäll-tajəttewt mäšan, issənkär t-dd Mässinäƣ jer-inəmmuttan, tärna-net ənta-en-däƣ a təzozäyät ähaləs wa hannäyäm ibdad data-wän.

¹¹ Ƴisa, ənta a-s təhunt ta hin-järäm

käwäneđ-i n-älbənnatän mäšan, tämoos-dd təhunt ta n-aƣmär fäll-insa ehän iket-net.

¹² Wār t-illa əlƣəllas ar s-isəm wa-net fäl-a-s wār t-illa isəm ikfa Mässinäƣ daw-işənnawän i-əlƣəllas n-däƣg-adəm säl wa-net.»

¹³ Islä älzəmaƣät i-əşşuhu n-mäjräd wa hasän-ija Bətrus d-Exya ƣas, tof'-en təkunt-näsän, ed jan-tän äddinät əžhalnen wären əƣra mäšan, əlmädän a-s Bətrus d-Exya, ämoosän inalkimän n-Ƴisa.

14 Darät-a-wen daḡ, anäbdon-wa izzäyän, ənta-da-däḡ ibdädän edes-hasän, äbas əssanän a mad-ənnən.

15 Əzzəzjārän Bəṭrus d-Exya ehän wa däḡ-ḡattäsän äššäreḡa iket-di d-tamänhayän əntäneḡ.

16 Däḡ-taḡimit-näsän, ənnän: «Wi äddinät, ma hasän-e-näj? Iji n-Mässinäḡ wa ijän, wär t-ihä äššäk ed əssanän sār-s käl-Yārussalam iket-däḡ-näsän, wär näddoobät akuddəl-net.

17 Ämära, i-ad-wär səməlsin isälan-wi-däḡ fäll-tamətte, nə səmmähədet fälla-sän i-ad-äbas ilkam ad-jan isälan n-isəm n-ḡisa i-äwadəm wäl' iyyän, olasän ḡas, ämminänhayän d-iman-näsän.»

18 Əssäḡrän-dd Bəṭrus d-Exya ḡarät-a-wen, äsmäqqän fälla-sän i-ad-äbas ilkam ad-äḡran wäla ässiḡrän isəm n-ḡisa i-äwadəm wäl' iyyän.

19 Äwwežäbän-asän, inn'-asän Bəṭrus d-Exya: «Əssənät käwäneḡ iman-näwän kunta ma ufän asjəd-hawän käwäneḡ, meḡ asjəd i-Mässinäḡ?

20 Däḡ-a-wa hanäḡ-dd-iqqälän näkkäneḡ, wär näddobät asusəm fäll-isälan nənhay, nəsl'-asän.»

21 Oläs älzämaḡät asəmmähəḡ däḡ-sän təzzar, oyyän-tän-in ed wär t-illa udlem fälla-sän əjrawän. Täqqäl-dd tamətte iket-net, tiiməl Mässinäḡ fäl təssəba n-a-wa ija.

22 Anäbdon-wa izzäyän, ähaləs ilan a okäyän əkkožät timərwen n-awätay.

Tittar ti jän imumənän ḡarät a-s dd-ätiwäyya Exya d-Bəṭrus

23 Ätwäyyän-in inəmмуšal ɣas, økkän imidiwän-näsän, øjän dāɣ-sän isälan n-a-wa ønnän imänokalän n-käl-tikutawen d-inušämän.

24 Ʒslän i-isälan-en-dāɣ ɣas, øtṭäfän iyyän n-emm, ad-tøddalän Mässinäɣ s-afälla, jannen: «Emäli, käyy a dd-ixläkän isønnawän d-äkall d-ejärew wa sømmän d-a-wa tän-ihän iket-net,

25 käyy a innän s-tärna n-Unfas Šäddijän s-emm n-abba-nänäɣ Dawød-i n-akli-näk:

«Ma dāɣ-ødgaznät tiwsaten?

Ma ijan äddinät dāɣ-a wären infa härät?»

26 Ma äsihälän imänokalän øššønju-näk, tihøren d-imännähädän emm fäll-Emäli d-Älmasex-net.

27 Itbat a-s ijäd Bunø Bilatø d-Harudø akli-näk Ʒisa Wa n-Emøššeddøj täsnäfränäd i-ad-umas Älmasex. Ohärän fälla-s emm øntäneḍ d-tiwsaten ti n-inøzzulam† d-käl-Išrayil dāɣ-Yärušsalam.

28 A-wen jän-t i-ad-itbat erhet-näk d-a-wa s-äru t-dd-täytäsäd.

29 Ämära Emäli, agøz-anäɣ dāɣ-äššar-näsän, tøkfeḍ eklan-näk ønniyät øzjan s-äxtäbän mäjräd-näk.

30 Ilal-anäɣ s-tärna n-äfuss-näk i-ad-nøzizuy äddinät, näj tikunen d-tišušab s-isøm n-akli-näk Ʒisa Wa Šäddijän.»

† 4:27 4:27 — Ʒur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-dāɣ a fäl tiwsaten ti iyyäḍnen iket-näsnät, ti n-inøzzulam. — Ašäl-i-dāɣ, änäzzalim, äkafär (ere wärän issen s-Mässinäɣ).

31 Diha-däx d-əssəmdän tamädilt n-Mässinäx, ad-äškädkäd edägg-wənnin-däx däx-äžžimmäxän, idnay-tän Unfas Šaddijän iket-näsän, ad-xatṭābän mäjrad n-Mässinäx s-ənniyät ozjan.

Tassayt ta t-təllät jer-älmässexitän

32 Iṭṭaf älzämaḡät wa n-imumənän iyyän n-ulh d-iiyän n-ənniyät, wär tän-iha fäw ere ijannen a-wa i-nin wäla a-wa i-nin, änn-ak tihərən a-wa län iket-net jer-iman-näsän.

33 Tajäyhen inəmмушал s-tärna täšsohet, xatṭābän i-äddinät tanākra-ta dd-ija Emäli Yisa jer-inəmmuttan, ässinsa daḡ Mässinäx ännuymət-net s-äššahät fälla-sän iket-näsän.

34 Wär tän-iha fäw ere ämiḡatārän s-härät, žänš'-en-in däx-sän wi länen išəkraš d-iḡānan,

35 tiwəyən-dd älqim n-a-wa tän-in-əžžənšän, sans'-en-t dat-inəmмушал i-ad-t-užanän jer-imumənän. Hak äwadəm, ijraw s-a-wa dār-ogdāhnät timḡutar-net.

36 Osä-dd Yusəf wa n-ahäya n-Lewi, il' äkall wa n-Qəbrus, ḡarrän-t inəmмушал s-isəm Bärnäbbas, a-wen älmäḡna-net: enəssesmäḡ n-talḡiwen. Ižžənša-hin ašəkrəš-net,

37 iwwäy-dd a-wa t-in-ižžənša, ikf'-e inəmмушал.

5

A-wa ija Änanyas d-hänne-s Säfiḡa

1 Däx-a-wen-däx a dd-iggäd Änanyas ənta d-hänne-s Säfiḡa, ižžənša-hin ašəkrəš-net

2 mäšan, änmännäk d-hänne-s fäll-ad-hin-ittef aYL n-älqim n-inäzzan-net, awöy-dd a-wa iyyädän i-inəmмуşal.

3 Osä-dd ƣas, inn'-as Bətrus: «Änanyas! Mafäl tøyöd Iblis itajj erk änniyät ogdähän d-a-wa-däƣ däƣ ulh-näk? Ma käy-isawännen bahu i-Unfas Şaddijän a-s hin-tatıäfad aYL n-älqim n-aşökröş-näk?

4 Mi käy-äshäşşälän inäzzan-net? Ajän wädden jer-inşa-hin wäla, i n-näk ƣas, täddobed ad-has-töjed a-wa s-tärhed. Ma dd-oräwän sär-k erk eşşäƣel-wa-däƣ? Elmöd a-s wädden dägg-adəm a-s tønned bahu, Mässinäƣ a-s tän-tønned.»

5 Islä Änanyas i-tifer-tin-däƣ ƣas, oða, eymädän-t iman. Ämoos a-wen isöksad i-äddinät wi eşlänen i-a-wen-däƣ.

6 Osän-dd härät däƣ-imawädän, eşsəlsän-in tafökka-net, eşglän där-s, ənbälän-t-in.

7 Okäy a iwwädän kärad ässaƣätän darät-a-wen ƣas, tosä-dd hänne-s n-Änanyas, wär tät-təha tijya n-a-wa ijän.

8 Təjjäş-dd ƣas, issəstän-tät Bətrus, inn'-as: «Şäfiƣa, läƣät-ahi, ak ajän älqim-wa-däƣ a-s hin-təžžənşäm aşökröş meƣ?» Tənn'-as: «Eyya!»

9 Inn'-as Bətrus: «Ma sär-wän dd-oräwän tanmənnakt şund-ta-däƣ, tiirəməm Unfas Şaddijän? Ənhöy adäriş n-äddinät wi s-iket hin-ənbälän əhaləs-näm, əqqalän-dd, əbdadän dat-əmm n-əhän i-ad-käm-awöyän kämm-däƣ.»

10 Todä älwäqq-wen-däƣ daw-ıdarän n-Bətrus, tämmüt ənta-däƣ s-iyvät. Ədkälän-tät

imawaḍän, əzkän-tät edes i-ähäləs-net.

11 Oräw-dd a-wen-däx taksädt-i-däx mäqqärät fäll-älkänisät iket-net d-äddinät wi iyyäḍnen əslänen i-a-wa ijän.

12 Əjän inəmмуšal ijitän n-Mässinäx d-härätän ässuksäḍnen äjjootnen dat-äddinät. Tažəmmaxän imumənän n-Ÿisa hak ašäl däx-ehän n-ämudd wa mäqqärän edes i-täfala ta s-itawänna ta n-Suläyman. Əknan tassaḡt, əṭṭafän iyyän n-emm,

13 wädden ere dd-iggädän-däx, ad-fälla-sän dd-iwwaḍ, ässiimḡärän-tän äddinät.

14 Tiwwaḍän-dd fälla-sän meddön d-tiḍeden äjjootnen omannen s-Emäli.

15 Tiwəyän-dd sär-sän äddinät imarhinän, säns'-en-tän fäll-isəftax däx-ittus n-ad-tän-täls kud-däx tele n-Bəṭrus afäl okäy, ed ere təlsa tele-net däx, ad-izzəy.

16 Təffalän-dd äddinät iḡärman wi ohäznen, tišələn-dd s-Yärussälam äwwayän imarhinän d-iməlšan, zizuyän-tän inəmmušal iket-däx-näsän.

17 Iggäd-dd ämänokal n-käl-tikutawen, osäm hullan ənta d-iyyäḍ sär-s oraknen n-taggayt ta təglät fäll-tidət n-iman-net, s-itawänna ta n-käl-sadus, änmännakän i-ad-əjrəwän əmmək s-äḡsädän härät i-inəmmušal.

18 Ästärmäsän-tän, əjän-tän däx-takärmüt ta mäqqärät.

19 Mäšan, osä-dd änjälos dd-äšimašäl Mässinäx s-ehäḍ, ora tishar n-takärmüt, izzəzjär-tän-dd təzzar, inn'-asän:

20 «Äkkät ehän n-ämudd wa mäqqārän, täxtəbäm i-tamətte isälan n-tämudre ta täxlälät.»

21 Ejan inəmмуşal a-wa hasän-ätwännän, ənşayän ehän n-ämudd wa mäqqārän ad-däx-s sayren äddinät. Älwäqq wa dd-osa ämänokal n-käl-tikutawen ənta d-äddinät wi sār-s oräknen, issäxrä-dd käl-Sinhidrin wi n-imizārän n-käl-Älyähud xəttäsnen äşşärexa, d-inuşämän n-käl-İşrayil wi iyyädnen, omārän s-ad-dd-ättälwäyän inəmмуşal däx-takärmüt.

22 Eglän əssärdusa mäşan wär tän-in-ogežän däx-səllul-näsän, əqqälän-dd, əjan isälan däx-älžämaḡät wa äqqimän, ənnän-asän:

23 «A-s hin-nosa takärmüt, ättubben imawän-net, əbdadän əssärdusa wi tät-äxläfnen däx-idäggan-näsän mäşan, älwäqq wa d-nora səllul, wär t-təha tiṭṭ.»

24 Islä kumända wa ännihädän däx-əssärdusa wi jänen ənniyät i-ehän n-ämudd wa mäqqārän d-ämänokal n-käl-tikutawen i-a-wen ḡas, äqqänän ixäfawän-näsän har äbas əssanän a mad-ənnən.

25 Osä-dd ämaway n-isälan, inn'-asän: «Meddən wi jäm däx-takärmüt, han ehän n-ämudd wa mäqqārän, sayren däx-s tamətte.»

26 Iggäd-dd kumända äddew d-əjhän n-əssärdusa, əlwäyän-dd inəmмуşal s-tiläqqad, ed äksudän ad-fälla-sän dd-təggəd tamətte əntäneḡ-en-däx, täkf'-en sämmäjori n-tihun.

27 Osän-dd ḡas, äşşojäşän-tän ehän wa däx-äqqiima äžämaḡät wa n-imänokalän. İdkäl

ämänokal n-käl-tikutawen mäjrad, innä i-inəmмушал:

²⁸ «Ajän wädden äru d-fälla-wän näsmähäd i-ad-äbas ilkam ad-tässiyräm äwadəm wäl' iyyän s-isəm-wa-däx? Enhöywät xas a-wa jäm ämära, tədkäräm-anäx Yärußälam iket-net teyäre-näwän, tärham daḡ ḡarät-a-wen, ad-hanäx-səwərəm iman n-ähaləs wa s-jannem.»

²⁹ Äwwežäb-asän Bətrus d-inəmмушал: «Ufa amişəl n-a-wa innä Mässiinäx uhən asjed i-a-wa jännen dägg-adəm.

³⁰ Mässi-s n-abbatän-nänäx, ad-dd-issənkärän ḡisa wa s-jäm iman-net a-s t-təşläbäm fäll-tajəttewt,

³¹ təzzar idkäl-t s-iman-net, äşxäym'-e daw-aḡil-net i-ad-immukəl, umas Ämaḡlas fäll-härät iket-net. A-wen ij'-e Mässiinäx i-ad-utabän käl-Işrayil, əjrəwän tenäşşe n-ibäkkadän-näsän.

³² A-wen, näjjəyh'-as iket-net, äjjəyh'-as daḡ Unfas Şaddijän-i ikfä äddinät wi tamaşalnen erhet-net.»

³³ Äfdändärräy älzämaḡät däx-älhäm a-s islä i-a-wen-däx, ad-tattärän əmmək s-tän-in-olämän fäll-ärori n-äkall.

³⁴ Kittəwän a-wen-däx a-s, dd-ibdäd jere-sän iyyän däx-sän la taggayt ta n-käl-faris s-isəm-net Gamälyäl, älḡalim äzizäbben alämär wa n-ännäbi Mosa a ämoos, tässiimḡär-t daḡ tamətte iket-net. Omär s-ad-zəzjärän inəmмушал i-härät n-ässaḡät təzzar, inn'-asän:

³⁵ «Käl-Işrayil, äjät ənniyät i-a-wa s-täbokäm ad-t-təjəm i-meddən-wi-däx;

³⁶ əktəwät-dd ɣas Tadi wa s-a ilan äzzäman dd-osa, iji iman-net härät dat-äddinät, äsläl ɖara-s a iwwädän əkkožät timaɖ n-awadəm məšan, wär-əhoja a-s ätwäjjän iman-net, əmmähäšan in-alkimän-net, äbä-dd isälan-näsän ɖarät-a-wen.

³⁷ ɖara-s daɣ, dəɣ-äzzäman wa n-tädint n-äddinät, osä-dd Yähudəs wa n-Galila, äsläl ənta-däɣ tamətte täjjeet ɖara-s məšan, ämmut ənta-däɣ, əmmähäšan inalkimän-net.

³⁸ Ämära, äyyät-ahi ad-hawän-äjäɣ äddäbara: əjmädät isälan n-äddinät-wi-däɣ, äkfät-tän äɣafyät, təyyəm-tän ad-əglun fäl-a-s tiyyät-i-däɣ, kunta a-wa tän-išlän, erhet n-ägg-adəm meɣ a dd-ifalän dägg-adəm, adiš, ad-t-in-iba

³⁹ məšan, kunta Mässinäɣ ad-dd-ifal a-wa tän-išlän, adiš, wär has-lem tärna. He käwäneɖ! Wär-itumaset a-s Mässinäɣ a där-tät-jam.» Äsjäd älzämayät iket-net i-äddäbara-wen-däɣ hasän-ija Gamäläl.

⁴⁰ Əssäɣrän-dd inəmмуšal, äswäjjän däɣ-sän tiwit s-ibärtäkän, äsmähäɖän däɣ-sän i-ad-äbas ilkam ad-ämmijrädän s-isəm n-Ÿisa təzzar, äswäyyän-tän-in.

⁴¹ A-s fälän inəmмуšal ehän-en-däɣ, əknan däɣ-tedäwit fäl tössəba n-turhajät ta tän-ikfa Mässinäɣ n-ad-ənhöyän erk əmmək šund wa-däɣ, däɣ-idəm n-Ÿisa.

⁴² Tažämmayän ɖarät-a-wen hak ašäl däɣ-ehän n-ämudd wa məqqärän, d-ihänan n-imumənän wi iyyäɖnen. Wär t-illa edägg s-wädden xatṭäbän däɣ-s, saɣren däɣ-s Älənžil n-ŸisaÄlmasex.

6

Issa inušămän wi ənnəfrännen

¹ Äzzäman-en, hak ašäl tiwwadän-dd imaksadän n-Mässinäḡ dāḡ-wi əlkammen i-ättäbeḡa wa n-käl-Älyunan† fäll-älžämaḡät wa n-imumənän. Dāḡ-a-wen-dāḡ, ad-ikka mäjrad jer-käl-Älyähud wi əzzäḡnen jer-käl-Älyunan d-käl-Älyähud wi sawalnen ḡäbranəyya. Ənnän wi n-käl-Älyunan, timəddun wi n-ḡäbranitän tinudäfen-näsän dāḡ-isälan n-tizunawen n-tadhəlt ta tajjän hak ašäl.

² Əssäḡrän-dd inəmмуšal wi n-märaw d-əssin tamətte ta n-inəṭṭulab, ənnän-asän: «Wär-änhäjja ad-näyy älxuṭbät n-isälan n-Mässinäḡ, näqqəl-dd nännuṭṭäf d-tizunawen n-imənsiwän.

³ A-wen-dāḡ a fäl, sənnəfrənät jere-wän əssa meddən ätiwäsämḡärnen, idnay Unfas Šaddijän n-iməssorha, ännuṭṭäfnen d-əššäḡəl-wen-dāḡ,

⁴ dihen, näkkäneḡ, ad-näkf iman-nänäḡ tamädilt n-Mässinäḡ d-älxuṭbät hak ašäl n-mäjrad-net.»

⁵ Ijräz äddäbara-wen-dāḡ i-älžämaḡät iket-net, innəfrän-dd Stifan,† a-wen ähaləs n-immun imdan, idnay Unfas Šaddijän d-Fəlibb d-Brukurus d-Nikanur d-Timun d-Bärmenas d-Nikola wa n-teje ta n-Intyuš s-käla ilkam i-äddin wa n-käl-Älyähud.

† **6:1 6:1** Itawann'-asän: Gərıktän. (Les Grecs dāḡ-Təfränsit). Əzzaḡän Erobbä dāḡ-äkall wa itawänna: Gəris (La Grèce dāḡ-Təfränsit). Tawalt-näsän: Tälyunanit. † **6:5 6:5** Jannen-as iyyäḡ: Älmuštafa.

6 Meddөн-wин-däx a dd-issəbdäd älžamaḡät dat-inəmмуšal, өттärän-asän s-Mässinäx təzzar, äswärän-tän ifassän-näsän, jän däx-sän älbäraka.

7 Ad-xatṭäbän өntäneḡ mäjräd n-Mässinäx, ti-jatän-dd fälla-sän hak ašäl imumөнän äynaynen däx-Yärussälam. Omänän fäw käl-tikutawen äjjootnen, ad-tamašalän өntäneḡ-däx, a-wa innä mäjräd n-Mässinäx.

Ajəyh wa ija Stifan dat-tamөtte

8 Stifan, ämoos ähaləs s-tidət-däx, fäll-ässinsa Mässinäx ännuḡmät-net d-tärna-net, itamašal härätän äqqannen eḡäf d-ijitän n-Mässinäx dat-tamөtte iket-net.

9 Eḡḡädän-dd meddөн ila ehän n-äddin wa n-käl-Älyähud s-itawänna «Idärfan», өntäneḡ d-iyyəḡ dd-falnen Qərwan d-Iskändərya d-tajiwen ti n-Silisi d-ti n-Azya, ad-tamäzaḡän d-Stifan,

10 mäšan indär-asän ad-t-siḡəwөн däx-mäjräd fäl tihusay n-särho wa t-ikfa Unfas Šäddijän.

11 Eḡlän, əžžənšän imawän n-äddinät iyyəḡ i-ad-t-səḡləmän, өnnän, əslan-asän har äskafar, innä däx a läbasän fäll-ännäbi Mosa d-Mässinäx.

12 Entäjän-dd s-a-wen-däx tamөtte d-imizärän-net d-älḡulam n-Äṭṭäwrät. Wäla a hin-ijrah Stifan a-s fälla-s oḡän äddinät, əwwäyän-t s-käl-Sinhidrin wi n-imizärän n-käl-Älyähud ḡattäsnen äššərəḡa.

13 Äwwäyän-dd däx tijuhaben n-bahu өnnänen: «Ähaləs-i-däx, wär käla okäy ašäl

d-wär-innä a läbasän fäl ehän n-Mässinäx wa şaddijän d-alämär wa n-Mosa.»

¹⁴ Təhhadän, jannen: «Ijmaḍ-t äşşäk a-s nəsl'-as har innä a-s ilkam, ad-ärz Yisa wa n-Näşirät ehän n-ämudd wa mäqqārän, isəmməskəl älyadatän wi hanäx-dd-oyya ännäbi Mosa.»

¹⁵ Iqqäl-dd älzämayät iket-net äsibäläläx dəx-Stifan, iqqäl-dd sār-sän a-s änjalos a dəx-ökyadän fäl tihusay-i-däx dd-ija idəm-net.

7

Älxuḫbät wa ija Stifan i-käl-Älyähud i-ad-tändd-isəktəw a-wa innä Mässinäx

¹ Issəstän ämänokal n-käl-tikutawen wa mäqqārän Stifan† darät-a-wen, inn'-as: «Käyy, a-wa ätwännän fälla-k, ak tidət meḫ bahu?»

² Inn'-asän Stifan:

«Ayətma, abbatän, säjdät-ahi: Mässinäx-i ilän älxurmät iket-net, ənta a dd-änfalälän i-abba-nänäx Ibrahim härwa izzaḫ äkall wa n-Mizəbbuḫamyä, härwa wär dd-iddek äkall wa n-Haran.

³ A-s has-dd-änfaläl Mässinäx, inn'-as:
 <Əfəl äkall-näk d-imärawän-näk, tähanəd s-äkall wa käy-mad-säknäx.>

⁴ Ähona ya Ibrahim, ifäl äkall wa n-Käldäyän, iddäk wa n-Haran.

⁵ Äba abba-net dihen ɣas, inn'-as Mässinäx, ad-ähän s-äkall-wa-däx, təzzaḫäm ašäl-i-däx. Äkall-en, wär dəx-s ikfa Mässinäx Ibrahim täkasit n-wäla edägg dəx-ässinsa aḍär-net

† 7:1 7:1 Jannen-as iyyäḍ: Ämuştafa.

măşan, ijjăş-as ârkăwâl n-ad-t-âkf âkall-en-dăḡ
 ɔnta d-ihăyawăn-net. A-s has-ijănna Măssinăḡ
 a-wen-dăḡ, wâr-ila Ibrahim ara.

⁶ Inn'-as Măssinăḡ äzzăman-en:

<Ihăyawăn-năk ad-umasăn imăjarăn dăḡ-âkall
 wâr len,
 ad-âkkălen, ɔnhøyăn aḡăna har ɔkkoḡăt timad
 n-awătay

⁷ măşan, ad-hasăn-ɔkkəsăḡ tekăriḡt,
 ɔşrăḡăḡ âkall-en tăn-âskălen,
 zəzjărăḡ-asăn-t-dd, âḡbədăn dăḡ-edăgg wa-dăḡ
 tăn-ɔkfeḡ.>

⁸ Ijjăş Măssinăḡ ârkăwâl n-tassayt i-Ibrahim,
 ârkăwâl-en, amili a-s tamătart-net. A-wen-dăḡ
 a fâl ikrăş Ibrahim Isxaqq, âsmalăy-t aşâl wa s-
 ɔttam; a-wen-dăḡ daḡ a ija Isxaqq i-rure-s Yaqub,
 ij'-e daḡ Yaqub i-məddana-s wi n-măraw d-ɔssin
 i n-imḡarăn n-imăzzaḡăn n-tiwsaten-nănăḡ ti n-
 mărawăt d-sănatăt.

⁹ Osămăn ḡarăt-a-wen məddana-s n-Yăqub wi
 n-imḡarăn n-imăzzaḡăn fäll-Yusəf-i n-ăḡḡa-săn,
 ɔżżənşăn-t-in i-ad-âkkălăt dăḡ-Mişra măşan,
 issăn Măssinăḡ dăḡ-Yusəf dăḡ-âkall-wen-dăḡ.

¹⁰ Wâr t-illa erk ɔmmək dăḡ-wâr t-dd-ikkəs
 Măssinăḡ, issənsă fälla-s ännuḡmăt-net d-sărho
 i-ad-ikrəş idəm dat-Firḡăwna-i n-ămănokal n-
 Mişra-i has-ijăn taflest-ta-dăḡ fâl t-ăsmănakăl
 dawa-s fäll-âkall d-a-wa ihăn eḡewən-net iket-
 net.

¹¹ Dăḡ-a-wen-dăḡ a dd-oḡa laḡ lăbasăn fäll-
 Mişra d-Xăna, âmḡatărăn äddinăt hullan har
 âbas ɔḡtafăn imărawăn-nănăḡ a ɔkşăn.

12 Isla Yaquub a-s ih' ɵttäxam Mişra xas, äşmaşäl sär-s mөddana-s wi hanäx-äshäyawnen.

13 Osän-dd, əqqälän, šämad dd-jan asikəl wa s-əssin a tän-äzozäy Yusəf iman-net, ilmäd day Firxäwna s-a-wen-däx, tumast n-Yusəf.

14 Ässotär Yusəf ti-s d-imärawän-net iket-näsän, ämoos a-wen-däx əssayät timərwen n-äwadəm d-səmmos.

15 Iddäk-dd ya Yaquub Mişra, äba-t day dihen-däx ənta d-imärawän-nänäx wi hanäx-äshäyawnen.

16 Əmmөdkäl nät tifəkwen-näsän darät tamättant-näsän s-axrəm wa n-Sišäm i-ad-ənbəlän dihen däx-təfärre ta ižžənša Ibrahim fäll-mөddana-s n-Hämmär däx-Sišäm.

17 A-s dd-täwwäd täqqän n-ärkäwäl wa ijjäš Mässinäx i-Ibrahim, təkna tamөtte-nänäx əjut däx-Mişra.

18 Inäy-dd äzzäman-en Firxäwna äynayän wärän izzey Yusəf.

19 Ijjäš sär-näx erk älxal, issəknä tumast-nänäx ašana, ijä a wärän ijrež i-imärawän-nänäx, äsmädräy-tän hullan s-älxidmät wa däx-tän-ijä, iglä däx-tälläbäst-net har hasän-innä ad-hin-əndəwän aratan-näsän wi n-eyyan i-ad-ämmätän.

20 Äzzäman-en-däx ad-iwa Mosa-i ikräšan idəm dat-Mässinäx; kärađ orän xas a jän imärawän-net ɵttafan-t, təzzar, äshäššäl-tän a-wa inna Firxäwna täbөddawt dār-s.

21 Järän-t-in xas, tökkөmät-t-dd elle-s n-Firxäwna, təj'-e-hi-dd s-iman-net, təj'-as asədwal

wa mad-täj i-ara n-täsa-net.

²² Ämoos Mosa ere iḡran dăḡ-təlyuləma d-musnät wa n-käl-Miṣra, ikf'-e Mässinäḡ äṣṣahät dăḡ-mäjräd hakd dăḡ-timašalen.

²³ Ikräš əkkozät timərwen n-awätay ḡas, ijjäs-t-dd ənniyät n-ad-äkk ayətma-s wi n-Iṣrayil, idhəl-tän, əntäneḡ-i n-tumast-net.

²⁴ Ašäl iyyän, inhäy iyyän dăḡ-sän isalmaḡ u-Miṣra t-irnan ḡas, ohăḡ-as tinahăḡen, ijä iman n-wa n-u-Miṣra.

²⁵ Äḡel afäl ija a-wen, ad-əjrähän ayətma-s a-s Mässinäḡ a t-dd-äšmašälän sār-sän i-ad-tän-ikkəs dăḡ-əkkəlu wa hän mäšan, wär əjrehän a-wen.

²⁶ Ašäl wa ilkamän i-wen, inhäy əssin meddən n-käl-Älyähud əknasnen, ittär ad-äkk jere-sän, ibdəw-tän, əjən älxer. Inn'-asän: <Imidiwän, käwäneḡ wädden ayətmatän a tämoosäm, mafäl tinməjjim a läbasän jer-iman-näwän.>

²⁷ Iggäd-dd sār-s wa irnän, imhəl-t-in, inn'-as: <Käyy, mi käy-ijän ämizär d-älqall-i-hanăḡ,

²⁸ əyya, a tärhed ad-hi-tänḡəd šund a wa jed i-u-Miṣra wa s-jed iman-net əndəšel.>

²⁹ Islä Mosa i-mäjräd-wen-dăḡ ḡas, irmăḡ, äjewäd älwäqq-wen-dăḡ s-äkall wa n-Mädyan, izzăḡ, ädobän ya dihen-dăḡ, ikräš əssin ilyadän.

³⁰ Šämad okaynät əkkozät timərwen n-awätay ad-has-dd-änfaläl änjälös n-Mässinäḡ dăḡ-tenere fäll-aḡay wa n-Säynay dăḡ-tabsäḡt ta tähijäljälät wär räqq.

³¹ Täqqän tänäfalilt-ta-dăḡ ihannäy eḡäf-net, iknä-dd ihəz n-tabsäḡt i-ad-ikən asənnəfli dăḡ-a-

wa ihannäy mašan, izjār-tät-dd emäsli n-Emäli has-innän:

³² <Näkk a-s Mässinäx n-imxarän wi käy-äshäyawnen, näkk a-s Mässinäx wa n-Ibrahim d-Isxaqq d-Yaqub.>

Ihä-dd xas Mosa äšikädkäq a-wa-däx has-ja tarəmməxt har äbas ihäl wäla-däx ad-idkəl idəm-net, ikyəd.

³³ Inn'-as Emäli daḡ:

<Əkkəs tifädelən-näk fäl-a-s edägg wa däx-təbdadäd, edägg šaddiijän,

³⁴ ənhäyäx tisanant ta tärmäsät tamətte-nin däx-Miṣra,

əsley i-tihnəffa-näsän,

a-wen-däx a fäl dd-äzzubbəx i-ad-tän-səddärfəx.

Ämära, əgləw, käyy a he-šəmməsäläx s-äkall wa n-Miṣra.>

³⁵ Wädden hannäyäm a-s Mosa-wa-däx äkkuddälän a-s has-ənnän: <Mi käy-ijän ämizär d-älqalli-hanäx?> Ənta-en-däx a dd-äšmašäl Mässinäx i-ad-izar i-käl-Işrayil, isəddärf'-en-dd s-tärna n-änjälös wa has-dd-änfalälän däx-tabsäxt ta tähijäljälät wär räqq.

³⁶ Ənta-en-däx a tän-dd-izzəzjārän Miṣra itajj s-tärna n-Mässinäx härätän äqqannen eḡäf d-ijitän n-Mässinäx har əjläyän ejärew wa səmmän šəggäxän, əjän qarät-a-wen əkkozät timərwen n-awätay ähonän däx-tenere.

³⁷ Mosa, ənta a-s kälä innä i-käl-Işrayil: <İlkam ad-sär-wän dd-işəmmişəl Mässinäx ännäbi dār-i olähän, ännäbi dār-wän oharän temiḡt.>

38 Ǝnta-en-däx day a ibdädän däx-tenere ta n-Säynay jer-änjälös wa has-ämmiijrädän fäll-afälla n-aḍax wa n-Säynay d-tamøtte, ikf'-e Mässinäx mäjräd wa ihakkän tämudre i-ad-hanäx-t-dd isəssiwäd

39 mäšan, unjäyän abbatän-nänäx s-asjød-has, äşxärän-as ulhawän-näsän, ənnädän fälla-s, ad-sadärhanän uxəl n-Mişra-i dd-əzjärän.

40 Däx-a-wen-däx, a dd-təggäd tamøtte s-Harun, tənn'-as:

<Äj'-anäx imälän äynaynen ärjäšnen data-näx fäl-a-s

Mosa wa hi-hanäx-dd-izzəzjärän Mişra, äbas nəssan a ija.>

41 Ǝşşəwwärän-dd darät-a-wen i-iman-näsän ehädäl n-oräx, ad-tajjän tikutawen i-äşšanäm wa jän s-ifassän-näsän, ad-t-ğabbädän, tiimələnt, sänkarän izəjraz d-isudal dat-a-wa dd-əknän ifassän-näsän.

42 Ǝssəksänän iman-näsän Mässinäx s-a-wen-däx tän-işlän, oyy'-en ənta-däx s-äşšanäm-näsän d-älğibadät wa täjjän i-ajhanän wi n-işənnawän: täfukt, ewär d-etran; ämoos a-wen a ässiitbätän a-wa innä ännäbi Ǝämmosa† a-s inna däx-əlkəttab-net, innä Mässinäx:

<Ya käl-Işrayil!

Ǝkkozät timərwen n-awätay a jäm däx-tenere, ɣarräsäm i-taxsiwen, təkkatäm-tänät, ak ässistänäx-käwän, ajän näkk a-s tänät-kätäm?

† 7:42 7:42 A-wa ännäbi äloläyän däx-isälän n-Ǝisa, a okäyän səmmosät timad n-awätay dat-tiwit-net.

43 Wädden ehäket n-äššanäm wa s-isəm-net
Molax

d-atär wa s-isəm-net Rufan-i jäm emäli-näwän,
tahanem där-s siha d-siha, a-s tənät-kätäm,
täqqäläm-dd ḡabbädäm-tän.

Däḡ-tössəba n-a-wen-däḡ tämešäläm

a fäl mad-ärzən käl-Bäbilun äkall-näwän,
täkkälem däḡ-ikallän wi hasän-in-əllanen.>

44 A-s hän imḡarän-nänäḡ tenere, əṭṭafän ehäket
wa n-tämuqqest n-Mässinäḡ ämoosän tajuhe i-
ärkäwäl n-tassayt wa ijjäš Mässinäḡ i-Mosa a-s,
has-innä, ad-ikrəs ehäket-en s-əmmək wa s-has-
omär s-a-wen.

45 Ehäket-en, togäz-t-dd əzzurəyät ta hasän-
təlkämät har äzzäman wa d-hasän-əzzar Yešwa,
əjjäšan d-ehäket äkall wa tän-ikfa Mässinäḡ,
ohäḡän däḡ-əddəwəlän wi iyyädnen; əṭṭafän
ehäket-en däḡ-äkall-en-däḡ har äzzäman wa n-
Dawəd-i

46 ijrāwän idəm d-ännuḡmät dat-Mässinäḡ.
Ənta-en-däḡ a ittärän däḡ-Mässinäḡ turhajät n-
ad-isəkrəs ehän i-Mässi-s n-Yaqub

47 mäšan, turhajät-ten-däḡ, Suläyman-i n-rure-s
n-Dawəd a tät-ijrāwän.

48 Ikrəs ehän-en mäšan, issəlmäd-t Mässinäḡ s-
härät iyyän,

49 inn'-as Emäli:

<İšənnawän a-s tasäqqaymut-in,
äkall a-s isəkkukal n-ıdarän-in.

Ma ämoos ehän wa s-täddobem
a hi-t-tədəyəm i-ad-hi-awəy, sunfäḡ däḡ-s?

50 Ajän wädden äfuss-in a dd-ixläkän härät iket-
net.> »

⁵¹ Oläs daḡ inn'-asän Stifan: «Ya meddөн-i-däḡ n-iḡäfawän äqqurnen n-ulhawän wären ätub s-äṭṭubbätnät timəzzujen-näsän, tunjayäm s-Unfas Šaddijän šund a-wa jän abbatän-näwän,

⁵² ijmaḍ-t äššäk a-s a-wa əjän abbatän-näwän ḡas a käwän-išlän käwäneḍ-däḡ, wär t-illa ännäbi s-wädden äqquzzäben-t, jän iman n-wi hasän-äloläynen n-a-s ilkam a dd-ass wa n-iiyän n-Ämaḡdal äsnäfrän Mässinäḡ, töttäläläm-tän käwäneḍ-däḡ ed tössäḡdäräm-t ənta-däḡ təzzar, täḡäm-t kərəf,

⁵³ äzzäbbät-dd Mässinäḡ fälla-wän alämärän-net, əmməjrädän-awän sār-sän änjälosän mäšan, tunjäyäm s-asjəd-hasän.»

Tamättant n-Stifan

⁵⁴ Islä ämänokal n-älžämaḡät wa iḡattäsän äššäreḡa i-a-wen-däḡ ḡas, ad-isamädad ənta d-äddinät-net, zımkärkəwezän isenän, fäll-älhäm-i-däḡ mäqqārän tän-ijjäšän fäll-Stifan.

⁵⁵ Ənta älwäqq-wen-däḡ, iḍnäy-t Unfas Šaddijän, iḍkäl asäwaḍ-net s-išənnawän, inhäy älxurmät n-Mässinäḡ d-ḡisa ibdad daw-aḡil n-Mässinäḡ.

⁵⁶ Iḍkäl eməsli-net älwäqq-wen, innä i-älžämaḡät: «Säjdät, ənhəywät išənnawän, ämerän, ibdad Ägg-ägg-adəm daw-aḡil n-Mässinäḡ.»

⁵⁷ Əslän i-a-wen ḡas, äšḡäyyän däḡ-išənnawän, härän timəzzujen-näsän, ošälän-dd šund iyyän n-äwadəm sār-s iket-däḡ-näsän, oḍän fälla-s,

⁵⁸ äšräwräwän-t har dār-s əzjārän aḡrəm, ad-t-hakkän sämmäjori n-tihun har t-änḡän kərəf.

Äddinät wi jänen a-wen-däḡ, ämawaḡ s-sisəm-net Sawəl a əssäḡläfän isəlsa-näsän təzzar äšewäjän s-Stifan.

⁵⁹ Hakkän-t sämmäjori n-tihun wär dd-išrey, itəddal ənta Mässinäḡ, ijanna: «Emäli Үisa, ässiḡläfäḡ-käy iman-in.»

⁶⁰ Irkäḡ ḡarät-a-wen, iḡkäl eməsli-net s-afälla, innä: «Emäli, wär tän-täswäräd abäkkad-wa-däḡ.» Innä a-wen-däḡ ḡas, əjmäḡän-t iman.

8

Älyzabät d-amšändu n-imumənän äzzäman-wen-däḡ

¹ A-wa ijän ašäl-wen-däḡ iket-net issan-as Sawəl härät, iqqäs i-tamättant ta ija Stifan.† Үur-ašäl-wen-däḡ, ad-intä älyzabät səmmän fäll-älkänisät ta төһät Үärussälam, əmmähäšan imumənän däḡ-tajiwen ti n-Älyähudəyät d-Sämari, inəmмуšal ḡas a dd-äqqimänen däḡ-Үärussälam.

² Osän-dd meddən äddinnen, əštärän-in Stifan, əṭṭäfän iba-net däḡ-tisnant.

³ Iggäd-dd Sawəl däḡ-a-wen-däḡ, ad-itammäḡ i-əmmək s-hin-oläm älkänisät edägg t-təlla-däḡ, wär t-illa ehän wär-ijješ, isatärmas äddinät wi omänneren s-Үisa jer-ämoosän meddən wäla tiḡeḡen, itəjjar-tän-in däḡ-tikärmuten.

Älxuṭbät wa ija Fəlibb däḡ-Sämari

† **8:1 8:1** Jannen-as iyyäd: Ämuštafa.

4 Imumənän wi dd-əzjärenen Yärussälam, əmmähäšan ɣas, ällilän äkall iket-net, xaṭṭābän Älənžil i-äddinät.

5 Däɣ-a-wen-däɣ ad-ikkä Fəlibb aɣrəm iyyän ihan teje ta n-Sämari ad-däɣ-s ixaṭṭāb i-tamətte isālan n-Älmasex.

6 Sajadän-as äddinät äjjootnen s-ijraz məjräd wa itäj d-ijitän n-Mässinäɣ wi itamašal data-sän,

7 itakkäs alšinän naḍḍāwnen iɣāran däɣ-äddinät, izizuy daɣ inaɣyabän d-inəbdan äjjootnen.

8 Ja tedāwit məqqoorät däɣ-aɣrəm-wen-däɣ.

9 Izzaɣ dihen ähaləs n-emässäxär s-isəm-net Simon, ämoos a-wa itäj awnaf i-käl-Sämari, ässimɣär iman-net hullan,

10 əltaɣän-t wi mədroynen hagd wi wäššarnen, jannen fälla-s: «Wa ähaləs, tärna ta tojārät n-Mässinäɣ a iṭṭaf.»

11 Ełtäɣän-t ya äddinät äjjootnen däɣ-təssəba n-əssäxär wa itäj, itaqqän iɣäfawän-näsän.

12 Inhäy Simon a-s omänän äddinät s-Älənžil wa hasän-ixaṭṭāb Fəlibb fäl Təmmənəya n-Mässinäɣ d-Ŷisa Älmasex ɣas, ad-titwəsəlmiɣän meddən hagd tiḍeḍen däɣ-aman,

13 omän ənta-däɣ, ätwäsälmäɣ däɣ-aman. İltäɣ ya Fəlibb qarät-a-wen fäl təssəba n-ijitän n-Mässinäɣ d-tikunen ti s-t-ihannäy itajj'-enät, äqqännen eɣäf-net ənta-däɣ.

Ajäraw wa jän käl-Sämari i-Unfas Šäddijän

14 Ʒslän inəmмуšal wi hänen Yärussälam a-s käl-Sämari-däx omänän s-mäjräd n-Mässinäx xas, äšmašälän-dd sär-sän Bəṭrus d-Exya.

15 Ʒwwäḏän-in xas, dälän Mässinäx i-add-izəzzubbət Unfas Šäddijän fäll-äddinät wi ätubnen dihen

16 ed, dat-a-wen-däx, wär tän-iha-i fäll-dd-äzzubbät Unfas Šäddijän, atwəsəlmaḡ xas a ätwäjjän däx-aman s-isəm n-Emäli Ʒisa.

17 Äswär-tän Bəṭrus d-Exya ifassän-näsän, äzzubbät-dd fälla-sän Unfas Šäddijän.

18 Inhäy Simon a-s šämad tän-äsiwäran inəmмуšal ifassän-näsän, ad-fälla-sän dd-äzzubbät Unfas Šäddijän xas, ittär ad-tän-äkf azrəf, ijann'-asän:

19 «Äkfät-ahi näkk-däx tädabit-ta-däx i-ad-umas a-s ere äswäräx ifassän-in näkk-däx, ad-fälla-s dd-izzubbət Unfas Šäddijän.»

20 Inn'-as Bəṭrus: «Təkšäfäd, käyy hakd azrəf-näk ed torded a-s a-wa ikfa Mässinäx bännan, täddoobed azənš-net.

21 Šämad käyy ənniyät-näk da-däx, əlməd a-s a-wa ijän, äbas t-iha folät-näk ed ifraḡ ulh-näk dat-Mässinäx.

22 A-wen-däx a fäl utab däx-amsud-näk iket-di, tədäläd Emäli kunta ämmukkän a-wen, ad-hak-änš erk ənniyät wa innähäḏän däx-ulh-näk

23 ed, hannäyäx a-s ulh-näk, wär-idney a säl tälläbäst d-iba n-iqqud.»

24 Äwwežäb Simon, inn'-asän: «Ʒttärät-ahi-in käwäneḏ-di-däx däx-Emäli i-ad-wär hi-irəmməs a-wa s-tənnäm.»

25 Äjjöyhän inəmмуšal, äxtäbän mäjrad n-Emäli i-äddinät äjjootnen təzzar, əqqälän Yärussälam. Däx-asikəl-näsän, tajjän isälan n-Älənžil däx-tidbi äjjootnen n-Sämari.

*Mənistär n-Ityobyä wa omänän s-Ÿisa
Älmasex*

26 Imməjrad ɗarät-a-wen ənjalos n-Emäli i-Fəlibb, inn'-as: «Fəlibb, tärur, təjəd tabarät ta fälät Yärussälam təkka Gaza ed wär däx-s əjjötän iməssukal ämära-däx.»

27 Iglä, wär-ähoja a-s ähaləs iyyän n-ämudäš n-minəstär-da-däx, ənta a ännihädän däx-a-wa la Kändas ta n-tämänokalt n-äkall wa n-Ityobyä. Ähhujjäjj-dd ənta-däx s-Yärussälam i-ad-däx-s ixbəd Məssinäx.

28 Issəmda ähujjəj ɣas, iqqäl äkall-net däx-turäft-net əlwayän ibəjwan. Äsookal minəstär-di iɣarr əlkəttab wa n-ännäbi Saya† a-s ɗär-s ämmuqqäs Fəlibb.

29 Innä Unfas Šəddijän i-Fəlibb ad-hin-ahəz turäft-net.

30 Ošäl Fəlibb har ɗär-s ämsadäx, isl'-as iɣarr əlkəttab wa n-ännäbi Saya ɣas, inn'-as: «Ähaləs, ak a-wa ɣarräd, təjrahäd älmäxna-net meɣ?»

31 Inn'-as ähaləs: «Əndek a-wa he-äjäx əjrähäx-t a-s wär t-illa ere hi-t-iffəssärän.»

32 Äsnäy-t-dd ähaləs edes-has ad-has-iɣarr edəgg wa däx-iktäb a-s:

«Oläh ɣas d-tixse tättilwäyät s-asäxərəs,

† **8:28 8:28** A-wa ännäbi dd-äzzarän i-Ÿisa, äloläy däx-isälan-net əssayät timad n-awätay dat-tiwit-net.

oläh d-takəndəmt s-təllasän äddinät,
wār t-illa eməsli dd-izjarän emm-net,

³³ immədräy bännan,

wār has-ätwäjjä äššäreya wa dār-äniihäjja.

Mi s-ilkam ad-dd-iḍkal isālan-net ihāyawān-
net

ed tärza taḡrəst-net dəḡ-äddunya?»

³⁴ Issəstän ähaləs wa n-ämudäš n-Ityobya Fəlibb,
inn'-as: «Läḡät-ahi, mi s-iha ännäbi ti-net dəḡ-
edägg-wa-däḡ? Ak iman-net a dəḡ-ämmijräd
meḡ isālan n-ere s-ilkam ad-dd-ass a-s iha ti-
net?»

³⁵ Irmäs-as-dd Fəlibb tifer-ti-däḡ, ad-has-
itafässar a-wa inna Älənžil n-Ḳisa.

³⁶ Eḡlan har dd-əkkän edes i-edägg han aman
ḡas, inn'-as ähaləs wa n-ämudäš: «Aman da, ma
igdalän ad-ətwəsəlmäḡḡ?» [

³⁷ Inn'-as Fəlibb: «Amən ḡas s-ulh imdan.»]
Inn'-as ähaləs wa n-ämudäš: «Omanḡ a-s Ḳisa
Älmasex a-s Rure-s n-Mässinḡ.»

³⁸ Omär älwäqq-wen-däḡ i-ad-təbdəd turäft,
ijjäš dār-s Fəlibb aman, issəlmäḡ-t.

³⁹ Diha-däḡ dd-əzjarän aman ad-iḍkäl Unfas
n-Emäli Fəlibb, wār t-oles ämudäš-ənnin-däḡ
ahānay, iglä ənta dəḡ-zäbo-net, ikna tedäwit.

⁴⁰ A-s hin-ijräh Fəlibb iman-net ḍarät-a-wen,
iha äkall wa n-Ašdud, ifäl dihen, ikk' aḡrəm
wa n-Qäyšara. Tadäbayt immär-däḡ, ad-däḡ-s äj
isālan n-Älənžil.

9

Tätubt n-Sawəl
(Ijitän 22:6-16; 26:12-18)

¹ Äzzäman-en-däx, a dd-iggäd Sawəl, isamädad, isamähađ, wär t-illa anəzjum ila sāl wa n-iji n-iman n-inəttulab n-Ÿisa. Däx-isālan n-a-wen-däx a däx-ikka ämānokāl n-kāl-tikutawen

² i-ad-t-äkf tikarđiwen issəknä däx-ihānan n-äddin wi n-kāl-Älyāhud hānen Dämaşāq i-ad-ijrəw s-asəttärməs n-e d t-illām ere ällilān tabarät-ten-däx n-Emāli, jer-āhaləs wāla tamäđt, i-ad-t-dd-awəy däx-tişəm s-Yārussālam.

³ Äsookāl Sawəl däx-a-wen a-s hin-ohāz ayrəm wa n-Dämaşāq. A əndārrān, ämlāwlaw ännur-i-däx äşsoohen dd-ifalān išənnawān;

⁴ ihā-dd ođa, isl' älwäqq-wen-däx i-emāsli has-innān: «Sawəl, Sawəl, ma kăy-orāmān sār-i tişəzzəbud-ahi?»

⁵ Inn'-as Sawəl: «Mi tämoosäd Emāli?» Inn'-as Emāli: «A-wa näkk Ÿisa wa tişəzzəbud, ad-hak-indār amzəzəzaj dār-i hārkuk.

⁶ Ämära, əbdəd, əjjəş ayrəm wa n-Dämaşāq, ad hak-itwənn dihen a-wa s-led s-ad-t-təjəd.»

⁷ İqqālān-dd ɣas meddən wi äddewnen d-Sawəl oran imawān, äbas əssanān a he-ənnən ed əslan i-emāsli-wənnin-däx māşan, wär t-illa ere hannāyān.

⁸ İbdād Sawəl dārät-a-wen fäll-iman-net, ittār ad-arr tiŧtawen-net māşan, wär t-illa a ihannāy. Əlwāyān-t imidiwān-net har dār-s əjjāşān ayrəm wa əkkān.

⁹ İja kārāđ išilan dārät-a-wen dārɣal, wār-ikša, wār-iswa.

¹⁰ Ayrəm wa n-Dämaşāq, ih'-e änätŧalib n-Ÿisa s-isəm-net Änanyas, änfalāl-as-dd Mässināx,

inn'-as: «Änanyas!» Inn'-as Änanyas: «Näkk da Emäli.»

¹¹ Inn'-as Emäli: «Äkk täšarrit ta s-itawänna <ta toḡädät>, tøjješäd ehän wa n-Yähudəs, səstənäd d-ähäləs n-taḡrəmt ta n-Tarša s-isəm-net Sawəl.» A-s itäj a-wen-däḡ, itəddal Sawəl Mässinäḡ,

¹² änfaläl-as-dd däḡ-a-wen-däḡ a-s ikk'-e-hidd ähaləs s-isəm-net Änanyas-i t-madän-isəwär ifassän-net i-ad-t-dd-iqqəl ahänay-net.

¹³ Innä Änanyas: «Emäli, əsley a äjjeen fäll-ähäləs-i-däḡ, əlläḡen-ahi äddinät äjjootnen erk əmmək wa issəkna iməššeddəjän wi hānen Yārussālam,

¹⁴ wāla Dāmašāq-i dd-ikka, ikk'-et-dd äwway tikarḡiwen t-dd-əkfan imänokalän n-käl-tikutawen has-əjrawnen ad-isəttärməs e d t-illäm ere iḡarrän isəm-näk.»

¹⁵ Inn'-as Emäli: «Əḡləw, ähaləs-di, näkk a t-äsnäfränän i-ad-awəy isəm-in, isəlməd tiwsaten ti n-inəzzulam† d-imänokalän d-käl-Işrayil a-wa ämoosäḡ,

¹⁶ ad-t-säknäḡ aḡāna wa mad-inhəy däḡ-təssəba-nin.»

¹⁷ Igl' Änanyas, ikk' ehän wa s-has-ätwänna ih'-e Sawəl, os'-in, äswär-t ifassän-net, inn'-as: «Äḡḡa-ḡ Sawəl, Emäli ḡisa-i hak-dd-änfalälän däḡ-tabarät ta dd-jed, ənta a hi-dd-äšmašälän

† **9:15 9:15** — ḡur-käl-Älyähud, ere wärän ämoos äḡḡ-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-däḡ, änəzzalim, äkafär (ere wärän issen s-Mässinäḡ).

sär-k i-ad-käy-dd-iqqəl ahānay-nāk, idnøy-käy Unfas Šaddijän.»

¹⁸ Tamäzäyyat-ten-däx a däx-dd-äträkkät a olähän d-tifrönkawen däx-tiṭṭawen n-Sawəl təzzar iqqäl-t-dd ahānay-net,

¹⁹ ibdäd ḍarät-a-wen, ätwäsälmaḡ däx-aman, immənsäw, iqqäl-t-dd äššahät-net, izzäḡ Sawəl ḡur-inəṭṭulab wi n-aḡrəm-en-däx har ḡur-sän ässakäy a län išilan.

Ämoos Sawəl ämära tajuhe n-Ḣisa Älmasex

²⁰ Wär-ähoja a-s issəntä axāṭab n-isälan n-Ḣisa däx-ihānan n-äddin wi n-käl-Älyähud, isatbat dat-tamətte iket-net a-s, Ḣisa a-s, Rure-s n-Mässinäḡ.

²¹ Äkunän äddinät wi has-sallänen, əqqäländd ḡas, jannen: «A-wa, wädden Sawəl wa izzänän s-wi ḡarränen isəm wa n-Ḣisa hänen Yärussälam? Äjän wädden ass-net i-aḡrəm-wa-däx, i n-təssəba n-ad-tän-isəttärməs, äj'-en däx-ifassän n-ämänokal n-käl-tikutawen?»

²² Sawəl ənta, itiṣuhut immun-net s-Mässinäḡ hak ašäl, isimxəlxil käl-Älyähud wi əzzäḡnen Dämašaq, isikus-tän äššäk a-s Ḣisa a-s Älmasex.

²³ Okäy äzzāman ḡas, änmännakän käl-Älyähud fäll-əmmək wa s-t-mad-säḡdärän, äḡən-t kərəf. Əssəbdädän ḍarät-a-wen meddön däx-imawän n-aḡrəm iket-net i-ad-äqqaymən has-äḡtafän i-ad-əjrəwän əmmək s-t-änḡän

²⁴ mäšan, əjjäšän-t isälan n-taḡdärt ta s-äbokän ad-has-tät-əjən.

²⁵ Ænkärän inəttulab s-ehäḍ, jän Sawəl dəḡ-deke hərəwän, ästärarän-t s-aşrut n-äḡalla wa iyyäḍän iḡläyän aḡrəm, əssəjmäḍän-t, ikkä Yärussälam.

²⁶ Iwwäḍ-in ḡas, ikkä inəttulab wi iyyäḍnen i-ad-där-sän irtəy mäšan, äksuḍän-t iket-näsän ed wär-əflesän härwa a-s iyyän dəḡ-sän a ämoos.

²⁷ Irmäs-t-dd Bärnäbbas s-iman-net, ilwäy-t s-inəmмуşal, illäḡät-asän əmmək wa s-inhäy Sawəl Emäli Yisa dəḡ-tabarät ta n-Dämaşəq d-əmmək wa s-has-imməjräd Mässinäḡ d-turhajät ta t-ikfa n-ad-ämmäjräd s-ənniyät ozjan dəḡ-ihänan n-äddin wi n-käl-Älyähud i-ad-äjjäyh a-s Yisa a-s Älmasex.

²⁸ Äsbärräkän-t älwäqq-wen-däḡ, irtäy dār-sän; edägg əkkän dəḡ-Yärussälam-däḡ, äddeew dār-sän, itajäyha s-ənniyät ozjan ənta-däḡ fäll-isəm n-Emäli,

²⁹ itidwənnit, itamäzaḡ d-käl-Älyähud wi sawalnen Tälyunanit mäšan, əggäḍän-dd sār-s, ad-tammäḡän əntäneḍ-däḡ i-tašləlt s-əjän iman-net.

³⁰ Æslän ayətma-s dəḡ-äddin i-a-wen ḡas, əssəjmäḍän-t s-aḡrəm wa n-Qäyşära təzzar, ikkä ḍarät-a-wen wa n-Tarša.

Ikkä Bətrus älkänisät ta n-teje ta n-Älyähudəyät

³¹ Äzzäman-en, təjraw älkänisät äḡafyät dəḡ-tajiwen ti n-Älyähudəyät d-Galila d-Sämari, tişuhun inəttulab dəḡ-immun-näsän, tinmækfin tayətte, tamaşalän härät iket-net dəḡ-tuksəḍa

n-Emäli, idhal-tän Unfas Šaddijän, isawaḍ-dd fälla-sän hak ašäl äddinät wi iḡläs Mässinäḡ.

³² Älliil Bəṭrus ənta äkall iket-net har dd-osa iməššeddəjän wi əzzäḡnen tadabayt ta n-Ludd.

³³ Ill'-e dihen ähaləs s-isəm-net Inyas s-a ilan əttam iwətyan ibdan, wär käla ifäl asəftäḡ-net.

³⁴ Os'-e-hi-dd Bəṭrus, inn'-as: «Inyas, äzozäy-käy Ȳisa Älmaseḡ, əbdəd, aḍh asəftäḡ-näk.» Ibdäd Inyas ässaḡät-wen-däḡ.

³⁵ Ənhäyän käl-Ludd əntəneḍ d-äddinät wi əzzäḡnen telämse ta n-Sarun a-wen ḡas, omänän s-Emäli iket-däḡ-näsän.

³⁶ A-s itäj a-wen-däḡ, təzzaḡ tänätṭalibt s-isəm-net Täbita aḡrəm wa n-Žafa, tawäḡra daḡ s-isəm wa n-Dorkas, a-wen älmäḡna-net: «Tašənkäḍt.» Tämoos tamäḍt n-wälät-älxer, tajj imärkedän äjjootnen, təkkat.

³⁷ Išilan-en-däḡ ad-tärhin, äba-tät, əknän äddinät tafəkka-net, əssənsän-tät däḡ-ehän n-soro.

³⁸ Əslän inəṭṭulab wi hänen taḡrəmt-en wärät tänmäjjaj d-Ludd a-s dd-ijjaš Bəṭrus äkall ḡas, äšmašälän sār-s əssin meddən i-ad-där-sän dd-idaw šik.

³⁹ Äddew dār-sän Bəṭrus, əwwäḍän-dd ḡas, əlwäyän-t s-soro wa däḡ-tənsa tafəkka n-tamäḍt, əlkäḍnät-as-dd tinuḍäfen əṭṭafnät ibanet, hallänät, saknenät isəlsa wi hasnät-təzzəzmäy Dorkas däḡ-a-wa təkkäs təll'-e jere-snät.

⁴⁰ Izzəzjār-tänät əntänäteḍ d-tamətte iket-net, irkäḡ ḍarät-a-wen jənnəj-s, idäl Mässinäḡ. Issəmdä tittar ḡas, innäḍ-dd sār-s, inn'-as:

«Täbita, өnkär-dd!» Torä-dd tiṭṭawen-net
älwäqq-wen-däḡ, төnhäy Bөṭrus, täqqimä-dd.

⁴¹ Äshätäl-as-dd s-äfuss-net, issөbdäd-tät,
iyrä-dd imөššeddөjän d-tinuḡäfen ḡarät-a-wen,
issөkn'-asän-tät, төddar.

⁴² Šik-däḡ a-s dd-өssäḡläyän isälan n-a-wen-
däḡ aḡrөm wa n-Žafa iket-net, omänän äddinät
äjjootnen s-Emäli.

⁴³ Ija Bөṭrus äzzäman däḡ-Žafa izzay däḡ-ehän
n-Simyon wa isafalän ilämawän.

10

Ikka Bөṭrus ehän wa n-Kärnälyus

¹ Aḡrөm wa n-Qäyšära, izzay-t käbtän n-käl-
Roma s-isөm-net Kärnälyus, ännihäḡ däḡ-ejhän
n-өssärdusa wi hänen taggayt ta s-itawänna:
Iṭali.

² Ähalөs äddiinän a ämoos өnta hakd käl-
eḡewөn-net, itөkkat, infä tamөtte s-a äjjeen,
härkuk day itөddal Mässinäḡ.

³ Ašäl iyyän, ebre n-tezzar, ḡur ässaḡät
wa s-käraḡ, änfäläl-as-dd änjälos n-Mässinäḡ
däḡ-ehän-net s-älmäḡna äsisäjrähän, inn'-as:
«Kärnälyus!»

⁴ Issөjräh Kärnälyus däḡ-änjälos däḡ-a-s
irmaḡ, inn'-as: «Emäli, näkk-da, ma төnned?»
Inn'-as änjälos: «Tittar-näk, d-tikutawen-näk,
өwwädnät Mässinäḡ, wär käy-in-ittөwa,

⁵ šөmmišөл ämära meddөн s-Žafa i-ad-hak-dd
aḡrөн Simyon wa s-itawänna Bөṭrus,

6 äzzubbät ħur-Simony wa isafalän ilämawän s-t-illa ehän-net dāḡ-asälim n-ejärew wa səmmän.»

7 Ifäl-t änjälos wa hasän-imməjrädän ħas, issäḡrā-dd Kärnälyus əssin dāḡ-inaxdimän-net, äsdāw-tän d-əssärdasi äddinän dāḡ-wi äḡläfnen ehän-net, ikna tafləst.

8 Ijä dāḡ-sän isälan n-a-wa ijän iket-net təzzar, äšmašäl-tän s-Žafa.

9 Härwa han tabarät ašäl wa iyyädän, ad-iwwän Bəṭrus afälla n-ehän s-tarähut, ad-itəddal Mässinäḡ.

10 Itəddal Mässinäḡ dihen-dāḡ a-s älluz, äsdärhän a ikša. Samäjnen-as äddinät imənsiwän dihen-dāḡ a-s t-irmäs härät,

11 ojja išənnawän a-s dd-ämerän, ifäl-tän-dd ässärer mäqqoorän ätiwätṭäfän s-əkkoḡ išrutän-net, insä-dd data-s.

12 Ässärer-en, iskar fälla-s a-wa t-illän dāḡ-irəzzejän d-iḡlulam d-igḡaḡ.

13 Inn'-as emäsli iyyän älwäqq-wen: «Bəṭrus, äḡrəs, äkš.»

14 Inn'-as Bəṭrus: «Fäw Emäli! Näkk, wär käla əkšəḡ a xəramän wäla a ämmidäsän.»

15 Inn'-as emäsli day: «Wär käy-iwer asäxrəm n-a-wa issäxläl Mässinäḡ.»

16 Itajj änjälos mäjräd-wənnin-dāḡ i-Bəṭrus har kərəḡ ihändəgḡan təzzar, imməḡkäl data-s ässärer s-išənnawän.

17 Iqqän a-wen-dāḡ eyäf-net, ad-isiməktəw, itassän ad-ijräh älmäḡna n-a-wa has-dd-änfalälän. Tamäzäyyat-ten-dāḡ a dāḡ-dd-

əbdädän meddən dār-s sastannen dat-emm n-ehän wa n-Simyon-i ħur-əzzubbät,

¹⁸ əssəstänän s-afälla kunta ehän-wen-däḡ a dāḡ-izzaḡ Simyon wa s-itawänna Bəṭrus.

¹⁹ Isiməktəw Bəṭrus dāḡ-isālan n-tänäfalilt-ta-dāḡ a-s has-innä Unfas Šəddijän: «Sastanän dār-k kəraḡ meddən,

²⁰ wār təsməšändädäd tidawt dār-sän ed näkk a tän-dd-əšməšälän sār-k.»

²¹ Əzzubbät-dd sār-sän Bəṭrus, əzozäy-tän iman-net, issəstän-tän d-əddälil wa fäl dār-s sastanän.

²² Ənnän-as: «Kärnälyus wa n-käbtän n-Roma a hanäḡ-dd-əšməšälän sār-k, əhaləs n-əmayḡdal n-əmaksəḡ n-Mässinäḡ, əssiimḡrən käl-Əlyähud iket-näsän a əmoos. A ilan išilan d-has-dd-änfaläl ənjälos n-eməššeddəj n-Mässinäḡ t-əsmätärän d-ad-käy-dd-isəssəḡär, isəjəd i-a-wa has-mad-tənnəd afäl t-dd-tosed.»

²³ Əsbərrəkät Bəṭrus meddən wi dd-əšməšäl Kärnälyus, əsməjarät-tän. Əffäw ḡas, ərkəbän, əddewän dār-sän härät dāḡ-ayətma-sän dāḡ-əddin əzzaḡnen Žafa.

Ajəyh wa ija Bəṭrus dat-əddinät wären əmoos dəḡg-Əlyähud

²⁴ Əwwädän-in ašäl wa iyyädän Qäyşara. A-s hin-osän, iqqal-asän Kärnälyus ənta d-käl-eḡewən-net d-inaflisän-net.

²⁵ Iräs-dd Bəṭrus ehän ḡas, ilkəḡ-as-dd Kärnälyus, oḡa daw-iḡarän-net, irkəḡ data-s

26 mäšan, issəbdäd-t-dd Bəṭrus, inn'-as: «Ahaa, wär jed a-di, näkk-däḡ ägg-adəm ḡas a ämoosäḡ.»

27 Ädiwännen har-əjjäšan fäll-älžəmaḡät wa äqqiimän däḡ-ammäs n-ehän.

28 Idkäl Bəṭrus mäjräd, inn'-asän: «Təssanäm käwəneḡ iman-nəwän a-s ässixräm alämär wa n-käl-Älyähud i-iyän däḡ-sän ujəš n-ehän, wäla təmmidəwa d-ere d-wär-oher äddin mäšan, näkk-i-hi, inn'-ahi Mässinäḡ a-s wär leḡ s-ad-səjrähäḡ äwadəm wäl' iyyän i-ad-t-äjäḡ a xəramän wäla a ämmidäsän.

29 Təssəba n-a-wen-däḡ afäl wär jeḡ äsarü wäl' iyyän i-ad-wär käwän-dd-əkkeḡ, läḡätät-ahi ämära, äddälil wa fäl hi-dd-təssäḡräm.»

30 Inn'-as Kärnälyus: «A ilan kəraḡ išilan, s-ässəḡät šund-wa-däḡ, təddaläḡ Mässinäḡ s-tezzar däḡ-ehän-in, har šik-däḡ, ibdäd-dd ähaləs ilsan imälsan äsimäḡmāḡnen dat-i,

31 inn'-ahi: «Kärnälyus, tittar-näk d-tikutawen-näk, əwwäḡnät Mässinäḡ, wär käy-in-ittəwa,

32 šəmmişəl ämära meddən s-aḡrəm wa n-Žafa i-ad-dd-idawän d-ähaləs s-isəm-net Simyon wa s-itawänna Bəṭrus, äzzubbät däḡ-ehän n-Simyon wa isafalän ilämawän, ehän-net, ih' asälim n-əjärew wa səmmän.»

33 Äšmašäläḡ-in sār-k älwäqq-wen-däḡ meddən-in, iräš-ak Mässinäḡ ass wa hi-dd-jed. Ämära, iket-däḡ-nänäḡ da-däḡ, Mässinäḡ a däḡ-nəjar äṭṭäma, näsijäd daḡ iket-nänäḡ i-a-wa s-hak-inna Emäli ad-hanäḡ-t-səlmədäd.»

34 Idkäl Bəṭrus mäjräd, innä: «Tidət-däḡ a-s, iket əjrähäḡ a-s, Mässinäḡ, wär-izley äddinät,

³⁵ änn-ak, e d t-illäm ere t-äksudän, itamašal erhet-net s-iqqud, tawset t-tölät-däx, ijraz-as.

³⁶ Mässinäx, ässawäy-dd s-tizarät mäjräd-net i-käl-Išrayil i-ad-tän-isəlməd s-älxer wa tän-mad-äkf YisaÄlmasex-i n-Emäli n-e d t-illäm ägg-adəm.

³⁷ Təssanäm a-wa ijän däx-Galila d-Älyähudəyät darät asəlmax wa ij' Exya i-äddinät däx-aman.

³⁸ Yisa wa n-Näširät, äsnäfrän-t Mässinäx, ikf'-e Unfas, issäxläy-dd äkall iket-net, itajj älxer, izizuy äddinät iket-näsän wi ässirmäx Iblis.

³⁹ Näjjəyh i-a-wa ija iket-net däx-teje ta n-Älyähudəyät d-ayrəm wa n-Yärussälam hundäx har ašäl wa d-t-ärmäsän käl-Älyähud, əşläbän-t fäll-tajəttewt

⁴⁰ mäšan, issənkär-t-dd Mässinäx s-tärna-net jer-inəmmuttan ašäl wa s kəraḍ i-ad-t-ənhəyän äddinät, iddar,

⁴¹ wädden äddinät iket-näsän a t-ənhäyən, wär t-inhey ar wi äsnäfrän ənta iman-net i-a-wen. Äddinät-en, nəh'-en näkkäneḍ-i ohärnen išəkša d-isəswa d-Yisa darät a-s t-dd-ässinkär Mässinäx jer-inəmmuttan.

⁴² Ənta-en-däx a hanäx-äsnäfränän, omär-anäx s-axättab n-isälan-net i-äddinät, nəselməd-tän a-s Yisa a äsnäfrän Mässinäx i-ad-išräx e d t-illäm ägg-adəm, wi äba hakd wi əddärnen.

⁴³ Däx-isälan-net ənta-en-däx a däx-äjjəyhän, ənnän ännäbitän iket-däx-näsän a-s, ere sār-s omänän-däx, ad-ijrəw tenäšše n-ibäkkadän-net

s-tärna n-isəm-net.»

Ajāraw wa jän inəzzulam i-Unfas Šaddijän

⁴⁴ Ijanna Bəṭrus a-wen-däx a-s dd-äzzubbät Unfas Šaddijän fäll-älžämaḡät-en iket-net.

⁴⁵ Iqqän a-wen eḡäf n-imumənän wi n-käl-Älyähud ämeläynen äddewnen d-Bəṭrus ed ənhäyän Unfas Šaddijän har dd-äzzubbät fäll-äddinät s-aläşäl-näsän, inəzzulam a ämoosän.

⁴⁶ Sallän-asän daḡ ämmiijrädän awalän äynaynen, samḡarän Mässinäḡ.

⁴⁷ Inn'-asän Bəṭrus darät-a-wen: «Ak, ma igdalän i-äddinät fäll-dd-äzzubbät Unfas Šaddijän s-əmmək wa s-fälla-näḡ dd-äzzubbät ad-ətwəsəlmäḡän däḡ-aman?»

⁴⁸ Omär älwäqq-wen-däḡ s-ad-ətwəsəməḡän däḡ-aman s-isəm n-Ÿisa Älmaseḡ.

Ittär Kärnəlyus d-älžälmaḡät-net däḡ-Bəṭrus ad-ḡur-sän isəssikəy a län išilan.

11

İsālan wi ija Bəṭrus dat-imumənän wi n-Yārussālam

¹ İslän inəmмуşal d-ayətma wi iyyäḡnen hänen teje ta n-Älyähudəyät a-s iyyäḡ däḡ-inəzzulam† omänän s-mäjräd n-Mässinäḡ.

† **11:1 11:1** — Ÿur-käl-Älyähud, ere wärän ämoos ägg-Älyähud s-aläşäl meḡ ere wärän ilkem i-äddin-näsän, iket-net, änəzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Aşäl-i-däḡ, änəzzalim, äkafär (ere wärän issen s-Mässinäḡ).

2 Älwäqq wa dd-iqqäl Bətrus Yärussälam, ämžäyžäyän-t imumənän wi n-dägg-Älyähud jänen amili härät, ənnän-as:

3 «Käyy, ma käy-äsihälän ujəš n-ehän n-äddinät wären ämeläy tihəred dār-sän imənsiwän?»

4 Issənt'-asän Bətrus afəssär n-isälan s-iyjän-iyjän ħur-aləšäl-näsän har ašäl-i-däx, inn'-asän:

5 «Hex aħrəm wa n-Žafa, təddaləx Mässinäx a-s dd-hex oDEX, irmäs-ahi härät, änfaläl-ahi-dd ässärer dd-ifalän išənnawän

6 fäll-ənsanät taħsiwen d-tawäqqast d-izlulam d-igdaḍ. Zajəzzex a-wa insän fäll-ässärer-en-däx

7 a-s əsley i-eməsli hi-innän: <Bətrus, äħrəs, äkš>

8 mäšan, ənney-as: <Fəw Emäli! Näkk, wär kälä əkšex a xəramän wälä a ämmidäsän.>

9 Inn'-ahi eməsli-ənnin daħ: <Wär käy-iwer asäxrəm n-a-wa issäxläl Mässinäx.>

10 Itajj a-wen har kərəḍ ihändäggan təzzar, immədkäl dat-i ässärer s-išənnawän.

11 Iqqan a-wa ijän eħäf-in dihen-däx a-s dd-əbdädän kərəḍ meddən dd-falnen Qäyšara dat-emm n-ehän wa ħur-äzzubbeħ,

12 inn'-ahi Unfas Šəddijän ad-dār-sän idawəħ šik. Äddewəħ dār-sän, äddeewəħ daħ d-säḍis ayətma wi t-əllänen data-wän äməra-däx s-ehän n-Kärnəlyus-i hi-dd-issäħrän.

13 Näwwäḍ-in ħas, ija dəx-nəx Kärnəlyus isälan n-əmmək wa s-has-dd-änfaläl änjəlos

wa has-innän: <Šəmmišəl ämära äwadəm s-aḡrəm wa n-Žafa i-ad-dd-idaw d-ähäləs s-isəmet Simyon wa s-itawänna Bəṭrus.>

14 Afäl dd-osa, ad-hak-älläḡät əmmək wa smad-täḡləsäd käyy d-eḡewən-näk.>

15 Ämmiirädäḡ-asän dihen-däḡ, a-s fällasän dd-äzzubbät Unfas Šäddijän iket-näsän səmmək wa sfälla-näḡ dd-äzzubbät näkkäneḡ ašäl äzzarän.

16 Əkteḡ-dd älwäqq-wen mäjräd n-Emäli ḡisa a-s inna: <Exya, issəlmäḡ däḡ-aman mäšan, käwäneḡ, ad-tətwəsəlmäḡäm däḡ-Unfas Šäddijän.>

17 ḡas šämad ij'-asän Mässinäḡ ihuk šund wi hanäḡ-ija a-s nomän s-Emäli ḡisaÄlmaseḡ, mi ämoosäḡ timsəgəgḡiyäḡ d-Mässinäḡ?>

18 Isl' älzämaḡät i-isälan-win-däḡ ḡas, sämmeḡ ənniyät-net ad-tiimələn Mässinäḡ, jannen: «Itbat a-s inəzzulam-däḡ, ikf'-en Mässinäḡ turhajät n-ad-utabän, amənän sär-s, əjrəwän əntäneḡ-däḡ tämudre ta n-tidət.»

Ätwäjjän isälan n-älxer däḡ-taḡrəmt ta n-Intyuš

19 Imumənän wi əmmähäšnen ḡarät tissust ta təlkämät i-tamättant n-Stifan,† əkkän däḡsän iyyäḡ äkall wa n-Finisya, əkkän iyyäḡ awtəl wa n-Qəbrus, əkkän iyyäḡ aḡrəm wa n-Intyuš, mäšan wär xəṭṭəb təššəm-näsän ar i-käl-Älyähud.

† 11:19 11:19 Jannen-as iyyäḡ: Älmuštafa.

20 Däx-a-wen-däx a däx-sän əkkän iyyäð əwanen däx-əkall wa n-Qəbrus d-wa n-Libya aɣrəm wa n-Intyuş, ad-xaṭṭābän dihen isālan n-älxer n-Emäli Ƴisa i-käl-Älyunan.

21 Idhal-tän Emäli däx-a-wa täjjän. Omänän äddinät äjjootnen däx-a-wen-däx, əkfän iman-näsän i-Emäli.

22 Təsl' älkänisät ta hät Yərussālam i-a-wen ɣas, täşmaşäl-dd Bärnäbbas s-aɣrəm wa n-Intyuş.

23 Osa-hin, inhäy tihusay n-ännuɣmät n-Mässinäx ɣas, äsdäwät-t a-wen, ad-isamätar imumənän d-ad-əknən uðəf n-Emäli s-ulhawän əjlaynen.

24 Ämoos ənta iman-net ähaləs n-emässärho, idnay Unfas Şäddijän, äşşoohäät day däx-immun-net. İşilan-en-däx, omänän äddinät äjjootnen s-Emäli.

25 Däx-a-wen-däx ad-ikka Bärnäbbas taɣrəmt ta n-Tarşa itammäx i-Sawəl, ijrāw-t ɣas, ilwäy-t-dd s-Intyuş.

26 Jän dihen awätay imdan änniixdämän d-älkänisät n-aɣrəm-en, saɣr'-en tamətte täjjet. Aɣrəm-wen-däx n-Intyuş a däx-ätwäxrän inəṭṭulab n-Ƴisa s-isəm wa n-älmässexitän s-tizarät.

27 Äzzäman-en-däx ad-dd-fälän ännäbitän iha Äggäbbas aɣrəm wa n-Yərussālam, əkkän-dd Intyuş.

28 Ənta-en-däx a ibdädän, äloläy s-tärna n-Unfas Şäddijän n-a-s ilkam ad-äj laž läbasän fäll-ärori n-əkall iket-net. Ija day a-wen s-əmmək-wen-däx s-tän-innä däx-äzzäman wa d-ämoos

Kelod ämänokal n-äkall.

²⁹ Təssəba n-a-wen-däx a fäl, änmännakän imumənän wi hänen Intyuš i-ad-arəj hak iyyän däx-sän s-a-wa iṭṭäf d-a-wa s-äddoobät i-ayətma-sän däx-äddin wi hänen Älyähudəyät.

³⁰ Ejan a-wen s-əmmək-en-däx təzzar, jän tasəssiwit-ten-däx jer-ifassän n-Bärnäbbas d-Sawəl i-ad-tät-in-səssiwəḏän inušämän n-älkänisät ta häät Älyähudəyät.

12

Iyläs-dd Mässinäx Bəṭrus däx-tamättant

¹ Äzzäman-wen-däx, ad-izzän ämänokal Harudəs Ägribba s-iiyäd däx-äddinät n-älkänisät ta häät Yärussälam, ad-tän-itiḡəzzəbut.

² Däx-a-wen-däx, ad-inḡa s-täkoba Yaḡub wa n-əṇṇa-s n-Exya.

³ Inhäy a-s a-wa ija, ijraz i-käl-Älyähud ḡas, ästärmäs Bəṭrus ašäl n-ämudd wa n-Faşka-i-däx tattän äddinät tijəlwen ti wär ha täzḡa,

⁴ ij'-e däx-takärmüt təzzar, issəbdäd əkkoḡät taggayen n-əkkoḡ-əkkoḡ əssärdusa i-ad-t-äḡləfän ed irha ad-t-dd-isəbdəd dat-käl-äššäreḡa afäl okäy ašäl wa n-Faşka.

⁵ Iha Bəṭrus takärmüt-en-däx mäšan, a-s ija a-wen-däx, älkänisät ənta, täžziimäx, tajäynan dat-Mässinäx, tattär däx-s ad-t-dd-äswäyyän.

⁶ Däx-ehäd wa n-dat-wa d-ila Harudəs ad-t-išräx, insä Bəṭrus däx-takärmüt jer-əssin əssärdusa däx-s janen sänatät tišəm, əbdadän daḡ əssärdusa iyyäd dat-emm n-takärmüt.

7 Har šik-däx, osä-dd änjälos n-Emäli edägg-en, ämläwläw sellul wa iha, äkrättät änjälos tasäja n-Bəṭrus, issənkär-t, inn'-as: «Tärmaḍ, əbdəd šik!» Särnät fälla-s tišəm ässaḡät-wen-däx, oḍänät.

8 Inn'-as änjälos daḡ: «Tärmaḍ, əjbəs taməntəka-näk, əsəl tifadəlen-näk, uhən, äj anäkäbba-näk, əlkəm-ahi.» Ija Bəṭrus a-wa has-innä änjälos iket-net.

9 Izjār-dd Bəṭrus takärmüt, ilkäm i-änjälos mäšan har ämära-däx, ija ḡur-s a-s täharjit ḡas a-wa-däx iket-net.

10 Əkkän-dd edes i-əssärdusa wi äzzarnen, əkkän-dd daḡ edes i-tagḡayt ta s-sänatät har dd-ohäzän tashärt ta n-täzoli təkfät emm-net aḡrəm, tämera d-iman-net data-sän, əzjārän, əjjäšan ammas n-täšarrit ḡas, ifäl änjälos Bəṭrus.

11 Älwäqq-wen-däx, ad-t-dd-iqqäl ənniyät-net, ikkäs äššäk a-s Mässinäḡ a sär-s dd-äšmašälän änjälos-net i-ad-t-dd-ikkəs jer-ifassän n-Harudəs, d-a-wa läbasän s-ärhän käl-Älyähud ad-has-t-əjən.

12 Ijräh taḡärha-net ämära ḡas, ikkä ehän n-Märyäma ta n-ma-s n-Exya wa s-itawänna Marḡəs, äzziimmäḡän ḡur-s imumənän äjjootnen təddalnen Mässinäḡ.

13 Ikkəwkäw emm n-ehän, tošäl-dd sär-s tämawaḍt n-tänaxdimt s-isəm-net Roda, təssəstän-t d-ere wa ämoos,

14 təzzäy temäsläḡt-net mäšan, təja tedäwit-ta-däx fäl hin-təttəwa wäla-däx ad-has-tarr emm n-ehän, tošäl, täqqäl ammas n-ehän, təja isälan

däx-älžamaḡät n-a-s Bəṭrus a itakäwkawän emm n-ehän.

¹⁵ Īslän i-a-wa jānna ḡas, əjän-tät tenəbbeddəlt, ənnän-as: «A-di ānjālos-net ḡas a-s təsled.» Māšan, tənn'-asän: «Tidət-in, əjlayāḡ a-s ənta.»

¹⁶ Jannen a-wen-däḡ, itakäwkaw-asän Bəṭrus emm n-ehän. Ēḡlän, orän-as-t, əqqälän-dd ḡas, tof'-en tākunt n-a-s tidət-däḡ a-s ənta a-wa.

¹⁷ Āswär-asän assəkäḡ emm-net, āstafäy-asän d-ad-susəmān, ad-hasän-itajj ḡarät-a-wen isälan n-əmmək wa s-t-dd-ikkäs Ēmäli däḡ-takärmüt. Inn'-asän daḡ: «Āḡlät, äjät ämära isälan däḡ-Yaqub d-ayətma-nāḡ däḡ-äddin wi iyyädnen.» Ifäl-tän ḡarät-a-wen, ikk' edägg iyyän.

¹⁸ Āffāw ḡas tējä tämdärwäy mäqqoorät däḡ-əssärdusa, hak iyyän isastan amidi-net d-a-wa ija Bəṭrus.

¹⁹ Āssomāḡ-asän-t Harudəs mäšan, äba-hasän-t-dd. Issäḡrā-dd əssärdusa wi s-kāla t-äḡläfän, omär s-ad-ətwəsəstənän təzzar, ämmätän. Ifäl Harudəs ḡarät-a-wen teje ta n-Ālyähudəyät, ikk' aḡrəm wa n-Qäyşära i-ad-däḡ-s isəssikəy a län išilan.

Tamättant n-ämānokāl Harudəs

²⁰ A-s itajj a-wen-däḡ, ih' adkär n-iḡärman wi n-Tir d-Säyda ämānokāl Harudəs. Təssəba n-ad-äj älxer dār-sän a fäl dd-äşmaşälän iḡärman-en älžamaḡät n-älḡafyät. Ānmännakän d-Blastas-i ännihädän däḡ-ehän n-ämānokāl Harudəs d-a-wa t-dd-iqqälän iket-net. Ēnta-en-däḡ a däḡ-əttärän ad-ilḡəd ämānokāl i-ad-äj älxer ed

isudar-näsän teje-ten-däx fäll-ixkäm Harudəs a dd-təffalän.

²¹ Ašäl wa d-əlän s-ad-sətbətən älxer jere-sän, ässahäx-dd Harudəs ašäl däx-isəlsa-net wi n-təmmənukəla, äqqima fäll-tasäqqaymut-net ta n-təmmənukəla, imməjräd i-tamətte.

²² Təsla tamətte i-mäjräd-net xas, täsxäyya däx-išənnawän, ad-janna: «Ašäl-i, Mässinäx iman-net a hanäx-ämmijrädän, wädden ägg-adəm.»

²³ Diha-däx d-tənna tamətte a-wen-däx, ad-has-äzzuggät änjälos n-Mässinäx ed unjäy ikfa Mässinäx semxar wa dār-änihäjja. A-s t-in-əjrähän äddinät, əfradnät däx-s tiwəkkawen har ämmut.

²⁴ Intäj mäjräd n-Mässinäx däx-idäggan äjjootnen, omänän äddinät däx-išilan-win-däx.

²⁵ Ässawäd-in Bärnäbbas d-Sawəl ämašal-näsän i-käl-Yärussälam xas, əqqälän siha s-dd-hän, äddeewän ämära d-Exya wa s-itawänna Marqəs.

13

Asikəl wa äzzarän ija Sawəl äddew d-Bärnäbbas

¹ Älkänisät ta hät axrəm wa n-Intyuš, ännäbitän-net d-imäsäxran-net da: Bärnäbbas, Simyon wa s-itawänna «Ekäwel», Lisyus wa n-äkall wa n-Qərwan, Mänahin wa s-ənta d-Harudəs Intibbas a ədwälnen däx-iyjän n-ehän d-Sawəl.

² Ašäl wa n-älxibadät n-Emäli, äzuumän imumənän, äžziimmäxän däx-iyjän n-edägg,

ħabbädän Emäli a-s hasän-innä Unfas Šaddijän.
«Äjät-ahi Bärnäbbas d-Sawəl s-edes i-ämašal wa
s-tän-dd-äxreħ.»

³ Äzumän, dälän Mässinäħ təzzar, äswärän
ifassän-näsän Bärnäbbas d-Sawəl, oyyän-tän,
əglän.

⁴ Oħäd-tän Unfas Šaddijän, äzzubben s-aħrəm
wa n-Slukya təzzar əjjäšän turäft n-aman, jän
tamdujt ta n-Qəbrus;

⁵ əwwädän-in taħrəmt s-isəm-net Sälamin
ħas, jän isälan n-mäjräd n-Mässinäħ dəħ-ihänan
n-äddin wi n-käl-Älyähud, ämoos-asän Exya
Marqəs ämadhal.

Yəlimas wa n-emässäxär

⁶ Əjläyän awtəl wa n-Qərwan iket-net har
Bafus, əjräwän dihen ägg-Älyähud n-emässäxär
s-isəm-net Bärħisa, ijanna s-bahu, ännäbi a
ämoos,

⁷ izzaħ ħur-Saržus Buləs-i n-ämänokal n-awtəl,
ähaləs, a-wen, iknan terše n-tayette. Isla
ämänokal Bärnäbbas d-Sawəl ħas, issäħr'-en-dd
dəħ-derhan n-ad-t-səslən mäjräd n-Mässinäħ.

⁸ Iggäd-dd Yəlimas wa n-emässäxär, a-wen
isəm-net dəħ-Tälyunanit, äšmäšäkkät-asän
mäjräd, ad-itattär ad-hin-išəšləl ämänokal fäll-
isälan n-immun.

⁹ İbdäd-dd sār-s Sawəl-i s-itawänna dəħ Buləs,
ıdkar-t Unfas Šaddijän, ikna asəns n-akäyad-net
fäll-Yəlimas,

¹⁰ inn'-as: «Əyya isəm n-ägg-Iblis, käyy wär
təđneyäd a säl amsud d-təlmənuşäħa, ašanjo n-
a-wa oħädän a tämoosäd, isəm n-eməkkerrəs,

ɣas äba-hak a käy-išilləwän ar asəfray n-tabarät ta toɣädät n-Emäli.

11 Ämära, səjəd-ahi: ad-fälla-k isäns Emäli äfuss-net, täddäryäläd, tähajəd wär tənheyäd täfukt s-tiṭṭawen-näk.» Wärnät tihay d-tähozt tiṭṭawen-net ässaɣät-wen-däɣ, ad-isikluluf siha d-siha, itammäɣ i-ere t-ilwäyän.

12 Inhäy ämänokal n-äkall a-wa ijän ɣas, omän, təḏäs teɣäre ta s-islä fäll-Emäli ulh-net.

Älxuṭbät wa ija Buləs däy-tayrəmt ta n-Intyuš

13 Ijjäš Buləs d-imidiwän-net turäft n-aman däɣ-Bafus, əkkän ayərəm wa n-Birga däɣ-äkall wa n-Bänfəli, dihen-däɣ a dər-sän ibḏa Marqəs, ässof ad-iqqəl Yäruşsalam.

14 Fälän Birga, əkkän Intyuš ta n-teje ta n-Bəssidi. Ij'-en ašäl wa n-əssəbət dihen ɣas, əkkän ehän n-äddin wa n-käl-Älyähud.

15 Äqqimän dihen-däɣ, itawäɣra alämär n-Mässinäɣ d-a-wa ənnän ännäbitän däɣ-əlkəttabän ɣas, ənnän-asän imizärän n-ehän wa n-äddin: «Meddən, ayətma-näɣ, kunta lam isəmməterän s-tärham ad-tän-təjəm i-äddinät, äxtəbät-asän.»

16 Ästafäy Buləs i-älzəməɣät, ibdäd, inn'-asän: «Käl-Işrayil d-imaksadän n-Mässinäɣ, säjdat-ahi.

17 Mässinäɣ n-tamətte-ta-däɣ n-Işrayil, ənta a äsnäfränän abbatän-nänäɣ, ässet'-en härwa han äkall wa n-Mişra təzzar, izzəzjär-asän-t-dd s-tärna n-äfuss-net,

18 wär t-illa erk älxal wär has-əjjeşän mäšan, äzzäydär fälla-sän har jän əkkožät timərwen n-awätay dāx-tenere.

19 Darät a-s tən-ikfa tärna fäll-əssa əddəwəlän dāx-Xāna a tən-ikfa tākasit ta hasän-əmoos äkall-wen-dāx.

20 Okäy darät-a-wen a ojarän əkkožät timad n-awätay d-səmmosät timərwen təzzar, ikf'-en älqallitän-i fälla-sän ämnakälnen hundäx har äzzäman wa n-ännäbi Sumäyla.

21 Ənta-en-dāx a dāx-əttärän käl-Işrayil ere fälla-sän ämnakälän, ij'-asän a-wa dāx-s əttärän, ikf'-en Mässinäx Sayəl ägg Kis wa n-tawset ta n-Bänyamin. Ämnakäl fälla-sän əkkožät timərwen n-awätay

22 mäšan, innad fälla-s Mässinäx, ijä-dd Dawəd ägg Yasa-i s-ənta a fäll inna Mässinäx: <Əjräwäx Dawəd ägg Yasa, ənta a-s ähaləs-wa s-ulh-net ilkam i-wa-nin, ad-ämaşäl erhet-in iket-net.>

23 İjəllan n-Dawəd-en-dāx a dāx-dd-ikkäs Mässinäx Yisa-i s-ənta a-s Ämaxlas wa s-ijjäş ärkäwäl-net i-käl-Işrayil.

24 Yisa, a-s ija Əxya isälan-net härwa wär-issənta ämaşäl-net älwäqq wa d-ixattab asəlmay dāx-aman i-ad-umas a-wen aşämöl n-tätubt i-tamətte n-Işrayil iket-net.

25 Älwäqq wa dd-tohäz tamättant n-Əxya, innä i-tamətte: <Mi s-tordam əmoosäx-t? Wär teyalät näkk a-s ätwänna ilkam a dd-asäx; wa s-ätwänna ilkam a dd-ass, imal-dd, ənta-en, wär-änhäjjäx wäla-dāx d-ad-əkkəsäx tifadəlen dāx-iđarän-net.>

26 Ayətma-γ wi n-ihäyawän n-Ibrahim, käwäneḍ-i äksuḍnen Mässinäγ, näkkäneḍ a-s dd-ässawäy Emäli mäjräd wa n-əlγəllas.

27 Ädduuttät a-s Yärussälam d-imizärän-net, əžžəzhälän iman-näsän i-γisa, wär t-illa a əfhamän däγ-a-wa ənnän ännäbitän däγ-əlkəttabän wi titwäγrinen hak əssəbət n-älγibadät däγ-ihänan n-äddin, äswärän γisa uḍlem, ittärmäs,

28 a-s ija a-wen, wär t-illa uḍlem fälla-s ättiräwän, hakd a-wen-däγ, əttärän däγ-Bilatəs ad-ətwəjjən iman-net.

29 Əssətbätän a-wa fälla-s ənnän əlkəttabän γas, əkkäsän-t-dd fäll-tajəttewt, jän-t däγ-azəkka

30 mäšan, issənkär-t-dd Mässinäγ jer-inəmmuttan.

31 Änfaläl-dd i-äddinät äjjootnen däγ-wi dār-s äddewnen wa-däγ n-Galila har Yärussälam, ija išilan äjjootnen ill'-e jere-sän. Ämära, äddinät-win-däγ s-dd-änfaläl a tajäyhanen i-isälan-win-däγ data-wän.

32 Näkkäneḍ ämära, nətajj'-awän isälan-win-däγ n-älxer s-ätwäjjä ärkäwäl-näsän i-abbatän-nänäγ.

33 Ärkäwäl-en, näkkäneḍ-i ämoosnen ihäyawän-näsän a-s t-ijjäs Mässinäγ ənta-i dd-issənkärän γisa jer-inəmmuttan s-əmmək wa s-iktäb däγ-əlxsəb-wa s-əssin n-əlkəttab wa n-Äzzäbur, innä Mässinäγ däγ-isälan n-γisa:
 <Käyy a-s Rure-γ, oräwäγ-käy ašäl-i-däγ.>

34 Äywa, γisa ya, Mässinäγ iman-net a innän, a t-dd-issənkärän jer-inəmmuttan härwa wär-inhey

märkähaw wa n-ažəkka. A-wen-däx day a fäl innä däx-isälan-net:

<Ad-käwän-äkfäx älbāraka wa šaddijän itbätän s-jeḡ ärkäwäl n-ad-t-äkfäx i-ännäbi Dawəd.>

³⁵ Iktab day a-s:

<Wär-e tøywəd Eməššeddəj-näk irakkäh däx-ažəkka.>

³⁶ Təssanäm a-s Dawəd ənta iman-net ämešäl a-wa fälla-s irha Mässinäḡ däx-äzzäman-net təzzar, ämmut, inhäy märkähaw wa n-ažəkka šund a-wa jän abbatän-net wi has-dd äzzarnen

³⁷ mäšan Ḡisa ənta, wär-inhey märkähaw-wen-däx ed, issənkär-t-dd Mässinäḡ jer-inəmmuttan.

³⁸ Ayətma, əlmədät a-s Ḡisa-i, ənta a ḡurhawän-t-təlla tenäšše n-ibäkkadän, ənta a-s sämdo n-a-wa hawän-ihän alämär wa dd-äzzäbbät Mässinäḡ fäll-ännäbi Mosa iket-net,

³⁹ ənta a ḡur-ijarräw e d t-illäm amumən idəm dat-Mässinäḡ,

⁴⁰ a-wen-däx a fäl, agəzät iman-näwän iket-di d-wär fälla-wän oḡa äššar-wa s-ənnän ännäbitän. Innä Mässinäḡ:

⁴¹ <Ənhəywät, käwäneḡ-i əḡnäynen kəssən,

tärməset-käwän täqqän n-eḡäf,

ibəhet-käwän fäl-a-s

ad-əjən ijitän däx-äzzäman-näwän s-kud-däx

ij'-awän äwadəm isälan-näsän, wär mad-t-təfləsäm.> »

⁴² Izjār-dd Buləs d-Bärnäbbas ehän n-äddin ḡas, əttärän däx-sän äddinät a dd-aləsän uḡəl əssəbət-wa ilkämän i-ad-hasän-aləsən iji n-isälan-wi-däx.

⁴³ Immähäš älzämaḡät ḡas, ölkämän-asän käl-Älyähud äjjootnen d-iyyəḡ ölkammen i-äddin wa n-käl-Älyähud, ädwännen dār-sän, sisibuyunāntān, sikusän-tān äššäk n-ad-äqqäymən öṭṭafän ännuḡmät n-Mässināḡ.

Ija Buləs d-Bärnäbbas isälan n-älxer i-äddinät wären ämoos dägg-Älyähud

⁴⁴ Ijä ašäl wa n-össəbət-i n-täsonfat ḡas, äddew-dd aḡrəm iket-däḡ-net i-ad-isəjəd i-mäjräd n-Emäli.

⁴⁵ Ənhäyän käl-Älyähud əjut n-tamötte ḡas, osämän, ad-šimšəkken mäjräd i-Buləs, jannen isikufor.

⁴⁶ Buləs d-Bärnäbbas ämoosän meddən ozjanen s-itbat immun-näsän, ənnän-asän: «Käwāneḡ a-s äniihäjja ad-hawän-itwäxṭəb mäjräd n-Mässināḡ s-tizarät mäšan, tunjäyäm sār-s ed, wār täsnähäjjäm iman-näwän d-tämudre ta täḡlälät, a-wen-däḡ a fäl ämära, əlmədät a-s ad-nənnäḡ s-inəzzulam.†

⁴⁷ Ənta-den-däḡ a-wa s-hanāḡ-omär Emäli däḡ-ölkəttab-net a-s innä:

⟨Jeḡ käy-ännur i-tiwsaten
i-ad-hin-səssiwädəd
əḡəllas ifäyyän n-äkall iket-net.⟩ »

⁴⁸ Əslän inəzzulam i-a-wen ḡas, əddəwen, ad-timələn mäjräd n-Emäli, omänän wi s-ätiwatäs ad-əjrəwän tämudre ta täḡlälät iket-näsän.

† **13:46 13:46** — Ḣur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyəḡnen iket-näsnät, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässināḡ).

49 Intäj mäjräd n-Emäli dāḡ-ākall iket-net.

50 Jän käl-Älyähud erk iman dāḡ-tiḡeḡen ätiwäsämyärnen d-imuzārän n-aḡrəm, oḡä-dd älyizabät səmmän fäll-Buləs d-Bärnäbbas, äsmähäḡän dāḡ-sän äddinät i-ad-ezjārän isäḡlay n-ākall-näsän.

51 Əbbəkbäkän äboqqal n-iḡarän-näsän fäll-aḡrəm-en təzzar, əkkän aḡrəm wa n-Ikanyun.

52 Äqqimän-dd inəṭṭulab wi n-Intyuš ḡarät tekle-näsän, əknan dāḡ-tedäwit, iḡnay-tän dāḡ Unfas Šäddijän.

14

Ija Buləs d-Bärnäbbas isəlan n-älxer dāḡ-Ikanyun

1 Oläs Buləs d-Bärnäbbas dāḡ-Ikanyun iji n-a-wa s-əzzäyän iji-net dāḡ-äzzäman-en-dāḡ, əjjäšän ehän n-äddin wa n-käl-Älyähud, jän dāḡ-s mäjräd-wa-dāḡ fäl omänän käl-Älyähud äjjootnen d-tamətte täjjeet dāḡ-ta n-käl-Älyunan,†

2 mäšan, əssənkārän-dd käl-Älyähud wi s-äqqurän ulhawän-näsän inəzzulam,† jän dāḡ-sän erk iman i-ad-əššunjen äddinät-wi omännen s-ḡisa.

† **14:1 14:1** Itawann'-asän: Gəriktän. (Les Grecs dāḡ-Təfränsit). Əzzaḡän Erobbä dāḡ-ākall wa itawänna: Gəris (La Grèce dāḡ-Təfränsit). Tawalt-näsän: Tälyunanit. † **14:2 14:2** — ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-dāḡ a fäl tiwsaten ti iyyäḡnen iket-näsän, ti n-inəzzulam. — Ašäl-i-dāḡ, änäzzalim, äkafär (ere wärän issen s-Mässinäḡ).

³ Ädwännät Buləs d-Bärnäbbas dār-sän har jän äzzāman, tajjān-asän mājrad ädduutten, tajjähen-asän fäll-Emäli. Ikf'-en daḡ Mässinäḡ ännuḡmät s-tajjān ijitän n-Mässinäḡ d-hārātän ässuksädnen, wār t-illa a tən-ässirmäḡän, ed äsiwār-tän Emäli tärna-net.

⁴ Təbda tamətte n-aḡrəm iket-net, əlkämän iyyäḡ i-käl-Älyähud, əlkämän wi iyyäḡnen i-inəmмуšal.

⁵ Ejjäšan-dd erk iman inəzzulam d-käl-Älyähud iyyäḡ d-imizārän-näsän, ad-tattārän əmmək s-äsmäḡräyän Buləs d-Bärnäbbas, əkfən-tän sämmäjori n-tihun,

⁶ əlmädän inəṭṭulab s-a-wen ḡas, äjewäḡän s-Likawni d-Listra d-Darba d-attayän n-tidbi-tin-däḡ.

Ija Buləs d-Bärnäbbas isälan n-älxer däḡ-Listra

⁷ Jän isälan n-Älənžil däḡ-iḡärman-win-däḡ iket-näsän.

⁸ Aḡrəm wa n-Listra, ih'-e ähaləs n-anəbdon s-a dd-iwa-däḡ, ibdan.

⁹ Islä i-Buləs ämmijrad ḡas, äsjäd-as. Inhäy Buləs däḡ-tiṭṭawen-net a-s ila immun t-äzozäyän, iḡləs ḡas,

¹⁰ inn'-as s-afälla: «Ebdəd fäll-iman-näk.» Iggäd ähaləs, irjäs.

¹¹ Ənhäyän äddinät a-wa ija Buləs ḡas, äsḡären, ənnän däḡ-tawalt ta n-Likawni: «Ašäl-i, məssaw-näḡ dd-falnen išənnawän däḡ-taḡəssa n-dägg-adəm a dd-äzzubbätnen fälla-näḡ.»

12 Jän i-Bärnäbbas isəm Zuss, jän i-Buləs isəm Armas† ed, ənta a ämmijrädän ässaḡät-wen-däḡ.

13 Ošäl-dd u-tikutawen wa n-Zuss ila ehän-n-ämudd wa ihän emm n-aḡrəm, ilwäy-dd iwdesän d-täboyt n-isəhhəska, ad-itattär ənta d-tamətte əmmək s-jän härätän-win-däḡ takute i-Buləs d-Bärnäbbas.

14 Əlmädän inəmmušal s-a-wen ḡas, äsḡärrawen inkubba-näsän fäll-iman-näsän, ošälän s-tamətte äseḡären,

15 jannen: «Ya meddən! Wär jem a-di, ma ämoos a-wa s-täbokäm iji-net? Näkkäneḡ dägg-adəm ḡas a nämoos, wär t-illa a dār-wän nəḡlay. Isälän n-älxer a häwän-näwway i-ad-təbḡəwäm d-mäläyḡna, tutabäm s-Mässinḡ-i n-Ämaḡlal dd-ixläkän išənnawän d-äkall d-ijərwan d-a-wa tän-ihän iket-net.

16 Ibda, oyya əzzurəyyatän-ti okäynen əlkamnät i-erhet n-iman-näsnät

17 mäšan hakd a-wen-däḡ, wär hin-issəbdäd fälla-snät älxer-net. Ənta a fälla-wän dd-äzzäbben ijənnawän, iymär-käwän s-äzzämanän olaynen, ikf'-iwän isudar, ij' älxer däḡ-ulhawän-näwän.»

18 Jannen-asän a-wen-däḡ mäšan, šärnaš d-əḡdälän tikutawen-ti s-ärhan äddinät a tänät-əjən däḡ-təssəba-näsän.

19 Osän-dd härät däḡ-käl-Älyähud dd-falnen Intyuš d-Ikanyun, əzzänän s-Buləs. Əkfän-t

† 14:12 14:12 A-wa ismawän n-härät däḡ-asmel n-imakrašän wi jan käl-Älyunan i-iman-näsän.

sämmäjori n-tihun təzzar, äşrärwrawän-t har t-əzzəzjārän aḡrəm ed, äḡelän äba-t.

²⁰ Elkämän-as-dd inəṭṭulab-net, äḡläyḡäläyän-t ḡas, inkär-dd, oläs ujəş n-aḡrəm. Äffaw ḡas, äddeew d-Bärnäbbas s-Darba.

Iqqäl-dd Buləs d-Bärnäbbas tayrəmt ta n-Intyuş

²¹ Äslänžen aḡrəm-wen-däḡ, jän däḡ-s inəṭṭulab äwwäḡnen härät təzzar, əqqälän Listra d-Ikanyun d-Intyuş.

²² Samätarän inəṭṭulab däḡ-idäggan-win-däḡ d-ad-əṭṭəfän immun s-Mässinäḡ ed, itbat a-s ujəş n-Təmmənəya n-Mässinäḡ, äddeew daḡ d-älḡizabät äjjeen.

²³ Älkänisät əmmärän-däḡ, a däḡ-s səbdədän inušämän, ədələn-asän Mässinäḡ, uzamän təzzar, säḡləfän-tän i-tärna n-Emäli-i s-omänän i-ad-däḡ-sän äj älbäraka.

²⁴ Ejläyän ḡarät-a-wen teje ta n-Bəssidi, okäyän s-ta n-Bänfəli,

²⁵ äxtäbän däḡ-aḡrəm wa n-Birga təzzar ätrarän s-Antalya.

²⁶ Ejjäşän turäft n-aman dihen, jän tamdujt ta n-Intyuş-i-däḡ dd-ämeşälän ḡarät a-s ässiixləfän imumənän i-ännuḡmät n-Mässinäḡ.

²⁷ Osän-in ḡas, äsdawän-dd älkänisät, ad-siḡulän i-imumənän isälan n-a-wa s-tän-ikfa Mässinäḡ turhajät n-iji-net, d-əmmək wa s-ora Mässinäḡ emm n-ehän n-immun i-inəzzulam.

²⁸ Ähojän ḡarät-a-wen əzzaḡän ḡur-inəṭṭulab wi n-dihen.

15

Mäjräd wa ikkän jer-imumənän dāx-isālan n-a-wa iḡallāsän

¹ Äzzāman-en-dāx a dd-fälän meddēn iyyäd teje ta n-Älyāhudəyät, ad-saxren imumənän n-a-s ere wārän ämeläy s-älḡadät wa dd-oyya ännäbi Mosa, wär-e iḡlēs.

² Ija dār-sän Bulēs d-Bärnäbbas tamḡənnant täšsoohet tēzzar, änmärḡän imumənän fäl ad-sukēn Bulēs d-Bärnäbbas d-härät dāx-meddēn n-älkänisät-näsän Yārussālam i-ad-əjēn isālan n-tamḡənnant-ta-dāx i-inəmмуšal d-inušämän wi t-əllänen dihen i-ad-hasän-tät-arēn.

³ Äsofädän-tän-in imumənän n-älkänisät ta n-Intyuš-i tän-täšmašälät s-tizarät, räsän teje ta n-Finisya d-ta n-Sāmari, siḡulän isālan n-əmmək wa s-ätubän inəzzulam† i-Mässināḡ. Ämoos umär wa tän-dd-jän a iknan asəddəwi n-ayətma-sän dāx-äddin dāx-idäggan-win-dāx.

⁴ Ewwädän-in Yārussālam, täsbärräk-tän älkänisät d-inəmмуšal d-inušämän, jän dāx-sän isālan n-a-wa s-tän-ikfa Mässināḡ turhajät n-iji-net s-ifassän-näsän.

⁵ Eḡgädän-dd meddēn iyyäd hanen taggayt ta n-käl-faris tēglät fäll-tidət n-iman-net, ənnän əflasän a-s ämoos amili d-alkum i-alämär wa n-ännäbi Mosa a ifradän fäll-inəzzulam i-ad-əjjəšän Təmmənəya n-Mässināḡ.

† **15:3 15:3** — ḡur-käl-Älyāhud, ere wārän ämoos ägg-Älyāhud s-alāšäl meḡ ere wārän ilkem i-äddin-näsän, iket-net, änäzzalim a ämoos. A-wen-dāx a fäl tiwsaten ti iyyädnen iket-näsät, ti n-inəzzulam. — Ašäl-i-dāx, änäzzalim, äkafär (ere wārän issen s-Mässināḡ).

6 Ǝžžəmmäḡän inəmмуšal d-inušämän i-ad-əjrəwän äddäbara dāḡ-isälan-wi-dāḡ.

7 Təja dāḡ-sän taməzəḡt təşsoohet. Dāḡ-a-wen-dāḡ, ad-dd-ibdäd Bəṭrus jere-sän, inna: «Ayətma-ḡ, təssanäm a-s äru d-hi-äsnäfranän Mässināḡ jere-wän i-ad-säsläḡ inəzzulam isälan n-Älənžil i-ad-amənän s-Mässināḡ.

8 Mässināḡ i issänän a-wa ihän ulh n-ägg-adəm a hasän-imməjrädän, ikf'-en Unfas Šäddijän s-əmmək wa s-hanāḡ-t-ikfa näkkäneḡ-i n-käl-Älyähud,

9 wär t-illa a-s hanāḡ-ažimäzläy dār-sän ed, immun s-Mässināḡ a iššəšdäjän ulhawän-näsän.

10 Šämäd tidət a-wen, adiš mafäl tirəməm Mässināḡ, tajjäm fäll-errawän n-inəṭṭulab äzuk s-näkkäneḡ wäla abbatän-nänāḡ, indär-anāḡ älänji-net?

11 Wädden ännuḡmät n-Emäli Ƴisa-i s-nomän, iḡläs-anāḡ, ənta daḡ a-s omänän əntäneḡ-dāḡ.»

12 Tässosäm tamətte iket-net, äsjädän äddinät ḡarät-a-wen i-Bärnäbbas d-Buləs siḡulän isälan n-ijitän n-Mässināḡ wi jän d-härätän wi ässuksädnen jän jer-inəzzulam.

13 Ǝssəmdän mäjräd ḡas, idkäl-t Yaḡub, inna: «Ayətma-ḡ, säjdät-ahi.

14 Ija dāḡ-nāḡ Simyon Bəṭrus isälan n-əmmək wa s-dd-äšbašaj Mässināḡ s-inəzzulam i-ad-dāḡ-sän isənnəfrən tamətte təlkamät i-isəm-net ed,

15 ämoos a-wen a änimännakän d-a-wa ənnän ännäbitän ed, iktab a-s, innä Mässināḡ:

16 <ḡarät-a-wen, ilkam a dd-äqqələy i-ad-aləsāḡ edey n-ehän n-Dawəd-wa oḡän,

səbdədäx-t-dd däx-timšar-net, ädyäx-t.›

¹⁷ A-wen, däx-təssəba n-ad-immäx a-wa t-illän däx-äddinät i-Emäli, əmmäxnät-as daḡ tiwsaten-ti fäll-itawäxra isəm-in. A-wen, Emäli a tän-innän, erhet-net daḡ den-däx ənta-i ilän tärna n-iji n-härätän-win-däx daḡ den-däx,

¹⁸ wär t-illa daḡ a has-idrajan däx-a-wen-däx, ed issän-t ḡur-aläšäl-net.

¹⁹ Təssəba n-a-wen-däx a fäl hawän-janneḡ a-s, wär täsmäḡatäräm inəzzulam-wi maden-utab s-Mässinäḡ

²⁰ mäšan, nəktəbet-asän təkarḡe n-tamätərt i-ad-əbḡəwän d-härät iket-net äddooben asəmmäḡəs-näsän, əbḡəwnet d-älḡibadät n-äššanämän d-əzzəna d-tetäte n-mäḡsoy d-tesäse n-ašni.

²¹ Ädduuttät a-s ila ännäbi Mosa däḡ-əzzurəyatän-ti-däx hakd-däx ti-okäyən äddinät däḡ-iḡärman iket-näsän ḡarränen əlkəttabän-net hak əssəbət-i n-täsonfat däḡ-ihänen n-äddin.»

²² Änmännakän inəmмуšal d-inušämän d-älkänisät ḡarät-a-wen fäll-ad-sənnəfrənän härät däḡ-meddən-näsän maden-idaw d-Buləs d-Bärnäbbas s-Intyuš, äsdəwän dār-sän daḡ Yahudəs wa itawäḡren s-isəm Bäršabas d-Sillas, əssin meddən a-wen ätiwäsämḡärnen jer-ayətma-sän däḡ-äddin.

²³ Əkfän-tän təkarḡe əktabän s-ifassän-näsän. Ənnän däḡ-s:

A-wa näkkäned inəmмуšal d-inušämän wi n-ayətma-wän däḡ-äddin. Nähuul-in ayətma-näḡ wi s-käla ämoosän inəzzulam hānen In-

tyuš d-Surya d-Silisi.

²⁴ Ijmaḍ-t äššäk a-s nəššəwwäš a-s nəslä ass wa käwän-in-jän meddən hanäḡ-in-falnen wär hin-näšmašäl, nəssan a-s, ənxäsän iman-näwän.

²⁵ A-wen-däḡ a fäl nohär iyyän n-äddäbara iket däḡ-nänäḡ i-ad-käwän-in-nəsuk meddən näsidaw d-Bärnäbbas d-Buləs-i nəkna tärha ed,

²⁶ ämoosän meddən jänen iman-näsän däḡ-miši fäl төssəba n-isəm n-Emäli-nänäḡ YisaÄlmasex.

²⁷ Näšimašäl-in daḡ sär-wän Yähudəs d-Sillas i-ad-hawän-aləsän asuḡəl n-isälan-wi-däḡ.

²⁸ Issəlmäd-anäḡ Unfas Šaddijän, närḍa daḡ s-ad-wär nətəjj fälla-wän äzuk wäl' iyyän säl wa ämoosän färəḍ,

²⁹ a-wen a t-ämoosän, asäxrəm n-tetäte n-takute jat i-äššanämän, asäxrəm n-tesäse n-ašni d-tetäte n-mäḡsoy d-täbəḍḍawt d-iji n-əzzəna. Afäl tətṭäfäm iman-näwän fäll-härätän-win-däḡ, ad-təjəm a ähuusken ed, wär mad-iḡšəd isəm-näwän dat-äddinät.

Nähuul-käwän-in, wässälam!

³⁰ Ärkäbän ḍarät-a-wen, əqqälän Intyuš, äwwayän täkarḍe-tənnin-däḡ. Ewwädän-in ḡas, äsdäwän-dd älkänisät, əkfän älzämaḡät täkarḍe,

³¹ tätwäḡra, ämoosän isälan-wi tät-hänen əssəbab n-tedäwit mäqqoorät.

³² Äsmätär-tän daḡ Yähudəs d-Sillas ed ännäbitän a ämoosän s-iməjridän äjjootnen, sasmaḍän ulhawän n-imumənän, siḡuhun-tän däḡ-immun-näsän.

³³ Ässakäyän härät n-işilan dihen ƣas, fälän-tän imumənän-wi dd-fälnen Yärussalam dăƣ-älxer, eqqälän älkänisät ta tän-dd-täşmaşälät [³⁴ mäşan, äqqima Sillas ɗara-sän].

³⁵ Izzäƣ Buləs d-Bärnäbbas dăƣ-Intyuş-en-dăƣ, saƣr'-en əntäned d-iyyäɗ, xaţţäbän s-älxalän äjjootnen isälan n-Emäli.

Täbəɗɗawt n-Buləs d-Bärnäbbas

³⁶ Härät n-işilan ɗarät-a-wen, innä Buləs i-Bärnäbbas: «Näqqəlet ayətma-näƣ dăƣ-äddin wi hänen iƣärman wi dăƣ-nəja isälan n-mäjräd n-Emäli, nəssən əndek əmmək-näsän.»

³⁷ Ittär Bärnäbbas a-där-sän aləs Exya Marqəs tädiwt

³⁸ mäşan, wär has-irɗa Buləs s-a-wen. Inn'-as, wär-änhäjja a-där-sän idaw ed, ənta iman-net a hin-iƣtäsän iman-net där-sän a-s ɗara-sän ibɗa dăƣ-Bänfəli.

³⁹ Täkkus talƣa jere-sän har dd-oräw a-wen-dăƣ täbəɗɗawt-näsän s-iyyät. Äddew Bärnäbbas d-Marqəs ɗarät-a-wen, əjjäşän turäft n-aman, əkkän Qəbrus.

⁴⁰ Iƣrä-dd Buləs Sillas s-iman-net, iglä ɗarät a-s t-əsseyłäfän ayətma-s dăƣ-äddin ännuƣmät n-Emäli.

⁴¹ Immär Buləs äkall wa n-Surya d-Silisi, isişuhut immun n-älkänisäten dăƣ-idäggan-win-dăƣ iket-näsän.

16

U-Mäsidunya wa ittärän tinahäxen dăƣ-Mäşsinäƣ

¹ Immär Buləs aḡrəm wa n-Darba d-wa n-Listra, ill'-e dihen-däḡ a-s änäṭṭalib iyyän da-däḡ s-isəm-net Timoti, ma-s tamumənt lan käl-Älyähud mäšan, ti-s, i n-käl-Älyunan,†

² jannen fälla-s imumənän wi n-Listra hakd-däḡ wi n-Ikanyun a ähuusken.

³ Iḡr'-e-hi-dd Buləs s-iman-net i-ad-där-s idaw mäšan, äsmaläy-t təzzar i-ad-wär jarrəwän käl-Älyähud wi t-əllänen dihen a fälla-s ənnän ed, əssanän iket-näsän a-s abba-net, i n-käl-Älyunan.†

⁴ Aḡrəm əmmärän-däḡ qarät-a-wen, ad-däḡ-s səmmətärän imumənän däḡ-alkum d-uḍəf n-äddäbaratän-wi hasän-äḡtäsän inəmмуšal d-inušämän däḡ-Yärussälam.

⁵ Samätarän älkänisäten i-ad-işşuhət immun n-inəṭṭulab, isajat-dd Mässinäḡ hak ašäl äddinät äynaynen däḡ-älkänisät əkfanen iman-näsän i-Emäli.

⁶ Ijläy Buləs d-imidiwän-net Frižya d-teje ta n-Gälasya mäšan, wär hasän-irḍa Unfas Šäddijän jan isälan däḡ-äkall wa n-Azya,

⁷ əwwäḍän-dd Masi, əttärän ad-əkkən Bətni mäšan, igdal-asän daḡ Unfas n-Ḷisa s-a-wen,

⁸ əjläyän Masi, äzzubben däḡ-Tärwas.

⁹ Əllan-t dihen-däḡ a-s ähhurjät Buləs u-Masidunya iyyän tiḡarrän, ibdad, iddal Mässinäḡ, ijann'-as: «Ya Mässinäḡ! Šəmmişəl-

† **16:1 16:1** Itawann'-asän: Gəriktän. (Les Grecs däḡ-Təfränsit). Əzzaḡän Erobbä däḡ-äkall wa itawänna: Gəris (La Grèce däḡ-Təfränsit). Tawalt-näsän: Tälyunanit. † **16:3 16:3** Gərik (Grec) däḡ-Təfränsit.

dd sār-näx ere hanäx-ohäxän tinahäxen, näxlös.»

¹⁰ Nəfhäm s-a-wen-däx dd-änfalälän i-Buləs, a-s irha fälla-näx Mässinäx ad-nəsəllənžət tejeten-däx, ad-nətammäx ya i-əmmək s-nəkka Masidunya. Yur-dihen-däx ad-tän-dd-əjjäšäx, ohäräx d-Buləs asikəl näkk-i iktäbän isälan-wi-däx.

¹¹ Nəjjäš turäft n-aman däx-Tärwas, nəja s-iyyəät tamdujt ta n-Somättras, äffäw nəkka Näyyabolis;

¹² nəfäl dihen, nəkka ayrəm wa n-Fəlibb-i s-ənta a itammär ere dd-ijjäšän Masidunya s-tizarät, ämoos dağ ayrəm fäll-ixkam Roma, nässakäy härät n-išilan dihen.

Ija Buləs isälan n-älxer däx-tayrəmt ta n-Fəlibb

¹³ Ašäl wa n-əssəbət-i n-täsonfat, nəzjär ayrəm, nəkka asälim n-əjärew ed, norda s-ad-däx-s nəjrəw edägg ištärän däx-nədäl Mässinäx, nogäz-in dihen tideden äžžiiimmäxnen, näqqima ad-hasnät-nətajj isälan.

¹⁴ Täsjäd-anäx tiyyät däx-snät n-tämaksadt n-Mässinäx s-isəm-net Lidya, tu-mamälat n-ayrəm wa n-Təyatir hin-žänšet mäšär wa n-nefran n-ini šäggäxän. Orä Emäli ulh-net, tomän s-a-wa has-ijänna Buləs,

¹⁵ tätwäsälmäx däx-aman ənta d-käl-ehän-net. Tənnä i-Buləs d-imidiwän-net qarät-a-wen: «Kunta təflasäm a-s tamumənt n-Emäli a ämoosäx, məjuretät-ahi». Laqqäd-anäx har hanäx-täšhäššäl s-a-wen.

16 Noläs day nökka edägg n-tittar a-s hanäx-dd-tölkäd tänaxdimt tiyyät ih' alšin iknan tälläbäst, tämoos i-mössaw-s əssəbab n-ärrezäx ed, itiləxut alšin wa tät-ihän a-wa ilkämän, təzzälän-as äddinät.

17 Tənhäy-anäx xas, tältäx-anäx, e-s nökka-däx täsexärät dara-näx, janna: «Ya äddinät, əlmədät a-s meddən-wi-däx hannäyäm, eklan n-Mässinäx wa iknän aḍkul, isälan n-tabarät ta n-əlxəllas a-s dd-osän i-ad-tän-əjən.»

18 Təj'-anäx alkum-wen-däx har ja išilan, təglä fäw har täsxäf Buləs; ämlälläy-dd sār-s, äsmähäd fäll-alšin wa tät-ihän, inn'-as: «Omaräx-käy s-isəm n-Ÿisa Älmasex, əsjär-tät!» Izjār-tät alšin ässaḡät-wen-däx.

19 Ənhäyän mössaw-s a-s taklit-näsän äbas-hasän-dd-saxsal ehäre xas, ärmäsän Buləs d-Sillas, əlwäyän-tän s-əxärxär wa n-tamxənnant s-itawänna Larofaž däx-itamär äššärexa, əssəbdädän-tän dat-älqallitän,

20 əssəknän-tän darät-a-wen day i-käl-äššärexa wi n-Roma, ənnän-asän: «Meddən-i n-käl-Älyähud hannäyäm, wär dd-äwweyän a säl äḍḍärora s-axrəm-nänäx,

21 sasäxren äddinät älxadatän s-näkkäneḍ-i n-käl-Roma wär hanäx-t-illa uḍəf-näsän wälä alkum-hasän.»

22 Təsla tamətte i-a-wen xas, təzzän sār-sän. Ənnän käl-äššärexa, ətwəkkəsnet isəlsa däx-Buləs d-Sillas, ättäwätnet.

23 Əknän-tän asəsnan təzzar, jārän-tän-in däx-takärmüt däx-a-s ənnan i-əssärdusa ad-hasän-əknən iji n-ənniyät.

24 Ätwännä a-wen i-emännähäđ n-takärmuť ɣas, ija dăɣ-sän tišəm, ij'-en dăɣ-söllul.

25 Ebre n-ammas n-ehäđ, irmäs Buləs d-Sillas äsahăɣ n-təmmal i-Mässinăɣ, äsijädän-asän käl-takärmuť wi iyyäđnen.

26 A əndärrän-dăɣ äškăđkăđ-dd äkall daw-sän s-äşşahăt här äsnähăynähăy issas n-takärmuť, ämerän isăɣfal n-takärmuť iket-dăɣ-năsän ässaɣăt-wen-dăɣ, ämeränăt daɣ tišəm-năsän.

27 Inkär-dd emännähäđ n-takärmuť dăɣ-eđəs, inhăy tishar n-takärmuť ämeränăt ɣas, ilbăy-dd takoba-net i-ad-săr-s idəj iman-net ed, äɣel käl-takärmuť wi iɣläf, əjmăđän.

28 Măšan, äşyărăt-as Buləs s-afälla, inn'-as: «Ahaa! Wăr jed a-di, nöll'-e diha iket-nănăɣ.»

29 Irmäs-dd emännähäđ n-takärmuť emämmäl n-efew s-inhăy data-s, oşäl-dd, irkăɣ dat-Buləs d-Sillas äşikăđkăđ,

30 ikkăs-tän-dd dăɣ-ammas n-takärmuť təzzar, inn'-asän: «Meddən, ma s-leɣ s-ad-t-äjjäɣ i-ad-äɣləsăɣ?»

31 Ənnän-as: «Amən kăyy d-ejädăş-năk s-Emăli ɶisa, ad-tăɣləsăm.»

32 Äxtăbän-as măjrăd n-Emăli ənta d-käl-ehän-net älwăqq-wen-dăɣ.

33 Ilwăy-tän dăɣ-tăkkăwălt n-ehäđ-en-dăɣ s-ehän-net, issəfăr ibuyəsän-năsän, ätwăsälmaɣ dăɣ-aman đarăt-a-wen ənta hakd käl-ehän-net iket-năsän.

34 Äsmăjarăt-tän dăɣ-a-s ikna tedăwit ənta d-käl-ehän-net n-a-wa s-omănän iket-năsän s-Mässinăɣ.

³⁵ Äffäw ɣas, äšmašälän-dd käl-äššäreɣa meddөн s-emännähäð n-takärmüt i-ad-hin-isəwwəy Buləs d-Sillas.

³⁶ Ija däɣ-sän emännähäð isälan n-a-wa өnnän käl-äššäreɣa mäšan,

³⁷ inn'-as Buləs: «Fäw, šämad jän däɣ-näɣ tiwit dat-tamөtte, a-s ija a-wen, wär nätwäšräɣ, näkkäneð-i äððinnen fäll-Roma, jārān-anäɣ-in däɣ-takärmüt s-өmmək-wa-däɣ, ämära ārhan ad-hin-nətwəyy däɣ-ufär, wär närða s-a-wen, asөnet-dd өntäneð iman-näsän, səwwəyyөн-anäɣ-in.»

³⁸ Eqqälän meddөн-wi dd-ämešälnen, äsoɣälän isälan n-a-wa inna Buləs i-imännähäðän. Eslän i-isälan n-a-s Buləs d-Sillas äððinän fäll-Roma ɣas, ärmäɣän.

³⁹ Osän-tän-dd ðarät-a-wen өntäneð iman-näsän, өttärän tenäšše däɣ-Buləs d-Sillas, өkkəsän-tän-dd däɣ-takärmüt däɣ-a-s däɣ-sän өttärän ad-өfөлөн aɣrəm-näsän.

⁴⁰ Ezjārān-dd takärmüt ɣas, өkkän ehän wa n-Lidya, ad-samätärän dihen ayөtma-sän däɣ-äðdin d-alkum i-Mässinäɣ təzzar, өglän.

17

Buləs d-Sillas däɣ-aɣrəm wa n-Täslonika

¹ Ejläyän Änfibbolis d-Abulөbbis, osän-dd Täslonika ɣas, ijjäš Buləs ehän n-äðdin wa n-käl-Älyähud

² ed a-wen-däɣ a-s izzay ad-t-äj. Ija dihen käreð өssөbөtän itidwөnnit d-käl-Älyähud däɣ-isälan n-a-wa өnnän өlkөttabän n-Mässinäɣ.

3 Itafässar-asän-tän, isatbat-asän a-s iktab dāḡ-sän a-s Älmasex, ilzam-t ad-inhöy tersəmmawen, ämmät təzzar, inkär-dd jer-inəmmuttan. Ijann'-asän daḡ a-s Ƴisa-wa hasän-ixatṭāb a-s Älmasex.

4 Ekkäsän iyyäḍ dāḡ-sän äššāk dāḡ-a-wa hasän-ijanna, ölkämän-asän daḡ käl-Älyunan† äjjootnen äddinnen d-tiḍeden äjjootnen lanen isəm dāḡ-aḡrəm.

5 Mäšan, osämän fälla-sän käl-Älyähud, öglän, äsdäwän-dd härät dāḡ-erk äddinät, äsmädärwäyän aḡrəm təzzar, ökkän ehän wa n-Yazun, əmmaḡän i-Buləs d-Sillas i-ad-tän-səbdəḍän dat-tamötte, təšräḡ-tän.

6 Wār tän-in-ogežän dihen ḡas, oḍän fäll-Yazun iman-net, äšräwräwän-t ənta d-imumənän iyyäḍ, əssəbdəḍän-tän dat-imännähəḍän n-aḡrəm, ad-tän-sawarän käl-Älyähud uḍlem, jannen: «Äddinät-wi-dāḡ, äkall iket-net a äsnäxänbälän siha d-siha təzzar, əwwäḍän-anäḡ-dd ämära,

7 əntäneḍ-da-dāḡ äsmäjarät Yazun, ad-tajjän härätän əšlaynen i-a-wa innä ämänokal wa mäqqārän ed, jannen ill'-e ämänokal säl Qäyşär s-isəm-net Ƴisa.»

8 Wār-əjrežän isälan-wi-dāḡ i-tamötte wäla i-imännähəḍän n-aḡrəm,

9 äḡtäsän i-Yazun d-imumənän wi iyyäḍnen äddäyyät s-lan s-ad-t-əzələn i-əlxəkum təzzar,

† 17:4 17:4 Itawann'-asän: Gərıktän. (Les Grecs dāḡ-Təfränsit). Ezzaḡän Erobbā dāḡ-äkall wa itawänna: Gəris (La Grèce dāḡ-Təfränsit). Tawalt-näsän: Tälyunanit.

ətwəyyən-in.

Buləs d-Sillas dāχ-ayrəm wa n-Biri

¹⁰ Ʒnhäyän imumənän tukəse n-talχa-ta-dāχ ɣas, əssəjmädän Buləs d-Sillas ehäḍ-wen-dāχ, əssokän-tän ayrəm wa n-Biri. Ʒwwädän-in dihen ɣas, əkkän ehän n-äddin wa n-käl-Älyähud.

¹¹ Ʒssəknän-tän käl-ayrəm wa n-Biri tārha tojārät ta n-käl-Täslonika, ed əntäneḍ, əslän i-mäjräd n-Mässinäχ ɣas, omänän sār-s šik, ad-χarrän hak ašäl əlkəttabän, tassänän a-wa hasän-itawännen tidət meχ.

¹² Omänän dāχ-sän äddinät äjjootnen hanät tiḍeḍen äjjootnen n-Tälyunaniten lanen isəm d-meddən dāχ äjjootnen.

¹³ Ʒslän käl-Älyähud wi n-Täslonika a-s itajj Buləs isälan n-mäjräd n-Mässinäχ dāχ-Biri ɣas, əlkämän-as-dd, ad-tattārän dāχ asənkär n-tamətte fälla-s ənta d-imidiwän-net;

¹⁴ əssəglän imumənän Buləs ḍarät-a-wen dāχ-armuḍ, əssəjmädän-t ayrəm s-ašrut wa n-əjärew mäšan, äqqimä-dd ɣur-sän Sillas d-Timoti.

¹⁵ Äddewän meddən wi hin-ässofäḍnen Buləs har hin-əwwädän ayrəm wa n-Atinya təzzar, ənnädän-dd, əssawäy-tän Buləs əmašal i-ad-has-dd-ilkəm Sillas d-Timoti dāχ-armuḍ.

Buləs, dāχ-ayrəm wa n-Atinya

¹⁶ Isimäqqul-asän Buləs dāχ-Atinya dihen-dāχ a-s inxäs a-wa ihannäy iman-net fäl əjut-i-dāχ jän äššanämän dāχ-ayrəm-en-dāχ.

17 Iglä, ädwännät d-käl-Älyähud däḡ-ehän n-äddin-näsän, ad-itidwənnit daḡ hak ašäl d-inaxbadän n-Mässinax wi hänen eḡarḡar wa n-tamḡənnant s-itawänna Larofaž.

18 Ädwännən dār-s dihen käl-fälšäfa wi s-itawänna käl-Ibbikur d-iyyəḍ s-itawänna käl-Stoyis. Jannen däḡ-sän iyyäḍ: «Ak i n-iləs šəjren-wa, ma ijanna?» Jannen wi iyyäḍnen: «A-wa məssaw-nax iyyäḍ fäll-wär nəssen əzzaḡnen išənnawän a-s hanax-ixaṭṭāb isälan-näsän.» Jannen a-wen fäl-a-s ij'-asän Buləs isälan n-älxer n-Ḳisa d-isälan n-tanakra jer-inəmmuttan.

19 Ärmäsän Buləs dārät-a-wen, əlwäyän-t s-Larofaž, ənnän-as. «Šäsəl-anax ya ämära isälan n-teḡäre ta täynayät dār-hanax-dd-tosed

20 fäl-a-s käyy, tikunen ti s-hanax-säsled, wär käla hasnät-nəsla däḡ-äddunya, fässār-anax älmäḡna-näsän.»

21 Äzzāman-en, käl-Atinya hakd-dax imäjarän-näsän, wär t-illa ere s-wädden issan a-s wär-oren timəzzujen ar dax-umax n-isälan d-iji-näsän.

22 Ibdād-dd Buləs dax-ämmas n-Larofaž, eḡarḡar wa n-tamḡənnant, innä: «Ya käl-Atinya, dax-a-wa hannäyax, ijmaḍ-t äššāk a-s təjlayäm hullan dax-äddin wa häm,

23 əssaxläyax-dd dax-axrəm-nawän, əkney azəjjəzz n-idəggan n-älḡibadät-nawän, əgleḡ faw har oḡeḡ fäll-edəgg n-tikutawen-nawän fäll-iktāb:

⟨I-Ämakraš wa wär nəzzey⟩.

Əlmədät ašäl-i, a-s Wa ƣabbädäm wär t-təzzeyäm a-wa hawän-ija älžähalät, ənta a-s hawän-tajjäƣ isälan-net.

²⁴ Mässinäƣ-i dd-ixläkän äddunya d-a-wa tät-ihän iket-net, ənta-i n-Emäli n-išənnawän d-äkall, wär-itəzzäƣ ehän dayän ifassän-n-ägg-adəm,

²⁵ wär-ämƣatär s-tadhəlt n-ifassän n-ägg-adəm wäla s-härät wäl' iyyän ed, ənta a ihakkän e d t-illäm ägg-adəm tämudre, ənta dəƣ a ihakkän unfas d-tämudre i-härät iket-net.

²⁶ Ənta a dd-ixläkän ähaləs-wa dd-äshäyāwän e d t-illäm ägg-adəm iwarän ärori n-äkall, ənta a iƣtäsän täkost n-ikallän wi tazžäƣän, ənta dəƣ a hanäƣ-dd ijän äzzämanän.

²⁷ A-wen, ij'-e Mässinäƣ i-ad-has-əmmäƣän äddinät kud-däƣ s-ekälelaf i-ad-t-əjrəwän ed, ijmađ-t äššäk a-s Mässinäƣ, wär hanäƣ-iha i ujəj.

²⁸ Ənta a hanäƣ-ikfän tämudre d-emäremar d-tumast. Mäjräd-wen-däƣ, täsdättät täsawit-näwän ta tənnät:

⟨Noläh dār-s ed nəmoos aratän-net.⟩

²⁹ ƴas, šamad nəmoos aratän-net, adiš təläš fälla-näƣ torda n-a-s Mässinäƣ änifäqqa d-a ämoosän oräƣ meƣ aƣrəf meƣ təhunt meƣ ättaşwer dd-izjarän təhore wäla tayətte n-ägg-adəm.

³⁰ Əlmədät a-s Mässinäƣ, iwətyan-wi ässakäyän äddinät dəƣ-älžähalät, wär tän-ixseb fäll-errawän-näsän, a-wen-däƣ a fäl ämära, omar i-e d t-illäm ägg-adəm dəƣ-e d-t-illäm edägg s-ad-utab

³¹ fäl-a-s ässiibdäd ašäl dăḡ-mad-išrăḡ äddunya-ta-dăḡ s-ăhaləs-wa äsnăfrăn tat-madăn-išrăḡ s-iqqud. A-wen, issətbăt-t Măssinăḡ i-tamətte iket-net s-əmmək wa s-dd-issənkăr Ȳisa jer-inəmmuttan.»

³² Təslă tamətte i-isălan n-tanăkra jer-inəmmuttan ḡas, jăn-t iyyăḡ tekăškăšt, ənnăn-as iyyăḡ: «Eḡləw, tăqqəlăd-anăḡ-dd ašäl iyyăn săl wa i-ad-naləs asjəd i-isălan-wi-dăḡ.»

³³ Ifăl Buləs jere-săn älwăqq-wen-dăḡ măšan, əlkămăn-as iyyăḡ omănnen s-a-wa innă.

³⁴ Äddinăt-en, ih'-en Denis wa ijăn ənniyăt i-Larofaž d-tamăḡt tiyyăt s-isəm-net Dămaris d-iyyăḡ daḡ săl-win-dăḡ.

18

Akilas d-Briska

¹ Ifăl Buləs Atinya ḡarăt-a-wen, ikkă aḡrəm wa n-Kurənta.

² Ämmoqqăs dihen d-ăgg-Ălyăhud n-ăkall wa n-Fon s-isəm-net Akilas. Iket-dd ifăl Iḡali ənta d-hănne-s s-isəm-net Briska fäl-a-s äzziizjăr-dd ämănokal n-ăkall Kəlod alămăr dăḡ-iktab a-s, əzjărnet kăl-Ălyăhud iket-năsăn Roma.

³ Ämedăw Buləs d-Akilas ed oharăn älxidmăt wa n-iji n-ihəktan.

Buləs d-Sillas, dăḡ-aḡrəm wa n-Kurənta

⁴ Hak əssəbət-i n-täsonfat, isatbat Buləs isälan i-äddinät dāḡ-ehän n-äddin i-käl-Älyähud hakd-dāḡ käl-Älyunan.†

⁵ Iwwäd-dd Sillas d-Timoti Buləs, falän-dd Masidunya ḡas, oyyä iji n-ihəktan, ikfä iman-net axətab n-mäjräd n-Mässinäḡ, itajäyha i-käl-Älyähud a-s ḡisa a-s Älmasex.

⁶ Äšmäšakken a-wa hasän-ijanna, ad-sikuforän. Ibbəkbäk Buləs isəlsa-net, inn'-asän: «Ədmanän dāḡ-wän iman-näwän, äbas dāḡ-i ədmanän, ämära, inəzzulam a-s e-ənnädäḡ, äjāḡ-asän isälan.»

⁷ Ifäl Buləs dihen, ikk' ehän n-ähaləs s-isəmet Titus Istus, änaḡbad n-Mässinäḡ s-änimältaḡ ehän-net d-wa n-äddin.

⁸ Dāḡ-a-wen-dāḡ, ad-omän Krisbus wa n-älfaqqi n-ehän n-äddin s-Emäli ənta hakd d-əjadäš-net d-käl-Kurənta äjjootnen äsijädnen i-Buləs; omänän, ad-titwəsəlmiḡän dāḡ-aman.

⁹ Ehäd iyyän, änfäläl-dd Emäli i-Buləs, inn'-as: «Buləs, wär käy-isärməḡet härät, mäjräd, wär tässosämäd,

¹⁰ əlleḡ-t edes-hak, ədhaläḡ-käy, wär t-illa ere hak madän-iḡšəd härät fäl-a-s leḡ tamətte täjjeet s-ärheəḡ ad-tät-äḡləsəḡ dāḡ-aḡrəm-wa-dāḡ.»

¹¹ Izzäḡ Buləs dihen har ija awätay d-sädis orän, isaḡra äddinät mäjräd n-Mässinäḡ.

¹² Äzzäman wa d-ämoos Galyon gəfar n-Akaya,

† **18:4 18:4** Itawann'-asän: Gəriktän. (Les Grecs dāḡ-Təfränsit). Əzzaḡän Erobbä dāḡ-äkall wa itawänna: Gəris (La Grèce dāḡ-Təfränsit). Tawalt-näsän: Tälyunanit.

änmännakän käl-Älyähud fäll-Buləs, äxrän-t s-älqallitän i-ad-t-əšräḡän.

¹³ Äswärän-t uḡlem dat-gəfär, ənnän-as: «Ähaləs-i, isaḡra äddinät älyibadät n-Mässinäḡ s-älḡadät änimäšrayän i-a-wa innä alämär.»

¹⁴ Ittär Buləs ad-arr emm-net i-ad-ämmäjräd ḡas, innä Galyon i-käl-Älyähud: «Ənnär anməšri i-äššäreḡa meḡ erk ämašal a fäl hi-dd-tökkäm i-ad-hawän-aräḡ äššäreḡa-net, äjäḡ-awän-t

¹⁵ mäšan, šamad a-wa tamädašt jat fall-tijəttewen n-teḡäre-näwän d-ismawän wi əktäbnen däḡ-alämär-näwän, wär-ärheḡ ad-umasäḡ älqalli-näwän däḡ-isälan-win-däḡ, əšräḡät-tän käwäneḡ iman-näwän.»

¹⁶ Äsfäl-tän Galyon ehän wa n-äššäreḡa ḡarät-a-wen.

¹⁷ Təzzän tamətte iket-net s-Sustin wa n-älfaḡqi n-ehän n-äddin, ad-t-təggatän dat-älqallitän mäšan, wär t-illa a hasän-inna Galyon wa n-gəfär.

¹⁸ Ähoja Buləs däḡ-Kurənta təzzar, ässälläm fäll-imumənän, əkfän-t turäft n-aman ijjäš s-äkall wa n-Surya, igla, äddew d-Briska d-Akilas. Əwwäḡän-in aḡrəm wa n-Sänkərya ḡas, ästäbälbäl Buləs i-ad-umas a-wen a ässitbätän ärkawäl wa ijjäš.

¹⁹ Osän-dd aḡrəm wa n-Ifäsus ḡas, ibḡa darsän Buləs, ijjäš ehän n-äddin, ad-itidwənnit d-käl-Älyähud.

²⁰ Əttärän däḡ-s ad-ḡur-sän ähaj

²¹ mäšan, wär hasän-irḡa s-a-wen ed, inn'-asän: «Kunta otäs Mässinäḡ a-wen, ilkam ad-

käwän-dd-äqqələχ.» Ifäl-tän, ijjäš turäft n-aman,

²² äzzubbät däχ-Qäysära darät-a-wen. Ijjäš aχrəm, ässälläm fäll-älkänisät təzzar, okäy s-Intyuš.

²³ Ija härät n-išilan dihen χas, ijläy s-teje ta n-Gälasya d-ta n-Frižya. Edägg immär-däχ, ad-däχ-s isəmmətär inəttulab i-ad-isəşsuhət immun-näsän.

Isälan n-Äbbäloš

²⁴ A-s itäjj a-wen-däχ, aχrəm wa n-Ifäsus, ih'e ähaləs n-ägg-Älyähud il' aχrəm wa n-Iskändərya s-isəm-net Äbbäloš. Äχalim iknan musnät n-mäjräd a ämoos, ikna daχ teχäre n-a-wa ənnän əlkəttabän.

²⁵ Han-t isälan n-tabarät n-Emäli, ijlay hul-lan däχ-a-wa iha, itamäjräd, isayra s-älmäχna oχadän isälan n-Ŷisa däχ-a-s wär t-təha tijya ar ta n-asəlmay däχ-aman wa n-Exya.

²⁶ Təsl'-as Briska d-Akilas a-s ixtäb s-tihusay däχ-ehän n-äddin wa n-Ifäsus χas, äχrän-t-dd s-iman-näsän, ad-t-sasayadän, tafässarän-as tabarät n-Mässinäχ.

²⁷ Äsdärhän Äbbäloš darät-a-wen tikawt n-äkall wa n-Akaya, ədhälän-t imumənän däχ-derhan-net wen-däχ, əkfän-t təkardə i-inəttulab wi n-äkall-en i-ad-t-səbbärrəkän afäl tän-in-iwwäd. Iwwäd-in χas, ämoos tadhəlt mäqqoorät i-äddinät-wi omänneren s-ännuχmät n-Mässinäχ.

²⁸ Isibəggut s-tayətəte käl-Älyähud dat-tamətəte, isasäjräh-tän a-s Ŷisa a-s Älmasex.

19

Ijjäš Buləs aḡrəm wa n-Ifäsus

¹ Äzzäman-wen-däḡ d-iha Äbbäloš Kurənta, ad-ijläy Buləs ejärew s-afälla n-äkall, ikka Ifäsus. Ijrāw dihen härät däḡ-inəṭṭulab,

² inn'-asän: «Ak käwäneḡ, a-s tomänäm, təjrāwäm Unfas Šaddijän?» Ənnän-as: «Wär käla nəslä fäw a-s t-illa a-s itawänna Unfas Šaddijän.»

³ Inn'-asän: «Adiš ma ämoos asəlməḡ wa hawän-ätwäjjän?» Ənnan-as: «Asəlməḡ wa n-Exya.»

⁴ Inn'-asän Buləs: «Exya, issəlməḡ tamətte däḡ-aman i-ad-umas a-wen ašämol n-tätubt-näsän mäšan, illäḡät i-äddinät a-s ilkam iyyän wär-ämoos, a-wen a t-ämoosän Ƴisa, ənta-en-däḡ a-s lan äddinät ad-sär-s amənän.»

⁵ Əslän meddən-en i-mäjräd-wen-däḡ ḡas, əttärän ad-ətwəsəlməḡän däḡ-aman s-isəm n-Emäli Ƴisa.

⁶ Äswär-tän Buləs darät-a-wen ifassän-net, äzzubbät-dd Unfas Šaddijän fälla-sän, ad-tamäjrädän tawalen äynaynen, tamajradän däḡ-isälan n-Mässinäḡ.

⁷ Meddən-en, märaw-essän d-əssin.

⁸ Itakk Buləs ehän n-äddin wa n-käl-Älyähud, ixatṭäb däḡ-s tidət s-äššahät har ässakäy dihen käraḡ orän, itidwənnit d-äddinät, isatbat-asän isälan wi n-Təmmənəya n-Mässinäḡ.

⁹ Mäšan, äsḡärän iyyäḡ däḡ-sän ulhawän-näsän, unjäyän omänän s-a-wa ijanna, əḡlän fäw har jannen a läbasän fäll-tabarät-ta-däḡ

s-itäj Buləs isälan-net dat-tamötte. Ikkäs-dd Buləs iman-net dāḡ-sän, ad-isayra hak ašäl inəṭṭulab dāḡ-läkkol n-äddin ora ähaləs s-isəm-net Tiranus.

10 Išl'-e a-wen-dāḡ dihen har əssin iwətyan, əmmək-wen-dāḡ a-s əslän käl-Azya iket-näsän i-mäjräd n-Emäli jer-wi n-käl-Älyähud-näsän hakd-dāḡ wi n-käl-Älyunan.†

11 Itajj Mässinäḡ s-ifassän n-Buləs tikunen äjjootnen, äqqannen eḡäf,

12 tišələn-dd äddinät sār-s, tazāwen imälsan d-ikäršäyän t-časnen, sänsen-tän fäll-imarhinän, tazāyän, zajjārän daḡ alšinän iməlšan.

13 Əggädän-dd imässäxärän n-käl-Älyähud takkänen jer-ikallän, ad-ḡarrän əntāneḡ-dāḡ fäll-iməlšan isəm n-Emäli Ȳisa-wa ixatṭāb Buləs.

14 Meddən-wi išla a-wen-dāḡ, əssa-essän, abba-näsän u-tikutawen s-isəm-net Žibba.

15 E-d əttārän teḡäre n-isəm n-Ȳisa fäll-iməlšan, ad-hasän-änn alšin: «Näkk ya əzzaḡāḡ Ȳisa, əssanāḡ daḡ a-wa ämoos Buləs-i t-ixatṭābän mäšan kəwāneḡ, mi tämoosäm?»

16 Oḡa fälla-sän amälšon iyyän, iknäs-tän ed irn'-en äššahät, ikn'-en asəlmaḡ hundāḡ har a-s əzjārän ehän-en-dāḡ, əzzafän, šārän.

17 Əslän käl-Älyähud hakd käl-Älyunan-wi hänen Ifäsus i-isälan-en-dāḡ ḡas, ärmāḡän ad-samḡarän isəm n-Emäli Ȳisa.

† 19:10 19:10 Itawann'-asän: Gəriktän. (Les Grecs dāḡ-Təfränsit). Əzzaḡän Erobbā dāḡ-äkall wa itawänna: Gəris (La Grèce dāḡ-Təfränsit). Tawalt-näsän: Tälyunanit.

18 A dd-tisən äddinät äjjootnen omannen s-Mässinäḡ, safäkkarän-dd terk timaşalen-näsän.

19 Äwwäyän-dd imässäxärän äjjootnen əlkəttabän-näsän, ad-tän-saryen dat-tamətte iket-net, ädkäḡän älqim n-a-wen-däḡ irḡän, osän-t, iwwäḡ səmmosät timərwen n-efäḡ n-ärriyal n-azrəf.

20 Emmək-wen-däḡ a-s təntäm tärna n-Mässinäḡ d-äşşahät n-mäjräd n-Emäli däḡ-uhawän n-äddinät, ad-nattäjän daḡ isälan-net.

21 Ijjäş-dd ḡarät-a-wen ənniyät n-Buləs tärha n-ad-ijləy Masidunya d-Akaya, äkk Yärussälam, ijanna däḡ-iman-net a-s afäl-hin-iwwäḡ dihen, ad-ittär əmmək s-ikka Roma.

22 Äşmaşäl Timoti d-Erräst wi n-imadhalän-net s-Masidunya, ija ənta äzzäman däḡ-Azya.

Aḡwi n-iji n-isälan däḡ-Ifäsus

23 Äzzäman-en-däḡ ad-təja tamdərwayt mäqqoorät fäl tössəba n-tabarät n-Emäli-ta isaḡra Buləs.

24 Iggäd-dd enhäḡ iyyän s-isəm-net Dimitrus, ikanna ätḡäşwerän n-azrəf fäll-äşsiwwär idəm n-temälit tiyyät s-isəm-net Artamis, ämoos a-wen a ih' älfäyda mäqqoorän i-inhäḡän ed, itiirəw-dd sär-sän ehäre n-tikunen.

25 Äsdäw-dd inhäḡän-wi där-ohär älxidmät, inn'-asän: «Meddön, nəhläk, tössanäm a-s älxidmät-nänäḡ, a-s terše-nänäḡ, wädden hannäyäm, salläm daḡ däḡ-Ifäsus hakd-däḡ däḡ-Azya iket-net a-s Buləs-wa-hi,

26 äsmättäy tamətte täjjeet ed edägg osa-däḡ, ad-däḡ-s änn a-s: <Imakraşän wi nəkann s-ifassän-nänäḡ, mälayäḡna ḡas.>

27 Ämoos-anäx a-wa t-işlän säbxas, ämoos-t dağ i-ehän n-ämudd wa n-Artamis fäl-a-s işwar äba s-tät-ässimxärän äddinät wi tät-xabbädnen däx-İfäsus d-ikallän n-äddunya wi iyyäḏnen.»

28 İslän i-a-wen xas, ijjäş-tän aḏkär, ad-saxären däx-işənnawän, jannen: «Artamis ta n käl-İfäsus, ənta a-s mässa-näx ta tojarät däx-işənnawän d-äkall.»

29 Ämdärwäy axrəm iket-net, ad-dd-tidaw tamətte s-ehän wa n-äddäl d-ižəjraz. Təzzän tamətte s-Gayəs d-Aristarəq wi n-Masidunya n-imidiwän n-Buləs dər-ohär asikəl, əlwäyän-tän.

30 İttär Buləs ənta-däx ad-äkk ehän wa n-äddäl d-ižəjraz məşan, əgdalän-as inəṭṭulab s-a-wen,

31 äsmätärän-t dağ imizärän n-Azya n-imidiwän-net t-əllanen dihen-däx d-ad-wär-ikka ehän-en.

32 A-s itäj a-wen-däx, təsexärät tamətte däx-işənnawän, ämidärwäy a-wen-däx iket-net s-işəran, wär t-illa-i s-olähän işəran-net d-wi n-amidi-net, fäl-a-s təşşəm n-tamətten-däx, wär təssen wälä-däx äddälil n-tamdərwayt-ta-däx təjät.

33 Əmhälän-dd käl-Älyähud ähaləs s-isəm-net Älxadə i-ad-iməl dat-tamətte, jän-as isälan n-a-wa ijän, ästafäy-asän i-ad-hasän-ämmäjräd

34 məşan, təlmäd tamətte a-s i n-käl-Älyähud xas, ad-saxären, jannen: «Artamis ta n-käl-İfäsus, ənta a-s mässa-näx ta tojarät däx-işənnawän d-äkall.» Təsexäyya tamətte s-əmmək-wen-däx hundäx har okäyän əssin əssaḡätän.

³⁵ Iggäd-dd älmer n-aḡrəm wa n-Ifäsus, ad-
isasmaḍ tamətte, ijann'-as: «Ya käl-Ifäsus, mi
wārän issen dāḡ-äddunya a-s näkkäneḍ-i-dāḡ n-
Ifäsus a iḡlafän ehän wa-dāḡ titwāḡbid Artamis
ta tojārät, ənta d-tele-net ta täššiwwārät dāḡ-
tähunt ta dd-täträkket dāḡ-išənnawän?

³⁶ ḡas, šamad a-wen, wār t-ih' äššäk, adiš,
sänsät ənniyät-nāwän, wār täjjät a išlayän,

³⁷ meddən-wi dd-tāwwāyäm, wār-äskafārän,
wār-ənnen daḡ a läbasän fäll-mässa-näḡ,

³⁸ kunta äḡšadän a läbasän i-Dimitrus d-
imidiwän-net, adiš, əqqəlnet i-išilan wi dāḡ-
itaḡätäs äššäreḡa ed, əllan-t älqallitän i-a-wen,
əškəwnet sär-sän;

³⁹ kunta daḡ täsiwāräm-tän udlem säl wen-
dāḡ, ad-itwāḡtəs äššäreḡa-net dāḡ-älzāmaḡät wa
ilän s-a-wen.

⁴⁰ Afäl wār nəlkem i-äddäbara-wen-dāḡ, ad-
hanāḡ-isəwār əlxəkum udlem ed aḡəmmāḡ-
nänāḡ ämära-dāḡ, wār-ila äddälil.»

⁴¹ Innä älmer a-wen ḡas, innä i-tamətte, ad-
tämmähš.

20

Asikəl n-Buləs s-Masidunya d-Älyuna

¹ Tokäy tamdərwayt, sämmiḍ tanfust ḡas,
issäḡrä-dd Buləs inəṭṭulab, ad-tän-isamätar,
isasmaḍ ulhawän-näsän, issəlläm fälla-sän
ḍarät-a-wen, ikkä teje ta n-Masidunya.

² Issäḡläy-dd dāḡ-s iket-net, isamätar
imümənän. Ifäl dihen, ikk' äkall wa n-Älyuna,†

† 20:2 20:2 Gəris (Grèce) dāḡ-Təfränsit.

³ ässakäy dihen, kărađ orän; älwäqq wa d-itëffal äkall-en, äkk wa n-Surya, ëjjäšan-t isälan n-tayđärt ta s-ärhän käl-Älyähud ad-has-tät-ëjən ɣas, oläs uyəl n-teje ta n-Masidunya,

⁴ äddeew d-Subatir ägg Birus wa n-aɣrəm wa n-Biri, d-Aristaräq d-Skändus wa n-Täslonika d-Gayəs wa n-Darba d-Timoti, d-Tušik d-Tirfim wa n-teje ta n-Azya.

⁵ Äzzarän-as meddën-win-däɣ, ëqqälän-asän däɣ-aɣrəm wa n-Tärwas,

⁶ okäy-anäɣ ämudd wa däɣ-tattän äddinät tijəlwen ti wär ha täzza ɣas, nëjjäš turäft n-aman däɣ-aɣrəm wa n-Fëlibb, nässakäy səmmos išilan fäll-ëjärew tëzzar, näwwäđ-tän-in däɣ-Tärwas-i-däɣ nässakäy ëssəboɣ imdan.

⁷ Ij'-anäɣ ašäl wa n-älxad-i n-ašäl wa äzzarän däɣ-ëssəboɣ dihen ɣas, näžziimäɣ iket-nänäɣ, nətatt amənsi wa n-tasäktot šäddijän. Issan Buləs, a-s ašäl wa ilkämän i-wen, iglä. Däɣ-təssəba n-a-wen-däɣ a fäl ässakäy ehäđ-wen-däɣ, ädiwännät d-imadhalän-net d-äddinät.

⁸ Näžziimmäɣ iket-nänäɣ fäll-afälla n-ehän n-soro äsimäläwläwnät tiftəl äjjootnen,

⁹ ädiwännät Buləs i-älžämayät dihen-däɣ, a-s ija a-wen-däɣ, äsihätäl ämawađ s-isəm-net Itikus fäll-fənetär ämerän. Ämmiijräd Buləs ehäđ-en-däɣ a-s hin-ilyäd eđəs Itikus, äträkkät-dd fäll-afälla n-soro wa s-kărađ. A-s sär-s dd-äzzubben imumənän, ëjmađän-t iman.

¹⁰ Äzzubbät-dd sär-s Buləs ənta-däɣ, ibdäd jənnəj-s, irmäs-t-dd s-äfuss tëzzar, innä i-äddinät: «Änset ənniyät-näwän, iddar.»

11 Iqqäl ɖarät-a-wen afälla n-ehän, äzun amənsi wa n-tasäktot šäddijän, oläs-asän edäwänne har tänfäraräw tifawt.

12 Iqqäl ämawaɖ ənta ehän-net, iddar-iɣlas. Ämoos a-wen əssəbab n-tedäwit ässismäɖän ulhawän n-tamətte iket-net.

Ifäl Buləs Tärwas, ikkä Milati

13 Näzzar näkkäneɖ i-Buləs, nəjjäš turäft n-aman, nəkka Asus-i ɖär-s nohär ed, ässof ənta ad-äj asikəl-en fäll-idarän-net.

14 Iwwäɖ-anäɣ-dd ɖäɣ-Asus ɣas, nämohär ɖär-s asikəl har näsjän ɖäɣ-Mittilän,

15 nokäy ašäl wa iyyäɖän s-Šayo, təzzar, nokäy s-Saməs d-Milati.

16 Ässof Buləs ad-wär-immer aɣrəm wa n-Ifäsus i-ad-wär t-äwweɣän ɖäɣ-s äɖdinät wi n-teje ta n-Azya ed, äroräɖ Yärussälam i-ad-ɖäɣ-s isəssikəy ämudd wa n-Fantäkawt.

Isəmməterän wi ija Buləs i-inušämän n-älkänisät ta n-Ifäsus

17 Älwäqq wa d-näsjän ɖäɣ-Milati, ässofa Buləs inušämän n-älkänisät ta n-Ifäsus.

18 Osän-t-dd ɣas, inn'-asän: «Təssanäm käwäneɖ iman-näwän tämudre ta ətṭäfäɣ ɣur-wän ɖäɣ-a-wa əkkäsäɣ əlley jere-wän ašäl wa d-käwän-dd-oseɣ ɖäɣ-teje ta n-Azya,

19 təssanäm əmmək wa s-äsräsäɣ iman-in data-wän ɖäɣ-älxidmät wa heɣ i-Emäli. A-wen, jey-t s-imeṭṭawän d-ahänay n-talɣiwen sämunnen sär-i dd-orawän käl-Älyähud.

20 Təssanäm dağ a-s wär t-illa a hawän-əffarəğ, äxtəbəğ-awän, əssəğrəğ-kəwän dāğ-ihānan-nāwän hakd tifərrowen a-wa hawän-ihā älfäyda iket-net,

21 wär kälā hi-okäy ašäl d-wär-äsmätärəğ käl-Älyähud hakd inəzzulam† d-ad-utabän i-Mässinəğ, əjən immun-näsän dāğ-Emäli Ƴisa.

22 Ämāra näkk da-hi, izzəlzäm Unfas Šəddijän tikawt n-Yərussälām, wär-əssenəğ a hi-iqqälän dāğ-s

23 mäšan, ikkas-ahi Unfas Šəddijän dāğ-taydärt n-a-s tayrəmt oseğ-dāğ, əjəğet fäll-ujəš n-tišəm d-ahānāy n-ağāna.

24 Diha t-əlleğ, wär-əjeğ təmudre-nin hārät, wär fälla-s ärmeğəğ ed, wär hənnəyəğ a säl ittus wa s-oşaləğ i-ad-hin-səssiwədəğ aməşal wa hi-issəğläf Emäli Ƴisa, äxtəbəğ isälän n-Älənžil-i hān isälän n-ännuğmät n-Mässinəğ.

25 Ämāra, kəwāneđ-i jer-äxtəbəğ isälän n-Təmmənəya n-Mässinəğ, əssanəğ a-s äbas ilkam ad-tənhayäm idəm-in,

26 əkkasəğ-kəwän dāğ-taydärt iket-dāğ-nāwän, äbas dāğ-i əđmanän iman-nāwän ed, a-wa ämoosän älməğna n-əlğəllas n-Mässinəğ wa hawän-irha,

27 əssəğrəğ-kəwän tayətte-net iket-net, wär dāğ-s-in-oyyeg hārät.

† 20:21 20:21 — Ƴur-käl-Älyähud, ere wārän ämoos ägg-Älyähud s-aləşäl meğ ere wārän ilkem i-äddin-näsän, iket-net, änəzzalim a ämoos. A-wen-dāğ a fäl tiwsaten ti iyyädnen iket-nəsät, ti n-inəzzulam. — Ašäl-i-dāğ, änəzzalim, äkafär (ere wārän issen s-Mässinəğ).

28 Ämära, äjät ənniyät i-iman-näwän, tagəžäm daḡ älzämaḡät n-imumənän wa käwän-issäḡläf Unfas Šäddijän, umasät šund imädanän äḡdalnen, agəžät älkänisät n-Mässinäḡ ta ikfä iman-net s-ašni-net wa inḡälän.

29 Əssanäḡ a-s afäl käwän-əfäläḡ, ad-jere-wän dd-əlmuməsnät tiḡəs wären-e-aḡən tāhanint i-tahrut ta n-imumənän.

30 Ad-käwän-dd-əzjarän meddən n-inəsbuha maden-əttär ere äslälän ḡara-sän,

31 a-wen-däḡ a fäl, äjät ənniyät, əktəwät-dd a-s käraḡ iwətyan-wi əkkäsäḡ jere-wän, ehäḡ d-ašäl, samätaräḡ-käwän s-iyyän-iyyän, dehiyyän fäw, imeḡtawän a-s jeḡ a-wen.

32 Ämära, ayətma, ässiḡläfäḡ-käwän i-Mässinäḡ d-ännuḡmät n-mäjräd-net, Mässinäḡ a ilan tārna n-ad-käwän-isədwəl däḡ-immun-näwän, isətbət tākasit ta itwär i-iməšseddəjan iket-däḡ-näsän.

33 A-s t-əlleḡ jere-wän, wär-äsdärhänäḡ azrəf wäla oräḡ wäla isəlsa n-wäl' iyyän däḡ-wän,

34 səjrahät ifassän-in, təssanäm käwäned iman-näwän a-s ifassän-in a-s äxdämäḡ i-a-wa s-ämiḡatäräḡ, näkk d-meddən-wi ḡar-i äddewnen,

35 əssəknäḡ-käwän hak ašäl a-s a-wen-däḡ a-s təlam s-ad-t-təjəm i-ad-tədhələm tiläqqiwen. Əktəwät-dd a-wa innä Emäli ḡisa a-s innä:

<Ojār älxer ihän isuf uhən ajaraw.> »

36 Issəmdä Buləs d-timtär-tin-däḡ ḡas, ärkäḡän iket-däḡ-näsän, ad-hasän-itəddal Mässinäḡ.

37 Hallän iket-däḡ-näsän, tikrirəyän däḡ-s, tisəsän-t däḡ-idmarän-näsän,

38 äsniinän iman-näsän fäll-a-wa s-hasän-innä, äbas ilkam ad-t-ənhayän. Äsofäðän-t-in ðarät-a-wen hundäx har ijjäš turäft n-aman təzzar, əqqälän.

21

Tikawt n-Buləs d-imidiwän-net i-Yärussälam

1 Nəbða dār-sän xas, nəjjäš turäft n-aman, närmäs tamdujt n-awtəl wa n-Kus, äffäw-anäx, nokäy s-Rudus təzzar, nəkkä Batara.

2 Nəjräw dihen turäft n-aman tiyyät təkkat teje ta n-Finisyä, nəjjäš-tät,

3 nohäz-in awtəl wa n-Qəbrus, noyy'-e fäll-täšalje-nänäx, nokäy s-Surya, näzzubbät dāx-ayrəm wa n-Tir-i dāx-la turäft s-ad-zəzzubbət ilälän wi tät-əhänen.

4 Nəjräw härät dāx-inəttulab, nässakäy xur-sän əssa išilan. Nəll'-e xur-sän dihen-dāx a-s tändd-imhəl Unfas Šaddijän s-Buləs, ad-t-salyadän d-ad-wär-ikka Yärussälam.

5 Okäyän-anäx išilan-en-dāx dihen xas, äsofäðän-anäx-in imumənän-win-dāx, meddən, tidedən d-aratän har nəzjār ayrəm, närkäx dāx-asälim n-əjärew, ad-nətəddal Mässinäx.

6 Nəssəmdä tittar d-isənnäxlaf dār-sän xas, nəjjäš turäft n-aman, əqqälän əntäneð ihänan-näsän.

7 Nəfäl näkkäneð Tir, nəkkä Bätlomis. Nəsjän dāx-s xas, nəkkä ayətma-näx dāx-äddin wi t-əllänen dihen, nässälläm fälla-sän təzzar, nässakäy ašäl xur-sän.

⁸ Äffäw-anäx xas, nəkk' ehän wa n-Filəbb wa n-amällänžal,† izzaḡ aḡrəm wa n-Qäyşara, ənta a-s iyyän däḡ-meddən wi n-əssa ənnəfrännen däḡ-Yărussalam, nəzzubbät xur-s.

⁹ İla əkkožät tilyaden wären əzzey meddən, jarräwnät mäjräd xur-Mässinäx i-ad-t-in-səssiwədnät äddinät.

¹⁰ Nässakäy härät n-işilan dihen-däḡ a-s hanäx-dd-osa ännäbi dd-ifalän Älyähudəyät s-isəm-net Äggäbbas.

¹¹ Os'-anäx-dd xas, idkäl taməntəka n-Buləs, osäḡ sār-s ifassän-net d-iḡarän-net, inna: «Ənta da a-wa innä Unfas Şäddijän: məssi-s n-taməntəka-ta-däḡ, ilkam ad-t-əkrədän käl-Älyähud s-əmmək-wa-däḡ däḡ-Yărussalam, əjən-t jer-ifassän n-inəzzulam.†»

¹² Nəslä i-isälan-win-däḡ xas, ad-nəlaqqäd näkkäneḡ hək imumənän wi əzzäḡnen Qäyşara Buləs i-ad-wär ikkä Yărussalam

¹³ məšan, inn'-anäx: «Ma ämoos a-wa käwän-işlän, naxxäsäm ulh-in s-imeṭṭawän-näwän? Näkk, diha t-əlley, äsidäwäx i-tişəm hək-däḡ i-tamättant däḡ-Yărussalam fäl təssəba n-isəm n-Emäli ʃisa.»

¹⁴ İssəndär-anäx xas, nəkf'-e älḡafyät, nənn-as: «İja Mässinäx erhet-net.»

† **21:8 21:8** — İsem n-äwadəm wa ikkäläf Mässinäx däḡ-älkänisät d-älxutbät n-Älənžil. — Afäl əjjətän a hasän-itawännən: İmällänžalän. † **21:11 21:11** — ʃur-käl-Älyähud, ere wärän ämoos ägg-Älyähud s-aläşäl meḡ ere wärän ilkem i-äddin-näsän, iket-net, änəzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Aşäl-i-däḡ, änəzzalim, äkafär (ere wärän issen s-Mässinäx).

15 Nässakäy äzzäman däḡ-Qäyşara təzzar, näsdäw, näjožäy s-Yärußälam.

16 Äsofaḡän-anäḡ-in härät däḡ-inəṭṭulab n-aḡrəm-en, äwwäyän-anäḡ s-ehän n-amumən s-isəm-net Mānasun ila awtəl wa n-Qəbrus, näzzubbät ḡur-s.

Amuqqəs n-Buləs d-Yaqub

17 Näwwäḡ-in Yärußälam ḡas, äsbärräkän-anäḡ däḡ-s ayətma-näḡ däḡ-äddin s-tedäwit.

18 Äffäw, näddew d-Buləs s-ehän wa n-Yaqub-i ḡur-äzzimmäḡän inušämän n-älkänisät iket-näsän.

19 Nänmäjjä dār-sän isofan təzzar, illäḡät-asän Buləs isälan s-iiyyän-iiyyän n-a-wa ija Mässinäḡ iket-net jer-inəzzulam s-älxidmät wa ija jere-sän.

20 Əslän i-isälan-en-däḡ ḡas, ad-tiimələn Mässinäḡ. Ənnän-as darät-a-wen: «Äṅṅa-näḡ Buləs, ənhəy ḡas afdän fäll-afḡän n-käl-Älyähud wi omännen s-Mässinäḡ, əṭṭafän iket-däḡ-näsän alkum i-alämär wa n-Mosa däḡ-isälan n-asəmmili n-aratän d-älḡadatän wi-iiyyäḡnen;

21 nəssan a-s ämära d-əslän a-s dd-tosed, ilkam däḡ-sän tənna n-härät ed əslän a-s käyy, tänimäşrayäd i-alämär wa n-Mosa.

22 Närha fälla-k ämära ad-tän-tökkəsäd däḡ-täqqän n-eḡäf-ten-däḡ.

23 Ämära, äddäbara-nänäḡ hak da: hann-anäḡ əkkož meddən əjjaşnen ärkəwäl,

24 idawnet dār-k s-edägg wa däḡ-šaşdajän äddinät iman-näsän, şəşdəjäd iman-näk dār-sän, tökkəsäd-asän ehäre wa n-asəttəbəlbel-näsän, dihen, ad-əlmədän äddinät a-s a-wa fälla-

k itawännen, wädden a ijan ed, a-wa mad-təjød, äsijäyha a-s wär tänmäšräyäd i-alämär wa n-Mosa.

²⁵ Däḡ-isälan n-inəzzulam wi s-ämära, omanän s-Älmasex, nəktab-asän täkarde n-tamätert däḡ-hasän-nənnä, wär tättänet isan ämoosnen takute i-äššanäm, wär sässänet ašni, wär tättänet mäḡsoy, əbdəwnet d-e d t-illäm a isamädasän taḡəssa.»

²⁶ Äffäw, äddew Buləs d-meddən wi n-əkkož, ijjäs dār-sän edägg wa n-təšədje, illäḡät i-äddinät täqqän ta mad-səssikəyən təzzar išdajän, təzzar äkt hak iyyän däḡ-sän fäll-imanet.

Atärməs n-Buləs

²⁷ Išwar imda əssəboḡ wa n-təšədje-näsän, ənhäyän härät däḡ-käl-Älyähud n-äkall wa n-Azya Buləs däḡ-ehän n-ämudd wa mäqqārän ḡas jän-dd erk iman däḡ-tamətte, tođa fälla-s,

²⁸ saḡären äddinät, jannen: «Ya käl-Išrayil, əyyäwät! Ənhəywät əwadəm-wa s-edägg osa-däḡ, išinməšrəy tamətte-nänäḡ s-a-wa ixatṭäb fäll-alämär wa n-Mosa d-a-wa ijan fäll-ehän n-ämudd wa mäqqārän, ənhəywät-ak, igla fäw har dd-äššojäš dāgg-Älyunan† iyyäḍ ehän n-ämudd wa mäqqārän, äsmädäs-t.»

²⁹ Ənnän a-wen fäl-a-s innin, ənhayän Tir-fim wa n-Ifäsus äddeew d-Buləs däḡ-ammäs n-aḡrəm, äḡelän, äššojäš-t-dd ehän n-ämudd wa mäqqārän.

† 21:28 21:28 Gərik (Grec) däḡ-Təfränsit.

30 Iwäs aḡrəm-ənnin-däḡ iket-net, tošäl-dd tamətte, ärmäsän äddinät Buləs, äšräwräwän-t har t-əzzəzjārän ehän n-ämudd təzzar, äḡfälän tishar-net çara-sän.

31 Tattärän iji n-iman-net dihen-däḡ a-s osän isälan n-tamdərwayt ta jat däḡ-aḡrəm kumända wa ännihädän däḡ-əssärdusa wi n-käl-Roma hänen Yärussälam.

32 Issäḡrä-dd älwäqq-wen-däḡ käbtänän d-əssärdusa, äddew där-sän šik s-tamətte. Tənhäy-t tamətte imal-dd ənta d-əssärdusa-net ḡas, əbḏän d-Buləs.

33 Ikkä-dd kumända Buləs, omär s-ad-däḡ-s ətwəjjənät sənätät tišəm təzzar, issəstän-t d-ere wa ämoos d-a-wa iḡšäd.

34 Täsiḡärät tamətte iket-net, hak ašrut-däḡ wär-oher d-amidi-net iḡäran, indär i-kumända ad-isəl i-a-wa has-ijanna Buləs. Omär çarät-a-wen s-ad-ättälwäy Buləs s-ehän wa n-əḡḡeskär.

35 Älwäqq wa d-itiwən Buləs asəggaggən wa išijušan äwadəm ehän wa n-əḡḡeskär, amsiwi a t-əjän əssärdusa fäl təssəba n-ašunəj-i-däḡ sār-s təja tamətte i-ad-t-tänḡ. Issəntä Buləs uješ n-ehän, təzzän sār-s tamətte har dd-əqqälän əssärdusa jan-as afäraj.

36 Täsiḡärät tamətte iket-däḡ-net, janna: «Ämmätet, ämmätet.»

Ämewäy Buləs s-ehän wa n-əḡḡeskär

37 Älwäqq wa d-äbok Buləs uješ n-ammas n-ehän wa n-əḡḡeskär, innä i-kumända: «Ak

äddobex ad-hak-ännäx härät mex?» Inn'-as kumända: «Käh! Yas käyy tössanäd Tälyunanit?

³⁸ Adiš käyy, wädden u-Mişra-wa s-a äynayän d-äsfälläg äkkož afdän n-äwadəm wi has-ölkämnen s-tenere?»

³⁹ Inn'-as Buləs: «Näkk, ägg-Älyähud, əwey däx-taxrəmt ta n-Tarša däx-teje ta n-Silisi, a-wen taxrəmt təlat isəm. Ämära, ärheey däx-k, ad-hi-təkfəd turhajät n-ad-äjäx härät n-mäjräd i-tamət-te-ta-däx.»

⁴⁰ Ikf'-e kumända mäjräd xas, ibdäd Buləs, ikkä-dd tamət-te, ibdäd fäll-isəgguggan n-ehän, illäf i-tamət-te i-ad-susəm, tässosäm. Imməjräd-asän älwäqq-wen däx-Ÿäbranəyya, tawalt ta-däx ənkäsän. Inn'-asän:

22

Mäjräd wa ija Buləs i-ad sār-s ixləs iman-net (Ijitän 9:1-9; 26:12-18)

¹ «Ayətma-x, abba-tän-in, säjdät ämära i-mäjräd wa s-ärheey ad-hawän-t-äjäx i-ad-sār-s əkkəsäy udlem fäll-iman-in.»

² Eslän a-s Ÿäbranəyya-ta-däx əttädän a däx-hasän-ässewäl, ətʔäfän ʔəbb, äsjädän-as. Inn'-asän:

³ «Näkk, ägg-Älyähud, əwey däx-taxrəmt ta n-Tarša təhät Silisi mäšan, axrəm wa n-Yäruşsalam a däx-ədwäläx. A-wa əlmädäx iket-net, əlmädäx-t daw-təlxuləma n-Gamälyäl. Ənta a hi-issäxran alkum i-a-wa innä alämär n-abbatän-nänäx iket-net. Əjjəloyät-in däx-tuksəda n-Mässinäx a hi-iwwäyän s-əşşənju

n-tabarät ta-däx n-Ÿisa s-əmmək wa s-tät-täššunjem ašäl-i-däx.

⁴ Eglex däx-əššənju wa has-jex har tajjäx iman n-äddinät wi əlkämnen i-zäbo-wen-däx, tajjäx tišəm däx-iyääd, tøjjaräx-tän däx-takärmüt, wär-əzleyäx meddən d-tiḏeden.

⁵ A-wen, äjjəyh'-as ämänokal n-käl-tikutawen, äjjəyhän-as daḡ inušämän wi ḡattäsnen äššäreḡa ed əntäneḏ iman-näsän a hi-əkfänen tikarḏiwen əkkanen käl-Älyähud wi n-aḡrəm wa n-Dämašäq i-ad-əjrəwäx tabarät n-asəttärməs n-äddinät-wi əlkämnen i-tabarät-ta-däx, äjäx däx-sän tišəm təzzar, əlwəyäx-tän-dd s-Yärussälam.

(Ijitän 9:1-19; 26:12-18)

⁶ Ässokaläx däx-isälan n-a-wen-däx har hin-ohäzäx Dämašäq. Diha-däx tät-in-ohäzäx s-tarähut, wäla a hin-əjrähäx, a-s fäll-i dd-äzzubbät ännur, dd-ifalän isənnawän, ijan amləwləw n-tikunen,

⁷ əhex-dd oḏex, əsley i-emäsli hi-innän: <Sawəl, Sawəl! Ma käy-orämän sār-i, tiḡəzzubud-ahi?>

⁸ Ənnex: <Emäli, mi tämoosäd?> Inn'-ahi: <Näkk a-wa Ÿisa wa n-Näširät tiḡəzzəbud.>

⁹ Ənhäyän meddən wi dār-äddewäy ännur wa dd-ämläwläwän mäšan, wär-əslen i-emäsli wa hi-ämmijrädän.

¹⁰ Ənnex-as: <Emäli! Ma s-ley s-ad-t-äjäx?> Inn'-ahi Emäli: <Əbdəd, äkk aḡrəm wa n-Dämašäq, ad-hak-itwənn dihen a-wa s-led s-ad-t-təjəd.>

¹¹ A-s itäj a-wen-däx, wär t-illa a hannäyäx ed, äsdärḡäl-ahi ännur wa fäll-i dd-äzzubben.

Əlwäyän-ahi imidiwän-in s-äfuss har nəjjäş Dämaşäq.

¹² Ill'-e dihen ähaləs äddiinän däx-a-wa innä alämär wa n-Mosa, ässiimxärän käl-Älyähud s-isəm-net Änanyas,

¹³ ənta-en-däx a hi-dd-osän, äzozäy-ahi iman-net, inn'-ahi: <Аҗна-х Sawəl, arr titṭawen-näk>. Ämeränät-dd titṭawen-in, ənhäyäx-t.

¹⁴ Inn'-ahi daḡ: <Mässinäx-i s-əlkämän abbatän-nänäx a-s äru d-käy-äsnäfrän i-ad-käy-isəlməd erhet-net, tənhəyäd wa s-itawänna Ämaḡdal, təsləd i-a-wa fälla-k irha s-əmm-net,

¹⁵ tumasäd tajuhe-net dat-dägg-adəm, təlläxəd-asän a-wa tənhäyäd d-a-wa s-təsled iket-net.

¹⁶ Ämära, ma käy-iwwaxän? Əbdəd, tət-wəsəlmäxäd däx-aman, säxləfäd iman-näk Mässinäx i-ad-käy-işəsdəj däx-ibäkkadän-näk.>

¹⁷ Älwäqq wa d-äqqäläx Yärussälam qarät-a-wen, təddaläx Mässinäx däx-ehän n-ämudd wa mäqqārän aşäl iyyän a-s hi-tässoda tänäfalilt dd-falät Mässinäx.

¹⁸ Ənhäyäx Emäli, inn'-ahi: <Tärmaḡ, əzjär Yärussälam şik fäl-a-s wär mad-ärḡən imuzäxän-net s-tajuhe ta fäll-i mad-təjəd.>

¹⁹ Ənney-as: <Emäli, wädden, əssanän imumənän əmmək wa s-əkkeḡ jer-ihənan n-äddin wi n-käl-Älyähud, naqqäx iyyäd däx-sän, tajjäx tiwit s-ebärtäk däx-iiyäd, təjjaräx-in wi iyyädnen däx-takärmüt.

²⁰ Aşäl wa d-inxäl aşni n-Stifan†-i n-tajuhe-näk,

† 22:20 22:20 Jannen-as iyyäd: Älmuştafa.

əbdadäx, taqqäsäx i-wi t-naqqänen, näkk fäw a əssäxläfan isəlsa-näsän.»

²¹ Inn'-ahi Emäli älwäqq-wen: «Egləw, ad-käy-sukäx tiwsaten n-inəzzulam† ti hänen ikallän wi ujəjnen.,» »

Ujəš n-Buləs i-takärmüt

²² Äsijädän-as äddinät hundäx har tendäx xas, äsyären däx-išənnawän, ad-jannen: «Elhəsät fälla-näx äwadəm-wa-däx, wär-ilä s-ad-äqqayəm iddar.»

²³ Naqddawän ixäran, täkkäsän isəlsa-näsän fäll-iman-näsän, nabbäsän-as äkall.

²⁴ Omär kumända älwäqq-wen i-ad-t-šujəšan əssärdusa ammas n-ehän wa n-əlxəskär, əjən däx-s tiwit i-ad-t-šəhhəššəlän tənna n-äddälil-wa fäl fälla-s sayərat tamətte.

²⁵ Karrädän-t əssärdusa dihen-däx i-ad-däx-s əjən tiwit a-s innä Buləs i-käbtän wa tillän dihen: «Ajän, ijraw-awän älqanun ad-təjəm tiwit däx-u-Roma wär-äswär äššärexa udlem.»

²⁶ Isla käbtän-en i-a-wen xas, ošäl s-kumända, inn'-as: «Hekäyy! Äj ənniyät i-a-wa s-tärhed ijinət, ähaləs-i, i n-Roma.»

²⁷ Ikkä-dd kumända Buləs, inn'-as: «Xas, tidət käyy u-Roma?» Inn'-as Buləs: «Eyya.»

²⁸ Inn'-as kumända: «Näkk, əzrəf äjjeen a zäläx i-ad-əjrəwäx tumast-ten-däx.» Inn'-as Buləs: «Näkk, a əwey-däx, ämoosäx-t.»

† 22:21 22:21 — Yur-käl-Älyähud, ere wärän ämoos ägg-Älyähud s-aläsäl mex ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

29 Ʒššenkäšan fälla-s əssärdusa wi s-ihənnin ärhan ad-t-əkrədän, əjən dəḡ-s tiwit. Irmäḡ kumända ed, ija tišəm dəḡ-ere la Roma iket-di d-iritwəšreḡ.

Ātwäḡră-dd Buləs s-imizărän n-käl-Işrayil

30 Āffāw ḡas, ad-itammäḡ kumända i-ăddälil n-ăddārora wa t-ăswărän käl-Ālyāhud, ikkäs Buləs dəḡ-tišəm, issăḡră-dd đarăt-a-wen imănokalän n-käl-tikutawen d-inušămän-wi ḡattäsnen äššäreḡa təzzar, issăḡră-dd Buləs, ij'-e jere-sän.

23

1 Ikna Buləs akäyad n-inušămän wi n-Sinhidrin† ḡattäsnen äššäreḡa təzzar, inn'-asän: «Ayətma-ḡ, wär t-illa a dəḡ-əššakäḡ iman-in, a-wa s-ila ägg-adəm s-iji-net dəḡ-isälan n-ta n-jere-s d-Măssinäḡ, wär kăla has-änmäšräyăḡ har năkk-da-dăḡ.»

2 Iggăd-dd sār-s Ānanyas wa n-ămănokal n-käl-tikutawen, omăr i-əssärdusa wi t-əllanen edes i-Buləs s-ad-has-ənfăzän, isusəm s-iyyăt.

3 Ēnfăzän əssärdusa i-Buləs ḡas, innă i-ămănokal n-käl-tikutawen: «Infăz-ak Măssinäḡ isəm n-erk äwadəm; ənde d-ămmukkän a-s kăyy-i s-äniihăjja d-ad-hi-təšräḡad s-iqqud s-a-wa innă alămăr, kăyy-da-dăḡ âmăra has-itinməšriyän, sasänḡed-ahi.»

† 23:1 23:1 A-wa älzămaḡăt n-inušămän d-imizărän n-käl-Işrayil wa itirən äššäreḡa, əntăneđ a-s äłqallitän, oşaḡän daḡ tamətte d-əlxəkum d-ăddin.

4 Ənnän-as äddinät: «Käyy, ma käy-äsihälän tigөгgar n-ämänokal n-käl-tikutawen n-Mässinä?»»

5 Inn'-asän Buləs: «Ayətma, änsät-ahi-dd, wär-əssenäx a-s ənta-i-däx a-s ämänokal n-käl-tikutawen ed əssanäx a-s iktab a-s:

«Wär tənned a läbasän fäll-ämänokal-näk.» »

6 Däx-a-wen-däx, ad-ilmäd Buləs a-s ašrut n-tamətte iyyän, i n-taggayt ta n-käl-sadus, wa iyyädän, i n-ta n-käl-faris. İdkäl emäslinet dat-käl-Sinhidrin,† innä: «Ayətma-x, näkk u-faris n-ägg-u-faris a ämoosäx, kunta ill'e uđlem hi-iwarän ašäl-i-däx, wär t-illa a ämoos kunta wädden wa n-ättäma-i järex n-a-s təlcam tanäkra jer-inəmmuttan.»

7 Innä a-wen xas, tənkar tamxənnant jer-käl-faris d-käl-sadus, täzun tamətte.

8 Ämoos ašrut iyyän wa n-käl-sadus-i jannänen wär təlcam tanäkra n-inəmmuttan, wär t-ellen änjälosän wäla alšinän; ämoos ašrut wa iyyädän wa n-käl-faris-i ässiitbätän emel n-häratän-win-däx iket-näsän.

9 Təwäs tamətte iket-net, ja täkat. Əggädän älɣulam wi n-taggayt ta n-käl-faris, əwārän säššahät s-ašrut wa n-Buləs, ad-jannen: «Ähaləs-i-däx, wär t-illa uđlem fälla-s nəhannäy, ak mi is-sanän fäw kunta wädden a dd-ifalän işənnawän mex änjälos iyyän a has-imməjrädän?»

10 İnhäy kumända tukəse n-talxa ta dd-təšräyät xas, irmäx fäll-ad-t-təmzəyžəy tamətte,

† 23:6 23:6 A-wa älžämäxät n-inušämän d-imizärän n-käl-İşrayil wa itirən äššärexa, əntäneđ a-s älqallitän, osaxän dağ tamətte d-əlxəkum d-äddin.

tənkädnəkäd-t. Omär i-əssärdusa s-ad-t-əlwəyän s-ehän wa n-əlyəskär i-ad-t-səssijəjän tamətte.

¹¹ Ehäd wa ilkämän i-wen, änfäläl-dd Emäli i-Buləs, inn'-as: «Buləs, kuyəd, wär käy-išäšlalet härät fäll-ämašäl wa käy-əssäyläfäx, əmmək wa s-hi-tämoosäd tajuhe dāx-Yärussälam, əmmək-wen-dāx dāx a-s mad-hi-tumasäd tajuhe dāx-Roma.»

Taydärt ta s-əttärän käl-Älyähud ad-tät-əjən i-Buləs

¹² Äffäw xas, hädän käl-Älyähud n-a-s wär t-illa a mad-əkšən wäla a mad-əswən a əkkän wär-əssäydärän Buləs, əjən iman-net.

¹³ Əkkozät timərwen n-ähaləs a jänen tahude-ten-dāx.

¹⁴ Dāx-a-wen-dāx, ad-əkkän ämänokal n-käl-tikutawen d-imännähädän n-tamətte, ənnän-asän: «Nəj'-awän tahude, ilxän-anäx dāx Mässinäx kunta ill'-e a he-näkš wäla a he-nəsəw a nəkkäs wär nəja iman n-Buləs.

¹⁵ Nārha dāx-wän ämära, ad-təttäräm dāx-kumända d-käl-Sinhidrin, ad-dd-səbdədän Buləs data-wän dāx-äsaru n-a-s tärham asəstan-net, afäl təjäm a-wen, ad-näj näkkäneḍ əmmək fäll-has-in-nəssəmdä.»

¹⁶ Təsla tejäše n-Buləs i-taydärt-näsän xas, ikka ehän n-əssärdusa wa iha Buləs, ija dāx-s isälan.

¹⁷ Iyrä-dd Buləs iyyän dāx-käbtänän, inn'-as: «Əlwəy alyaq-i-dāx s-kumända fäl-a-s ila a-s irha ad-has-tän-änn.»

18 Äddew dār-s kăbtän-en s-kumănda, innă i-kumănda: «Buləs wa n-u-takărmut a hi-innän ad-sār-k dd-əlwəyăḡ ämawaḡ-i-dăḡ fäl-a-s äwway isălan s-irha ad-dăḡ-k tăn-ăj.»

19 Ikkäs-dd kumănda alyaq s-takše təzzar, issəstän-t d-isălan wi äwwăy.

20 Inn'-as alyaq: «Änmännakän käl-Älyăhud fäll-ad-dăḡ-k ətărän ašəkka ad-dd-təyyəd Buləs sār-sän i-ad-t-səbdədän dat-käl-Sinhidrin älmät ärhan ad-t-əknen asəstan d-a-wa iḡšäd,

21 wār kăy-săswadnet fäl-a-s, a iwwaḡän əkkozät timərwen n-ăhaləs a ihădän n-a-s wār mad-əksən, wār mad-əswən a əkkän wār jen iman-net, wār-ăqqelän ämăra ḡas ar i-ad-sār-sän t-dd-təyyəd.»

22 Älwăqq wa d-isigləw kumănda ämawaḡ-ənnin-dăḡ, äsmätär-t d-ad-wār ija isălan-wi-dăḡ i-ăwadəm wäl' iyyän.

Ujəš n-Buləs i-takărmut dăḡ-ayrəm wa n-Qăyšăra

23 Issăḡră-dd ḡarät-a-wen əssin kăbtänän, inn'-asän: «Sădwät-dd sänatät-timaḡ n-əssărdusa, əssayät timərwen n-əssărdasi dăḡ-wi năyнен ibəjwan d-sänatät timaḡ dăḡ-wi ärjašnen, äwwayän allaxän, sədəwəm afäl okăynät tisudəsen i-tikawt n-Qăyšăra,

24 əstəjät i-tisnay, səsiwəḡäm-in Buləs iddar-iḡlas Filiks wa n-gəfăr.»

25 Iktăb kumănda tăkarḡe ḡarät-a-wen-dăḡ innă:

26 A-wa năkk Kəlod Lisyas hin-ăhuulän gəfăr Filiks-i əkneḡ semḡar.

27 Ähaləs-i-däx sär-k-in-ässäiğläx, ärmäsän-t käl-Älyähud, ətärän ad-əjön iman-net. Elmädäx a-s ädđiin fäll-Roma xas, ässokäsäx-t-dd jer-ifassän-näsän s-əjhän n-əssärdusa.

28 Däx-derhan-in n-almud n-a-wa fäl ärhän tenäxe-net, əssəbdädäx-t-dd dat-inušämän-wi xattäsnen äššärexa i-ad-əlmədäx äddälil n-uđlem wa t-äsiwäran,

29 əlmädäx a-s a ihalän ebre n-tijəttewen n-alämär-näsän xas, wädden a änihäjjan d-tamättant wäla takärmüt.

30 Iket hi-əjjäsän isälan n-a-s ärhan käl-Älyähud asäxdär-net i-ad-əjön iman-net. Däx-təssəba n-a-wen-däx a fäl t-in-əssärmädäx sär-k, səlmədäx dağ wi has-dd-əškänen a-s käyy a ännihädän däx-isälan-net.

Wässälam!

31 Əjän əssärdusa älwäqq-wen-däx a-wa hasän-innä kumända, əglän d-Buləs ehäđ-en-däx har t-in-ässawäđän tağrəmt ta n-Antibatris.

32 Äffäw xas, əqqälän əssärdusa wi ärjäšnen Yärussälam, ässofäđän-in wi näynen ibəjwan Buləs s-Qäyšara.

33 Əwwäđän-in xas, jän təkarđe-tənnin-däx ifassän n-gəfär, əssəbdädän-dd dağ Buləs data-s.

34 Ixra gəfär təkarđe təzzar, issəstän d-teje ta lät Buləs. Ilmäd a-s Silisi a t-lät xas, inn'-as:

35 «Ad-käy-dd-säxräx afäl dd-əwwäđän äddinät wi hak-dd-əškänen.» Omär darät-a-wen i-əssärdusa i-ad-t-əjön däx-ehän s-ätiwäjja ənniyät, däx-ehän n-təmmənukəla wa äsdäy ämänokal Harudəs.

24

Tebädde n-Buləs dat-ämānokāl Filiks

¹ Səmmos išilan ɗarāt-a-wen, osä-dd Änanyas wa n-ämānokāl n-kāl-tikutawen ifal-dd Yārussālam, äddeew d-hārāt dāḡ-inušāmān d-ānabdid s-isəm-net Tartāloš. Osān-dd ḡas, əškān i-Buləs s-gəfār.

² Ätwäḡrā-dd Buləs. Diha-dāḡ dd-osa, ad-sār-s əšonāj Tārtāloš, ad-t-isawar uɗlem, ijanna:

³ «Ämānokāl-nānāḡ Filiks, nāmmoy-ak älxal wa ähusken d-älḡafyāt wa s-tāzozäḡād äkall-nānāḡ, a-wen, wār t-illa äwadəm s-wädden issan sār-s.

⁴ Ämära, wār nārha asḡəf-nāk s-mäjräd äjjen, ärheəḡ dāḡ-k dāḡ-milḡaw-nāk, ad-hanāḡ-təkfəd ässaḡāt əndārrän n-mäjräd.

⁵ Ähaləs-i-dāḡ n-ägg-äddārora, edägg osa-dāḡ, ad-dāḡ-s isəffəlləg käl-Älyāhud, ittār ašənnəməšri-nāsän, ämoos iyyän dāḡ-imizārän n-tagḡayt ta təḡlät fäll-tidət n-iman-net s-itawānna ta n-kāl-Nāširät.

⁶ Dāḡ-təməḡare n-anməšri-i-dāḡ ija, ittār fāw ad-isəmmädəs ehän n-ämudd wa mäqqārän. Nāstärmäs-t s-a-wa innä alämār-nānāḡ [

⁷ māšan, ohāḡ-t dāḡ-nāḡ Kumānda Lisyas s-äššahät.

⁸ Täddobed käyy iman-nāk ad-t-səstənnäd d-uɗlem wa t-nāswār ed ənta iman-net, ill'e diha].»

⁹ Ohārän käl-Älyāhud wi iyyādnen iket-nāsän iyyän n-əmm, ad-jannen isālan-den-dāḡ.

10 Ästafäy gəfär darät-a-wen i-Buləs, inn'as ad-ämmäjräd. İdkäl Buləs mäjräd, innä: «Əssanäy ämänokal-in a-s käyy äru tämoosäd ägg-äššärexa i-käl-äkall-i-däx, a-wen-däx daɣ a fäl əflasäy a-s ad-hi-təkkəsäd tekäriɖt.

11 A ilan märaw išilan d-əssin dd-əjjäšäy YäRussalam i-ad-däx-s äxbədəx Mässinäx, tädoobed käyy iman-näk ad-səbbuyənäd isälan-win-däx,

12 wär t-illa ere hi-inhayän əntajäx tamətte, wäla ämiiyännanäx d-äwadəm däx-ehän n-ämudd wa mäqqārän, wäla däx-ihānan n-äddin wi n-käl-Älyähud, wäla däx-aɣrəm,

13 wär t-illa daɣ däx-äddinät wi-hi-sawarnen uɖlem data-k-i äddooben asətbət n-a-wen ed, wär len tjuhawen.

14 Hakd a-wen-däx, härät iyyän, ädduuttät, janney-t daɣ data-k: näkk, Mässinäx wa n-abbatän-nänäx a-s əlkamäx s-əmmək wa s-tän-innä alämär d-əlkəttabän n-ännäbitän. A-wen-däx a-s jannen əntäneɖ taggayt təglat fäll-tidət n-iman-net.

15 Mässinäx a däx-jaräx ätṭäma, jarän-t däx-s əntäneɖ-däx n-a-s təlcam tanäkra n-inəmmuttan, jer-wi oläɣnen, wäla wi läbasnen.

16 Təssəba n-a-wen-däx a fäl tattäräx, ad-wär-itəmmil a däx-əššakäx iman-in, dat-Mässinäx wäla dat-dägg-adəm.

17 A ilan iwətyan d-əzjäräx äkall-i-däx, a-s t-dd-äqqäläx, äwwayäx takute n-azrəf tämoosät tadhəlt i-imumənän n-äkall-in, äwwayäx daɣ näkk a-wa s-ärheɣ ad t-əkətäx i-Mässinäx.

18 Ašäl wa d-əssəmdäx a-wa iktäbän däx-

alämär dāḡ-isālan n-təšədje-nin, əbdadāḡ dāḡ-ammās n-ehän n-ämudd wa məqqārān, wār ḡur-i t-təlla tamətte wāla tamdərwayt wāl'-iyyāt. Əbdadāḡ dihen-dāḡ a-s fäll-i toḡa tamətte.

¹⁹ A-wa wār-ih' äššäk ənta da: käl-Älyähud wi dd-fälñen Azya a fäll-i oḡänen, a-wen-dāḡ a fäl äñiihäjja dāḡ a-s kunta ill'-e uḡlem hi-iwarān, əntäneḡ-en-dāḡ a lanen s-ad-hi-səwrən uḡlem data-k i-ad-səddəttun a-wa fäll-i itawānnen.

²⁰ Kunta a-wen, wār-ija, adiš, läḡätnet meddən-wi əbdädñen diha uḡlem wa hi-iwarān a-s dd-əbdädāḡ dat-käl-Sinhidrin-wi† ḡattäsñen äššäreḡa.

²¹ Wār t-illa uḡlem hi-iwarān sāl wa n-a-s əñney: təlkam tanākra jer-inəmmuttan, tənna dāḡ n-a-wen-dāḡ a fäl əbdadāḡ data-k ašäl-i-dāḡ.»

²² Äsfäl Filiks äddinät iman-net ḡarät-a-wen ed issan a äjjeen fäll-tagḡayt-ta-dāḡ təḡlät fäll-tidət n-iman-net, inn'-asān: «Afäl dd-osa Lisyas wa n-ämānokāl n-əssärdusa, ad-kāwāñ-dd-säḡrāḡ.»

²³ Omär ḡarät-a-wen i-käbtän iyyän i-ad-äj əñniyät i-Buləs məšan, äkfet-t turhajät n-ad-t-dd-tisən äddinät-net, tassāñän dāḡ-s.

²⁴ Härät n-išilan ḡarät-a-wen, iqqāl-dd Filiks äddeew d-Dərusil ta n-hänne-s län käl-Älyähud. Issäḡrā-dd Buləs, äsjäd i-isālan-wi itäjñ fäll-immun s-ḲisaÄlmasex.

† 24:20 24:20 A-wa älzämaḡät n-inušämāñ d-imizārāñ n-käl-Işrayil wa itirən äššäreḡa, əntäneḡ a-s älcälitän, osayän dāḡ tamətte d-əlxəkum d-äddin.

²⁵ Itajj'-as Buləs isälan har dd-iwwäð edägg-wa dāḡ-has-ijanna əmmək wa s-ila ägg-adəm ad-sär-s iddär dat-Mässinäḡ, ijrəw älyafyät, isədəw i-äššäreya wa dd-imalän, ännähäð dāḡ-iman-net ḡas, irmäḡ Filiks, innä i-Buləs: «Ēḡləw ämära, afäl sä-r-k əjräwäḡ, ad-käy-dd-aləsäḡ asäḡär.»

²⁶ E-d ähoj a dd-isäḡär Buləs, isəddəwənnət-t, dāḡ-a-s, ijar ätṭäma n-ad-t-äkf Buləs a ila azrəf.

²⁷ Ija a-wen-dāḡ har okäyän əssin iwətyan, izjār Filiks Təmmənəya, ijjäš Bursəs Fistus edägg-net. Ässof ənta, ad-iṭṭəf Buləs dāḡ-takärmüt i-ad-izəjrəz iman-net i-käl-Älyähud.

25

Iyra Buləs Qäyşär i-ad-has-ikkəs tekäriðt

¹ Kärað išilan ðarät a-s idkal Fistus tanäya, ifäl-dd Qäyşära, teje ta fäll-ixkäm, ikkä Yärussälam.

² Ēškän-dd sä-r-s imänokalän n-käl-tikutawen d-imizärän n-Älyähud dāḡ-isälan n-Buləs,

³ laqqädän-t d-ad-hasän-dd-isəwwəyy Buləs i-ad-t-əşräḡän dāḡ-Yärussälam, jannen a-wen, a-s ija a-wen, äru d-əjän äddäbara n-ad-t-säḡdärän dāḡ-tabarät, änyən-t kərəf.

⁴ Inn'-asän Fistus: «Buləs iha takärmüt dāḡ-Qäyşära, ðarät-a-wen dāḡ, näkk iman-in, əkkeḡ Yärussälam dāḡ-išilan-i-dāḡ,

⁵ idawnet dār-i iyyäð dāḡ-wän təflasäm i-ad-əbdədän fälla-wän, umasän tjuhawen-näwän dāḡ-isälan n-ähaləs-wa-dāḡ sawarän udlem.»

6 Ikkä Fistus Yärussälam, ija däḡ-s a t-illan jer-əttam tökköd märaw išilan təzzar, iqqäl-dd Qäysära. Ašäl wa ilkämän i-wa n-uḡəl-net, issäḡrā-dd Buləs s-edägg wa däḡ-iḡattäs äššäreḡa.

7 Ijjäš-dd Buləs ehän-en ḡas, äḡläyḡäläyän-t-dd käl-Älyähud wi-dd fälnen Yärussälam, ad-t-sawarän bahutän d-uḡlemän s-wär t-illa ere äddoben asəddəttu-näsän.

8 Iḡkäl Buləs mäjräd i-ad-ihəl iman-net, isəbbuggət a-wa fälla-s itawännən, inna: «Wär t-illa uḡlem hi-iwarän, wär t-illa a läbasän äḡšadäḡ wäla ənney fäll-alämär n-käl-Älyähud, wäla fäll-ehän n-ämudd wa mäqqärän, wäla fäll-Qäysär-i n-ämänokal wa mäqqärän.»

9 Innä Fistus älwäqq-wen i-Buləs i-ad-ijrəz i-käl-Älyähud: «Ak tärḡed s-ad-tökköd Yärussälam i-ad-käy däḡ-s əsräḡäḡ meḡ?»

10 Inn'-as Buləs: «Näkk, ämära, Qäysär-i n-ämänokal wa mäqqärän ihän Roma, ənta a-s ärheḡ tebädde data-s i-ad-hi-išräḡ. Käl-Älyähud-i sār-k dd-əškänen, wär t-illa a hasän-äḡšadäḡ, a-wen, käyy iman-näk, hannäyäd-t.

11 Kunta ill'-e a äḡšadäḡ wäla a jeḡ läbasän, ärḡeey s-taməttant mäšan, kunta a wa fäll-i itawännən bahu, adiš, wär-əleḡ s-ad-ətwəjjäḡ jer-ifassän-näsän. Ämära, šämad tanfust-dadäḡ, äḡreḡ Qäysär wa n-ämänokal mäqqärän.»

12 Änmänhäy Fistus d-inušämän wi ḡattäsnen äššäreḡa təzzar, innä i-Buləs: «Šämad käyy iman-näk a iḡrän ämänokal wa mäqqärän, adiš, ad-hak-sukäḡ.»

Tebädde n-Buləs dat-Fistus d-Äğribba

13 Härät n-işilan ɖarät-a-wen-däx, osä-dd ämänokal iyyän s-isəm-net Äğribba äddeew d-wälätma-s s-isəm-net Berenis, jan-dd täboşajt s-Fistus däx-Qäyşara.

14 Jän işilan dihen xas, idkäl-asän-dd Fistus isälan n-Buləs, inn'-asän: «Ill'-e diha ähaləs dd-ooya Filiks däx-takärmüt,

15 eşkän-dd sār-i fälla-s imänokalän n-käl-tikutawen d-inuşämän n-käl-Älyähud, ɵttärän däx-i ad-t-sidəwäx däx-äşşärexa

16 mäšan, ɵlläxex-asän a-s älqanun-nänäx näkkäneɖ-i n-käl-Roma, wär hanäx-ijrew ad-nəsidəw äwadəm däx-äşşärexa ar s-ad-t-dd-nässibdäd dat-äşşärexa təzzar, nəlməd kunta a-wa fälla-s itawännən tidət mex.

17 Osän-ahi-dd däx-Qäyşara xas, ɵssäxräx-asän-dd näkk iman-in ähaləs wa s-sār-i dd-ɵşkän.

18 Äxeläx däx-a-wa fälla-s jannen, ixşad a mäqqoorän mäšan, osex-t wär-ija a-wen

19 ed, isälan n-äddin-näsän d-isälan əkkanen ähaləs iyyän ämmun s-isəm-net Yisa, s-orða ɵnta a-s inkär-dd jer-inəmmuttan, ɵnta-den-däx a-wa ikkän jere-sän,

20 wär-əssenäx a has-e-äjäx, ɵttäräx däx-s ad-äkk Yärussälam i-ad-däx-s itwəşräx ed, näkk iman-in, wär hənneyäx uɖlem t-əşwäx

21 mäšan, ässof teyəre n-Qäyşar wa n-ämänokal mäqqārän ed, ijraw-as älqanun-nänäx a-wen.»

22 Iggäd-dd Äğribba älwäqq-wen, inna i-Fistus: «Ähaləs-wa-däx, säsl'-ahi-has näkk-däx.»

Inn'-as Fistus: «Ašökka, ad-t-dd-səbdədäx data-k, təsləd-as.»

²³ Äffäw xas, ässahäx-dd Ägribba ašäl s-älxal wa n-imänokalän ənta d-Berenis ta n-wälätmas, əjjäšan ehän wa n-äššärexa äddewän d-kumända d-inušämän n-ayrəm. Issäyrä-dd Fistus Buləs, ittəlwäy-dd.

²⁴ Imməjräd Fistus, innä: «Ämänokal Ägribba, käwäned-i dd-əžžəmmäyänen dihadäx ašäl-i, ähaləs-i-däx hannäyäm, wär t-illa däx-Yärušsaläm hakd diha-däx, ere s-wädden innä, äbas änihäjja d-tämudre.

²⁵ Däx-a-wa hi-dd-iqqälän näkk, wär t-illa udlem fälla-s əjrawäx t-äsinähäjjän d-tamättant mäšan, šämad ənta iman-net a äsnäfränän ad-t-išräx ämänokal wa mäqqārän, adiš ad-has-t-sukax i-ad-t-išräx.

²⁶ Hakd a-wen-däx, wär-ärheç, ad-has-t-sukax ar s-ad-t-äsidäwäx d-täkarde däx-iktab udlem wa tiwarän. Təssəba n-a-wen-däx a fäl ässofäx ad-t-dd-səbdədäx data-k i-ad-hi-təkfəd tayətte n-a-wa mad-əktəbäx däx-täkarde i-ämänokal wa mäqqārän qarät isəstanän wi t-mad-äjäç

²⁷ ed, wär-il' əmmək n-ad-sukax ämänokal utakärmüt s-wär-ätwässän a-wa iχšäd.»

26

Edäwänne wa ija Buləs i-ad-ikkəs udlem fäll-iman-net

(Ijtän 22:6-16; 26:12-18)

¹ İdkäl Ägribba mäjräd, inna i-Buləs: «Mäjräd! İkkəs udlem fäll-iman-näk.» İdkäl Buləs äfuss-net i-ad-has-səjöd tamətte, innä:

² «Ämänokal Ägribba, ämoos-ahi a mäqqorän turhajät n-mäjräd wa hi-təkfed ašäl-i-däx i-ad-ökkösäx fäll-i udlem wa hi-äswärän käl-Älyähud wi hi-dd-əškänen sär-wän.

³ Əssanäx a-s wär t-illa a hak-idrajän däx-älxadatän-näsän, wäla däx-tijöttewen n-äddin-näsän, a-wen-däx a fäl öttaräx däx-k tazidert n-ad-hi-səjedəd.

⁴ Näkk, wär t-illa ägg-äkall-i-däx wärän issen a-s tömmäqrit-in iket-net, jeḡ-tät jer-käl-tumast-in däx-Yärussälam-i-däx ödwäläx.

⁵ Äru əzzayän-ahi, əssanän daḡ a-wa ämoosäx kunta äbokän i-a-wen, tämudre-nin iket-net, əjeḡ-tät däx-alkum i-a-wa saḡra taggayt ta n-käl-faris, wär t-tölla taggayt tät-tojarät isəm, wäla älyädalät däx-äddin-nänäx.

⁶ Ašäl-i, əbdadäx dat-äššäreḡa fäl tössəba n-ätṭäma wa jərəx däx-ärkäwäl-wa ijjäš Mässinäx i-abbatän-nänäx wi n-ibda,

⁷ äṭṭäma-en-däx, a-s äqqalnät tiwsaten-nänäx ti n-märawät d-sänatät n-Işrayil ed, a-wen-däx a sär-snät dd-orāwän älyibadät n-Mässinäx ehäd d-ašäl. Ämänokal-in, wär t-illa udlem hi-äsiwärän käl-Älyähud wi hi-dd-əškänen säl wen-däx.

⁸ Ak ajän ämoos-awän täkunt a-wa s-ilkam ad-dd-isənkär Mässinäx inəmmuttan?

⁹ Däx-a-wa hi-dd-iqqälän näkk, wär t-illa a-wa-däx wär-əjeḡ i-ad-hin-aləmäx s-iyyät isəm wa n-Ḳisa wa n-Näşirät.

¹⁰ A-wen, jeḡ-t däx-aḡrəm wa n-Yärussälam-i däx-hi-əjrawän imänokalän n-käl-tikutawen asəttärməs n-e d t-illäm ere ilkamän i-Ḳisa

Älmasex, äjəχ-t dəχ-takärmuṭ. Afäl ənhäyəχ i dəχ-sän äniihäjjän d-tamättant, ifassän-in a-s tajjəχ iman-net.

11 Ekkeχ jer-ihānan n-äddin wi n-käl-Älyähud i-ad-tän-säknəχ dəχ-sän aχāna, šahäššaləχ-tän s-asəkkufär, dəχ-təmyäre n-aḍkär-näsän wa hi-ihän, əhoreχ-tän har ikallän wi iyyäḍnen dəχ-əzzaχän.

(Ijitän 9:1-19; 22:6-16)

12 Dəχ-isālan n-a-wen-dəχ a fäl əkkeχ Dämašəq, əwwayəχ tikarḍiwen hi-əkfän imänokalän n-käl-tikutawen, hi-əjrawnen tädabit n-a-wa s-ärheχ iji-net.

13 Ämänokal-in, əgleχ dəχ-a-wen-dəχ a-s hin-ohäzəχ Dämašəq s-ammas n-tarähut, wāla a hin-əjrahəχ näkk d-imidiwän-in a-s ənhäyəχ ännur dd-ifalän isənnawän ojarän täfukt amləwləw.

14 Nəhä-dd noḍa iket-dəχ-nänəχ, əsleχ di-hen i-eməsli hi-innän dəχ-Ÿäbranəyya: <Sawəl, Sawəl! Ma käy-orāmän sār-i, tiχəzzəbud-ahi? Ad-hak-indär amzəzzaj dār-i härkuk.>

15 Ənneχ-as: <Emäli, mi tämoosäd?> Inn'-ahi Emäli: <Näkk a-wa Ÿisa wa tiχəzzəbud.>

16 Ämära, əbdəd fäll-iman-näk, änfaläləχ-ak-dd i-ad-tumasäd änämmašul-in, tumasäd dəχ tajuhe-nin dəχ-a-wa tənhäyäd ašäl-i-dəχ d-a-wa hak dd-madän-infiləl ḍarät a-wa,

17 ad-käy-dd-əχləsəχ dəχ-käl-Älyähud d-

inəzzulam† šəmmişäläx-käy sär-sän,

18 i-ad-tarəd tiṭṭawen-näsän, əzjārän-dd tihay s-ännur, əzjārän-dd tärna n-Iblis s-Mässinäx, amənän sär-i i-ad-tän-äkfäx tenäšše n-ibäkkadän i-ad-ahərən təkasiṭ d-iməššeddəjän wi iyyädnen.>

19 Ämänokal-in Ägribba, wär-ötteräx anməšri i-a-wa hi-dd-änfalälän dd-ifälän isənnawän ed, Mässinäx ad-dd-ifal.

20 Emməjrädäx s-tizarät i-käl-Dämašäq d-käl-Yärušsaläm təzzar, okäyäx s-Älyähudəyät d-iṭārman wi iyyädnen hän inəzzulam, xaṭṭabäx-asän iket-däx-näsän isälan n-a-s lan s-ad-utabän, əjən tämudre täddewät d-imärkedän olaṭnen ässiitbätnen tiynəya ta dd-təšräyät fälla-sän.

21 Təssəba n-a-wen däx, a fäl fäll-i oḍän käl-Älyähud däx-ammäs n-ehän n-ämudd wa mäqqārän, əttārän tenäye-nin

22 mäšan, idhäl-ahi Mässinäx, ikkäs-ahidd däx-ifassän-näsän i-ad-udabəx tebädde, äjjayhäx fäll-isälan-net har ašäl-i-däx i-wi länen isəm hakd wi t-wären əla. A-wa jänneṭ dəx ašäl-i-däx, wär-ämoos a äynayän, äru däx-s ässewälän ännäbitän d-Moša-i əssətbätnen a-s əlkamän isälan-wi-däx hawän-tajjäx.

23 A-wen a t-ämoosän, a-s ilkam ad-inhəy ʿİsa Älmasəx tersəmmawen təzzar, umas teṭəfädde n-äddinät wi dd-maden-ənkär jer-inəmmuttan

† 26:17 26:17 — ʿYur-käl-Älyähud, ere wärän ämoos ägg-Älyähud s-aläšäl meṭ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

i-ad-ətwəjjən isälan n-ännur n-əlχəllas i-käl-
Älyähud hakd inəzzulam.»

Älwižab n-Ägribba i-Buləs

²⁴ Ämmiijräd Buləs itakkäs uđlem fäll-iman-
net dihen-däχ a-s idkäl Fistus emäsli-net, innä:
«Käyy Buləs, äbas tössanäd a jänned, təkkas
däχ-k təmχäre n-təlyuləma tayətte.»

²⁵ Inn'-as Buləs: «Ämänokal-in Fistus, näkk
χas ozja ənniyät-in, əjrahäχ a-wa heχ; a-wa
jännəχ iket-net, wär-ämoos χas ar tidət lat ujreh.

²⁶ Käyy day ämänokal-in Ägribba, wär hak-
ədrejän isälan-win-däχ, a-wen-däχ day a fäl
wär-äksudäχ mäjräd data-k, ed wär t-illa däχ-
isälan-wi-däχ a-s wädden tössanäd sār-s e-d,
əkkašäχ äššäk a-s isälan-wi-däχ, wär jen däχ-
ufär.

²⁷ Ämänokal-in Ägribba, tomanäd s-a-wa
ənnän ännäbitän, wädden?»

²⁸ Iggäd-dd Ägribba älwäqq-wen s-Buləs, inn'-
as: «Käyy, hannäyäχ-käy, a əndärrän χas teχaläd
ämoosäχ älməssexi.»

²⁹ Inn'-as Buləs: «Jer-a əndärrän wäla a hin-
illan i-ad-tumasäd a-wen, daläχ-ak Mässinäχ
käyy hakd älzämaχät wa hi-äsijädän, ad-där-
i taləhəm härät iket-net, a säl tišəm-ti-däχ hi-
hänen.»

³⁰ Issəmdä Buləs mäjräd-wen-däχ χas, ibdäd
ämänokal Fistus hakd Ägribba d-Berenis,
təlkäm-asän day tamətte,

³¹ zajjārän äddinät, tinmənnin: «Ähaləs-i-däχ,
wär t-illa a iχšad t-äsinähäjjän d-tamättant wäla
tišəm.»

32 Inna Āgribba i-Fistus älwäqq-wen: «Ēnnär wädden teḡäre-i ija ähaləs-i-däḡ i-Qäyšār wa n-ämānokäl mäqqārān, itwəyy'-in.»

27

Asikəl n-Buləs s-Roma

¹ Tāwwād-dd täqqān ta n-tikawt n-ākall wa n-Iṭali ḡas, jän käl-əlxəkum Buləs d-käl-takārmūt wi iyyādnen däḡ-ifassān n-kābtān s-isəm-net Yulyus, ənta a ännihādān fäll-ejhān n-əlxəskār wa s-isəm-net: «Wa tān-ojārān».

² Nəjjāš turāft n-aman jat isəm Adāramit, nəkkä ākall wa n-Azya, nāddeew däḡ-asikəl-nānāḡ d-Aristarāq wa n-Täslonika.

³ Ašäl wa ilkāmān i-wen, nāsjan däḡ-teje ta n-Sidon. Āmoos kābtān Yulyus āwadəm s-ikna Buləs əjjāruzāt, iglä fāw har t-ikfā turhajāt n-ad-ākk imuzāyān-net wi hānen aḡrəm-en i-ad-has-arəjan däḡ-asikəl.

⁴ Nəfāl dihen, nällil asālim n-aman, nāmsadāḡ i-awtəl wa n-Qəbrus i-ad-nəmjušet d-aḡu d-tināzzāmären-ti dd-bahhālne i-turāft.

⁵ Nəjlāy darāt-a-wen ejārew wa səmmān ošālān däḡ-ākall wa n-Silisi d-Banfəli, nāsjan däḡ-taḡrəmt ta n-Mira təhāt ākall wa n-Lisya.

⁶ Ijrāw kābtān-nānāḡ dihen turāft n-aman təkkat Iṭali, ij'-anāḡ däḡ-s.

⁷ Nəjā išilan nāsilalām sollan fäll-aman har šārnaš d-nānmawāq d-aḡrəm wa n-Kānida, igdäl-anāḡ əşşuhu n-aḡu ad-nakəy ḡas, nārmās tamdujt ta n-ajus n-ākall wa n-Kritus, nəkka dawa-s har nāmsadāḡ d-Sālmuni.

8 Šärnaš d-nällil asälim n-ejärew har dd-näwwäḍ edägg ijan isəm: tasjənt ta n-tihusay, a-wen edägg, ānimahāzān d-taḡrəmt ta n-Lazaya.

Anməntaš n-ejärew fäll-turäft n-aman ta iha Buləs

9 Nəja išilan s-əmmək-en-däḡ a-s fälla-näḡ ānməntaš ejärew, nəjjāš miši, okäy fälla-näḡ daḡ äzum wa n-tajrəst.

10 Dihen-däḡ, ad-āsmätär Buləs iməssukal wi iyyäḍnen hänen turäft n-aman, inn'-asān: «Məddən, hannäyay a-s asikəl-nänäḡ wär-mad-āj wälä šäḡšad d-miši; näkkäneḍ hakd a-wa ihän turäft, nəha miši d-šäḡšad-wen-däḡ.»

11 Māšan ojar tafləst ija kābtän a-wa has-innä u-taḡäya-net a-wa innä Buləs.

12 Ənhäyän a-s edägg-wa-däḡ äsjänän wädden edägg däḡ-isasakay äwadəm tajrəst ḡas, ässoḡälän tisdas n-turäft, ärmäsän tamdujt n-aḡrəm wa n-Fənikus daw-awtəl wa n-Kritus i-ad-däḡ-s səssikəyän tajrəst.

13 Əllan-t dihen-däḡ a-s dd-isräj aḍu dd-ifalän ajuš, orän-dd turäft, ärkäbän däḡ-a-s ällilän tasāja n-ejärew ed, äḡelän äḡläsän däḡ-äššar-net.

14 A əndärrän ḍarät-a-wen-däḡ, toḍä-dd fälla-sän täšikwalt täššoohet s-itawänna däḡ-Tälyunanit: Erakilun.

15 Izzəwät äššahät-net turäft, iglä dār-s emänän, ābas t-illa ere däḡ-s ännihäḍän.

16 Ija a-wen-däḡ har nokäy afälla n-awtəl wa n-Kluda, ij'-anäḡ aḡrəm-en eff ḡas, nəttär äddäbara s-nänmawäḍ d-isäḡlas wi hänen turäft.

17 Ʒjrāwän meddön aḍkul n-asäxlös wa n-əndärrän ihän turäft, ästärakken-t däḡ-aman, əkrāsän-t däḡ-turäft s-iḡunan, nəḍkäl tisdas i-ad-tänät-isəkəf aḍu i-ad-ābas hanäḡ-äzziwät aḍu. Nāšinanāj s-əmmək-wen-däḡ har nänmawāḍ d-Libya, noyya iman-nänäḡ s-ašrut wa däḡ-wär šejrətän aman.

18 Okäy fälla-näḡ ašäl imdan näbbillän d-aḍu s-əmmək-wen-däḡ, har hanäḡ-ilzäm ašäl wa iyyādän, ad-hin-nəjär ilalän wi hānen turäft i-ad-tifsas.

19 Ašäl wa s-käraḍ, jārän-in inaxdimän a-wa äzzayän ihän turäft iket-net.

20 Nəjä äzzāman wär nənhey täfukt wāla etran, a ija a-wen-däḡ, itiwwaḍ-dd fälla-näḡ äššahät n-aḍu har ābas hanäḡ-iha ere ijarän ätṭāma n-tämudre.

21 Išilan-win-däḡ, nässakäy-tän wär t-illa a nəkša, däḡ-a-wen-däḡ ad-dd-ibdäd Bulös, innä i-äddinät: «Imidiwän-in, ənnär hi-täsijädäm ihənnin a-s hawän-əmməjrädäḡ däḡ-awtəl wa n-Kritus, wär nətəjjəš miši d-šäḡsad ogdähän d-a-wa-däḡ.

22 Ärheey fälla-wän ämära, ad-hi-səjdəm: sänsät ənniyät-nāwän, əḍmanäḡ-awän a-s wär t-illa i däḡ-näḡ mad-iba māšan, turäft ənta, əkkəsät ätṭāma-net.

23 Änfaläl-ahi-dd änjälos n-Mässinäḡ əndäḥaḍ,

24 inn'-ahi: Bulös, wär tärmeyäd ed, wär t-illa ad-wär təbdeḍäd dat-Qäyšär wa n-ämānokal māqqārän. Ad käy-iḡlös Mässinäḡ käyy d-iməssukal wi dār-täddewäd.

25 Ҳас, имидиwän-in, куйөдät, wär төккесәм äтtämä, өflasäx a-s Mässinäx a-wa hi-innä, ad-äj,

26 ilkam дәx-näx ad-nəsөjөн fäll-awtөл iyyän.»

27 Nөja ehäd-nänäx wa s-märaw d-өккөz mäšan, äzziwät-anäx әdu härwa fäll-ejärew wa səmmän s-itawänna Adөrya, a-wen, дәx-ejärew wa səmmän mäqqärän n-Miditerani. Ebre n-ammäs n-ehäd, ofräyän käl-taxäya n-turäft a-s ohazän edägg дәx-wär өкnen aman өjut.

28 Järän axan дәx-aman i-ad-sär-s өкөтөн төššөjröt n-aman, osän aman jan төššөjröt n-käradät timөрwen n-metär d-өssa. Eglän har dihen, oläsän даx еjer n-axan-өnnin дәx-aman, imäl-asän ider n-aman ämära, дәx-sänatät timөрwen n-metär d-өttam.

29 Äksudän käl-taxäya ad-tidөw turäft-näsän, төнкөf i-tihun, xas, järän өккөzät тizolyawen дәx-aman i-ad-өhөlnät turäft, өqqälän дарät-a-wen i-tebädde n-ašäl.

30 Dәx-a-wen-dәx, ad-tattärän käl-taxäya өmmөk s-өjmädän, äsräsän дәx-aman asäxlös өndärrän, jän äsarü n-a-s ärhan ad-hin-šөššөnkөšän тizolyawen ti jän дәx-aman i-ad-өкнөнät antum, өтtөfnät turäft.

31 Ilmäd Bulös fäll-amsud-näsän xas, innä i-käbtän d-өssärdusa: «Änn i-meddөн-näk, afäl wär-äqqimän meddөн-wi-dәx дәx-turäft, adiš, өккөsnet äтtämä n-tämudre.»

32 Äxtäsän өssärdusa дарät-a-wen ixunan n-asäxlös wa өndärrän, oyyän-t iglä, äwwäyän-t aman.

³³ A ɛndärrän dat-äbaqqu n-tifawt, äsmätär Buləš imidiwän-net i-ad-əksən härät fäl-a-s lan a iwwäðän märaw išilan d-əkköz wär t-illa a ikkan imawän-näsän.

³⁴ Inn'-asän Buləš: «Ənfəwät iman-näwän s-härät iyyän, əfləsät a-s wär t-illa dəğ-wän-i s-mad-hin-iba wäla-dəğ emzäd iyyän ɣas dəğ-eɣäf-net.»

³⁵ Inn'-asän Buləš a-wen-dəğ ɣas, idkäl-dd tijəlwen, ämmoy i-Mässinäğ dat-äddinät wi hanen turäft, äzun-tänät qarät-a-wen, ad-itatt.

³⁶ Tokäy-tän tarəmmeyt, ad-tattän ɛntäneð-dəğ.

³⁷ Dəğ-turäft-en-dəğ, näwwäð sänatät timad n-ähaləs d-əssayät timərwen d-säðis.

³⁸ Älwäqq wa d-əyyəwänän äddinät, ɛssänɣälän-in älkäma dəğ-ejärew i-ad-səfsəsän turäft.

³⁹ Ja tifawt, əšlämän dəğ-ijəj taɣmärt dəğ-ijjət äkall mäšan wär-əssenän ma ämoos äkall-wen-dəğ. Ənnän ad-sär-s ɛnnäðän turäft, səjnən-tät dihen-dəğ kunta ämmukkän a-wen.

⁴⁰ Əkkäsän isässärän wi ittäfnen turäft, oyyän-tän-in s-aman, orän iɣunan wi n-taɣäya sasayadnen turäft, jän tisdas i-aðu s-data n-turäft i-ad-tän-in-imhəl aðu s-edägg wa äqqurän əšlämän.

⁴¹ Diha-dəğ d-əkkän s-data a ɛndärrän ad-oðän fäll-härät n-tejeft, tontäm-asän turäft dəğ-äkall. Ittəytäy äkumkum-net dəğ-äkall hundəğ har äbas timtəkwəy, irzä-dd dağ ajilal-net fäll-ässhät wa ija anməntaş n-ejärew wa səmmän.

⁴² Ənhäyän ɛssärdusa a-wen ɣas, änmännakän i-ad-əjən iman n-käl-takärmüt i-udağ ad-ijmäð

wäl' iyyän däḡ-eššaf,

⁴³ māšan unjāy-asān kābtän s-a-wen fäl tārha-i ija i-Buləs. Dihen-däḡ ad-innä kābtän i-äddinät wi əssānnen eššaf, ad-əyyən iman-nāsān s-tizarät s-aman, əšyöfän s-asālim.

⁴⁴ Innä i-wi iyyäḡnen, ad-əjən äddäbara fäl näyän iferəsān n-tisəjwen n-turäft wi dd-irza aḡu. Emmək-wen-däḡ a-s hin-əwwäḡän iket-däḡ-nāsān asālim n-aman, əddarän-äḡlasān.

28

Täsjan turäft n-aman ta iha Buləs däḡ-awtəl wa n-Malta

¹ Näḡlās-dd däḡ-a-wen-däḡ iket-däḡ-nānāḡ, nəzjār-dd aman ḡas, nəslä a-s awtəl wa däḡ-nāsjän, isəm-net Malta.

² Äsmäjaren-anāḡ käl-awtəl-en, əssäryän-anāḡ efew, nəzzäh sār-s iket-nānāḡ ed, iwat ajənna, ija esämed.

³ Ikkəmät-dd Buləs isuksukän s-äshäjäljäl efew māšan, täkwättät-t taššält dd-təstəḡ tukəse n-efew, tärmäm däḡ-äfuss-net.

⁴ Ənhäyän käl-awtəl a-wen ḡas, ad-tinmənnin: «Ähaləs-i-däḡ, wär t-ih' äššäk a-s emäj n-iman, ənta da-däḡ s-iket dd-iḡlās däḡ-aman māšan, ilkäm-as-dd əlḡədär n-a-wa iḡšäd i-Mässināḡ.»

⁵ Irsäy-in Buləs taššält ḡarät-a-wen fäll-iman-net, ännunnäzät-tät däḡ-efew, wär t-illa a has-täḡšad.

⁶ Ija a-wen ḡas, äsbälaläḡän käl-awtəl däḡ-Buləs, ija ḡur-sän a-s a əndärrän ḡas a has-in-äqqimän ihḡəḡi, meḡ ämmut älwäqq-wen-däḡ.

Ähojän wär t-illa a ijan dāḡ torda-nāsän ḡas, eḡḡālän s-a-wa ənnän, ad-jannen ämära: «A-wa, härät dāḡ-imälan wi n-išənnawän.»

⁷ Edägg-en, ohazän-t išəkraš n-ämänokal n-awtəl s-isəm-net Bubləs. Isl'-anāḡ ḡas, äsmäjarät-anāḡ s-ehän-net, nässakäy ḡur-s kəraḡ išilan.

⁸ Nəll'-e dihen-dāḡ a-s tärmäs tenäde täddewät d-tanänāḡat abba n-ämänokal. Os'-e Buləs, äswär-t ifassän-net, ittär-as dāḡ-Mässinäḡ, izzäy.

⁹ Äwwäyän-dd käl-äkall ḡarät-a-wen imarhinän-nāsän, äzozäy-tän Buləs əntäneḡ-dāḡ.

¹⁰ Əssəmyärän-anāḡ käl-awtəl en-dāḡ fäl təssəba n-a-wen-dāḡ. Nässawäḡ tekle ḡas, jän-anāḡ äzzad igdähän i-a-wa hanāḡ-in-äḡqimän dāḡ-asikəl.

Ujəš n-Buləs i-ayrəm wa n-Roma

¹¹ Šämad fälla-nāḡ okayän kəraḡ orän n-asikəl, ad-nəjrāw turäft n-aman täššiwwärät idmawän d-ismawän n-imälan n-eknewän wi s-itawänna: Kästur d-Boläkəs dd-falät Iskändərya, nəjjäš-tät, tässakäy dār-nāḡ tajrəst dāḡ-awtəl-wen-dāḡ.

¹² Nəfäl dihen, näsjän kəraḡ išilan dāḡ-Sirakuz,

¹³ təzzar nällil asälim n-aman har Rajyo. Ašäl wa ilkämän i-wen, inkär-dd fälla-nāḡ aḡu dd-ifalän ajuš, izzəwät-anāḡ emänän har näsjän dāḡ-Bäzula.

¹⁴ Nəjrāw dihen härät dāḡ-ayətma-nāḡ dāḡ-äddin, äsmäjaren-anāḡ; nässakäy ḡur-sän

əssəboḡ imdan. Үur-sän en-däḡ, ad-närmäs tamdujt ta n-Roma.

¹⁵ Ǝslän-anäḡ härät däḡ-älmässexitän n-Roma ḡas, əlkädän-anäḡ-dd s-ässuk n-aḡrəm wa n-Abyud, əssəlkädän-anäḡ-dd daḡ iyyäd s-ässuk wa n-aḡrəm wa n-käraḡät tihənzubba. Inhäytän Buləs ḡas, iräš i-Mässinäḡ, ikf'-e a-wen-däḡ ätṭäma d-äššahät äynayän.

¹⁶ Näwwäḡ-in Roma ḡas, irda əlxəkum i-Buləs s-ad-ifär ehän n-iman-net, izzäḡ däḡ-s ənta d-əssärdasi wa has-ijän ənniyät.

Ajəyh wa ija Buləs däḡ-aḡrəm wa n-Roma

¹⁷ Käraḡ išilan ḡarät-a-wen, issäḡră-dd Buləs inušämän n-käl-Älyähud wi əzzäḡnen Roma. Ǝžžəmmäḡän-dd sār-s ḡas, inn'-asän: «Ayətmaḡ, wär t-illa a äḡšadäḡ s-änimäšräyäḡ i-tumast-nänäḡ, wəla i-älḡadatän-nänäḡ. Aḡrəm wa n-Yärussälam a däḡ-dd-əttärmäsäḡ, əjjäšäḡ däḡ-s takärmüt, ätwäjjäḡ jer-ifassän n-käl-Roma,

¹⁸ əttärän əntäneḡ almud n-a-wa äḡšadäḡ ḡarät a-s hi-äsimäjrädän mäšan, wär t-illa äḡḡārora fäll-i əjrawän hi-äsinähäjjän d-tamättant, əttärän fäw ad-hin-səwwəyyən mäšan,

¹⁹ ənkärän-dd käl-Älyähud dihen fäll-i, unjäyän ärḡän a-wa hi-äxtäsän käl-Roma. Ǝnhäyäḡ a-s wär t-illa a ärhan säl tamättant-in ḡas, tämoos-ahi teḡäre n-Qäyšär wa n-ämänokal mäqqārän ihän Roma tähaššilt. Mäšan, hakd a-wen-däḡ, wär-iha ənniyät-in n-ad-säwräḡ tumast-in uḡlem wäl' iyyän.

20 A-wa-däx a fäl äsdärhänäx ahänay-näwän, səfhəmäx-käwän a-s tišəm-ti-hex, wär tänät-dd-orew sär-i a säl ätṭama wa ohäräx d-käl-Išrayil iket-näsän.»

21 Inn'-as älzämayät wa sär-s dd-äddewän: «Däx-a-wa hanäx-dd-iqqälän näkkäneḏ, wär t-tella tākarḏe hanäx-dd-tosat dd-falät Älyähudöyät hanäx-təjat isälan-näk, wär t-illa daḡ ere nənhay däx-ayətma-näx dd-ifalän dihen hanäx-käy-omalän wäla i hanäx-käy-ozamän.

22 Ämära, nässof, ad-hak-nəsöll näkkäneḏ iman-nänäx ed taggayt ta hed təglät fäll-tidət n-iman-net, nəssan a-s wär t-illa edägg s-wädden äššunjen-tät däx-s äddinät.»

23 Ohärän dār-s ḏarät-a-wen ašäl däx-t-dd-mad-äqqəlän äddewän d-äddinät ojärnen wi dd-osänen äsihe-wa. Osän-dd ašäl-en, imməjräd-asän wa-däx n-tifawt har toḏa täfukt, itafässar-asän tijəttewen n-a-wa isaxra, ixatṭäb-asän isälan n-Təmmənəya n-Mässinäx d-a-wa innä alämär wa n-Mosa d-ännäbitän wi iyyäḏnen, isafham-tän daḡ a-wa ənnän fäll-ḲisaÄlmasex.

24 Issətbät ašrut iyyän däx-sän tənna-net, äšxär-as ašrut wa iyyäḏän ulh-net, unjäyän omänän s-mäjräd n-Mässinäx.

25 A-s t-fälän äddinät, äzunän däx-a-wa ordän fäll-Ḳisa Älmasex. Inhäy Buləs täzune ta jän xas, inn'-asän: «Ijmaḏ-t äššäk a-s tidət a-wa innä Unfas Šäddijän i-imärawän-nänäx s-emm n-ännäbi Saya† a-s t-äšmašäl Mässinäx.

† 28:25 28:25 A-wa ännäbi dd-äzzarän i-Ḳisa, äloläy däx-isälan-net əssayät timaḏ n-awätay dat-tiwit-net.

Äzzäman-en, inn'-as:

²⁶ <Egləw, äkk äddinät-i-däx, tənnəd-asän:

ad-salläm s-timəzzujen-näwän mäšan,

wär t-illa a mad-təfhəmäm,

ad-təswadäm s-tittawen-näwän mäšan,

wär t-illa a mad-tənhöyäm

²⁷ fäl-a-s tamətte-i, täşyar-ahi ulh-net,

täyfäl-ahi timəzzujen-net,

tähär-ahi tittawen-net i-ad-wär hənnöy,

wär səll,

i-ad-wär t-illa a isalmađän ulh-net,

i-ad-sär-i dd-tənnäd, zuzəxäx-tät.> »

²⁸ Inn'-asän Buləs darät-a-wen: «Elmədät, xur-aşäl-i-däx a-s, əlxəllas wa käwän-ikfa Mässinäx, ikf'-e dəx i-inəzzulam† -i has-e-səjədnen.» [

²⁹ Issəmda Buləs tənna n-a-wen xas, fälän-t käl-Älyähud ämiixännän jer-iman-näsän.]

³⁰ Izzäx Buləs dəx-ehän-wen-däx ifär har dəx-s əssakäy əssin iwətyan əmdanen. Ijraw iman-net, ehän-en-däx, a dəx-t-dd-tisən äddinät iket-näsän wi ärhänen ahänay-net,

³¹ ixatṭab-asän isälan n-Təmmənəya n-Mässinäx, isaxr'-en, wär t-illa dəx ere has-igdalän tənna n-a-wa s-irha, ad-tän-änn fäll-Emäli Yisa Älmasex.

† 28:28 28:28 — Yur-käl-Älyähud, ere wärän ämoos ägg-Älyähud s-aläşäl mex ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsän, ti n-inəzzulam. — Aşäl-i-däx, änəzzalim, äkafär (ere wärän issen s-Mässinäx).

**Ălənžil n-Ÿisa Ălmasex: Kitab Ălmuqăddăs
Tamasheq: New Testament**

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

b95f369b-a236-5ca8-8cab-11f74279d73c